

**NATIONAL ASSEMBLY OF
SEYCHELLES**

Wednesday 18th October 2023

The Assembly met at 0903am

National Anthem

Moment of Reflection

Mr Speaker in the Chair

MR SPEAKER

Bonzour Manm Onorab; bonzour nou bann zofisyé Lasanble e nou piblik ki pe swiv nou. Byenveni zot tou pour nou travay lazournen. Nou travay i consist en *Bill*, ki devan nou *Employment (Amendment) Bill*. Mon a demann madanm raporter pour apel Minis avek son delegasyon.

Bon, bonzour Minis pour Lanplwa e Zafer Sosyal, Mrs Patricia Francourt e bonzour egalman Madanm Mohideen *Chief Secretary Public Service Bureau*, Ms Veronique Bresson Sekreter Prensipal pour Lanplwa, Mr Victor Pool *Assistant Principal Legal Draftsperson AG's Office* e egalman akote nou annan Mr Steve Monnaie Direkter *Zeneral Labour Relations* e Ms Alda Aumeeruddy Direkter *Industrial Relations*.

Byenveni zot tou dan Lasanble, bon partisipasyon dan sa Proze Lalwa ki devan nou e pour komanse, nou ava apel pour Mosyon pour *Second Reading*?

HON BERNARD GEORGES

Bonzour Mr Speaker. Bonzour Minis avek ou delegasyon. Bonzour tou bann Manm Onorab, tou dimoun ki pe swiv nou. Mr Speaker, anba *Order 69(2)* nou *Standing Orders*, mon *move* ki *the Employment (Amendment) Bill, 2023* i ganny lir en Dezyenm Fwa. Mersi.

MR SPEAKER

Mersi. Nou a ganny segonnman? Onorab Arissol?

HON SANDY ARISSOL

Mr Speaker, mersi. Bonzour Mr Speaker, bonzour Minis avek ou lekip; bonzour tou Manm Lasanble Nasyonal, tou dimoun ki a lekout. Mosyon i ganny segonde. Mersi.

MR SPEAKER

Mersi Minis. Nou ava envit ou pour fer ou prezantasyon sa *Bill*.

**MINISTER PATRICIA
FRANCOURT**

Mersi Mr Speaker. Bonzour Mr Speaker; bonzour tou Onorab

prezan; bonzour manm *secretariat* Lasanble, bonzour tou dimoun a lekout.

Mr Speaker, lannen pase, mon ti vin devan Lasanble Nasyonal pour prezant Prozedlwa Trezyenm Mwan Lapey ki ti pour aplikab pour lannen 2022. Ozordi mon pe vin anver zot de nouvo avek amannman pour lannen 2023 ek lezot lannen ki swiv.

Parey tou – nou tou nou konnen en trezyenm mwan lapey, i ekivalan en mwan saler ki en travayer i gannyen. I pa enkli okenn *allowance*, oubyen lezot benefis monneter ki en travayer i gannyen ansanm avek son saler.

Sa lapey i endepandan avek okenn bonous, oubyen lezot lapey ki en anplwayer i deza pe donner. Trezyenm mwan lapey i *due* to le 31 Desanm e anplwayer i ganny ziska le 31 Zanvyé son lannen answit pour pey zot travayer.

Mr Speaker, mon oule fer en revy pour lannen 2022, kot ti annan serten sanzman ki ti ganny fer avek sa benefis. Gouvernman ti anonse ki trezyenm mwan lapey pour baze an parti lo performans; savedir 50poursan mandatwar e 50poursan baze lo performans.

Sa ti pou sirtou ankouraz plis prodiktivite avek bi asire en pli o performans lo lapar travayer e osi sa lorganizasyon pour ki zot travay.

Avek sa lanons prosedir pour pey en trezyenm mwan lapey, ti sanze. I ti nepli otomatik ki en travayer i ganny sa benefis, me i ti bezwen demontre ki i merite atraver son performans pandan lannen travay.

Anplwayer ti ganny demande pour etabli target ansanm avek en *appraisal system*, lo ki i pour mezir performans zot travayer ki ti pour aplik pour sa 50poursan ki baze lo performans.

Mr Speaker, an vi ki sa ti premye fwa ki sa lapey ti ganny fer an parti lo baz performans, Departman Lanplwa ti antreprann en evalyasyon pour nou konnen ki mannyer laranzman in marse, e lafason ki sa benefis pour ganny zere pour bann lannen ki swiv.

Sa legzersis ti ganny fer apre sa limit letan donner anba Lalwa, pour pey en trezyenm mwan lapey; savedir apre Zanvyé 2023.

Sa evalyasyon ki ti vwar partisipasyon 250 lakonpanyen prive, ti montre prensipalman ki menm si mazorite sa bann anplwayer ti

pey zot anplwayer en trezyenm mwan lapey pour lannen 2022, laplipar pa ti fer okenn dediksyon baze lo en sistenm pour performans. Rezon pour sa ti aköz:-

1) sa bann anplwayer ti prefere pey en trezyenm mwan lapey an antye.

2) Kontrent letan pour met sistenm an plas.

3) En mank kapasite entern pour administre en sistenm performans.

Baze lo rezilta sa evalyasyon, e swivi plizyer konsiltasyon ki ti ganny fer lo nivo nasyonal ek bann *stakeholders* relevan, tel ki Linyon Travayer, Lasosyasyon bann Anplwayer, *SCCI* e lezot e *HR managers*, Gouvernman in deside rekonsider sa Polisi an rekonesan kontribisyon ki nou travayer pe fer, dan nou lekonomi ki'n bokou redrese.

Alor, anliny avek lentansyon Polisi Gouvernman pour promouvwar produktivite dan landrwa travay, e baze lo *feedback* serten anplwayer ki'n an faver sa sistenm *performance appraisal*, e osi pour donn letan lorganizasyon pour met an plas sistenm pour mezir performans zot travayer, nou'n konstate ki i pli rezonnab pour gard menm sistenm peyman parey lannen 2022

pour sa trwa lannen ki swiv. Savedir 2023, 2024 e 2025, an azoutan lezot amannman.

Mr Speaker, permet aprezan donn detay ki fason Gouvernman pe propoze ki sa benefis trezyenm mwan lapey i ganny aplike, e parey mon'n dir pli boner pour lannen 2023, 2024 e 2025.

Mon oule dir a sa pwen, ki apartir lannen 2026, trezyenm mwan lapey pour baze konpletman lo performans.

Konponan ki pour reste e pour aplikab i *comme* swivan; -

Dat peyman i reste parey. Savedir i *due* tou le 31 Desanm e anplwayer i ganny ziska le 31 Zanvye son lannen answit, pour pey zot travayer.

Fason peyman ki ti entrodwir an 2022 pour ganny mentenir, ek bann lannen ki swiv ziska 2025, savedir peyman i devret ganny fer 50poursan mandatwar e 50poursan lo baz performans.

Lapey trezyenm mwan i reste aplikab zis pour travayer Seselwa e sa bann kategori travayer pa kalifye;

- Travayer etranze
- en *trainee* lo Kontra pour *skills development*
- e en travayer ki son lapey i par lao R45 mil 450.

“Peyman *pro rata*.”

Si en travayer i al lo *training* pour plis ki 14 semenn, oubyen al lo koze san lapey pour plis ki 1 mwan, i pour ganny en proporsyon, ki pour ekskli letan ki'n lo *training*, oubyen konze son lapey.

Si en travayer i ganny met an detansyon Lapolis, oubyen lo *remand* i pour ganny en proporsyon ki pour ekskli letan ki in an detansyon oubyen *remand*.

Dediksyon ki aplikab:

En anplwayer i kapab fer dediksyon etabli anba seksyon 46C dan Lalwa Lanplwa, lo Benefis Lapey Trezyenm Mwan en Travayer.

Sa i vedir si sa travayer i annan labsans ki pa'n ganny otorize; par egzantp en travayer ki'n deklare ki i pa'n kapab raport travay pour en zour pandan lannen pour rezon maladi san en papye Dokter, anplwayer pour dedwir ekivalan en zour lapey lo son benefis.

Apre ki dediksyon in ganny fer, anplwayer i bezwen otomatikman pey sa travayer, 50poursan lo sa sonm total ki reste.

Lo sa lot posyon 50poursan anplwayer i kapab fer ankor dediksyon, me sa i pour posib zis si i evalye

performans sa travayer atraver en *performance appraisal*.

Okenn konze ki ganny otorize anba Lalwa Lanplwa, ki en travayer i sipoze gannyen, pa devret ganny servi koman en kriter, oubyen en fakter pour mezir performans, oubyen prodiktivite anba en *system performance appraisal* kot sa benefis i konsernen.

Sa i enkli;

- konze maternite
- konze paternite
- konze anyel
- konze lo baz konpasyonnel
- koze Dokter
- konze spesyal pour *Coronavirus* ek lezot.

En anplwayer ki fer dediksyon lo sa dezyenm 50poursan lapey sa benefis trezyenm mwan, apre ki'n mezir performans sa travayer, i bezwen notifie sa travayer an ekir sa sonm total ki i pour ganny peye.

En anplwayer ki napa en sistenm ki mezir performans an plas avan le 31 Desanm, oubyen ki pa'n fer sa legzersis pour mezir performans travayer avan le 31 Zanbye, i bezwen pey sa travayer son trwazyenm mwan lapey an antye; ki ekivalan avek saler de baz en mwan, byensir an prenon kont dediksyon legal.

En travayer ki ganny en lapey trezyenm mwan e ki ganny peye annakor avek sa Lalwa, pa bezwen pey okenn *tax* lo sa benefis. Sa i menm aplik pour en lapey sa benefis trezyenm mwan, ki ganny peye volonterman, par en anplwayer dan sikonstans kot sa travayer i en Seselwa, e son saler i par anba R45, 450 mil me i pa zwenn kriter pour ganny en lapey trezyenm mwan. Savedir en travayer ki'n travay pour mwens ki 12mwan.

Grievance:

En travayer ki pa tonm dakor ek sa poursantaz ki in gannyen apre ki *appraisal* in ganny fer, i kapab anrezistre en *grievance* kot Departman Lanplwa, si apre diskisyon apre son anplwayer, i reste konvenki ki i merit ganny en poursantaz pli o, oubyen ki sa poursantaz pa'n ganny kalkile dan en fason ki zis.

Nouvo konponan ki pour ganny entrodwir i *comme* swivan:-
Travayer ki antre dan lanplwa, pli tar Zanvyé:

En travayer ki komans travay apartir nenport ki mwan dan lannen, e i dan lanplwa le 31 Desanm, i pour ganny en proporsyon selman ki pour kouver letan ki i dan lanplwa.

Travayer ki ganny par lao R45 mil 450:

Travayer ki zot saler i par lao sa sonm ki'n ganny preskri dan regilasyon; savedir R45 mil 450 i pa kalifye, me si anplwayer i pey sa benefis, *tax* pour ganny tire zis lo sa bout par lao, R45 mil 450.

Responsabilite anplwayer pour donn detay dediksyon:

En anplwayer pour oblize donn son travayer detay an ekrire, tou dediksyon ki'n ganny fer lo trezyenm mwan lapey.

Travayer ki kit travay pandan lannen:

Mr Speaker, en lot nouvo eleman ki osi pe ganny propoze se ki apartir 2024 - mon repete 'an 2024', en travayer ki kit travay pandan lannen, pour osi kapab pey proporsyon sa benefis trezyenm mwan lapey, avek son bann benefis final. Me sa proporsyon pour ganny kalkile zis lo sa 50poursan ki mandatwar.

Fodre fer mansyonnen ki fodre pa sa travayer i ki travay lo baz disipliner ki i pa ti ankor - ki i pa ti ankor lo probasyon oubyen ki'n fel son peryod probasyon.

Mr Speaker, Gouvernman in fer son mye pour konsider bann konsern ki'n ganny mete

devan, pandan konsiltasyon ki mon'n mansyonnen pli boner. I mon swe ki tou parti i satisfè ek propozisyon final.

Pour konklir, mon oule dir ki avek sa lanvironnman kot devlopman ekonomik pe reganny son viger e en marse lanplwa ki'n preski dir restabilize apre bann diferan lenpak *COVID-19*, sa Prozedlwa ki pe ganny propoze i zistifye, an vi ki en pli gran group nou travayer Seselwa pour resevwar sa benefis, byensir baze lo merit, e travay dir.

Nou tou nou rekonnet e aksepte kontribisyon ek sakrifis ki travayer dan Sesel in fer, pour ki ozordi nou'n kapab rebran e pe zwir en tel lekonomi. Travayer i sa konponan pli enportan pour en lorganizasyon e esansyel pour nou kapab akonplir en performans ekonomik ki a lonterm e devlopman ki dirab. E pareyman sekter prive i devret osi rekonnet kontribisyon ki zot travayer in fer, apre sa lepidemi sirtou ki sekter prive in ozordi anploy anviron 70poursan travayer dan Sesel.

Prozedlwa ki pe ganny propoze pour vin koman en lot progresyon pour ogmant prodiktivite dan landrwa travay. Ekspekte ki travayer pour prodwir plis dan zot

travay, pour fer sir ki zot lorganizasyon i toultan kontinyen prospere, pour zot kontinyen benefisye, mon ti a profite pour fer en rapel avek lorganizasyon travay osi byen ki tou travayer dan Sesel, pour respekte sa Lalwa ki ganny met an plas.

Annou toultan mazin en rezondet an trezyenm mwan lapey, ki prensipalman en mekanizm pour promot en ankouraz travay dir, en motivasyon pour amelyor *performance* travayer ki an retour i anmenn rezilta pozitiv pour biznes.

I osi en fason pour rekonnet kontribisyon sak travayer dan en lorganizasyon travay, e pou apresye lenportans nou resours imen.

Mr Speaker, nou tou nou bezwen aksepte ki isi Sesel koman en pei, e Seselwa koman en Nasyon pour kontinyen sibir ekonomikman, nou bezwen devlop en kiltir travay dir prodwir lo en nivo tre eleve, an term kalite e standar. E sa i bann aksyon pozitiv ki'n devlope plizyer pei dan lemonn.

Mr Speaker, pour fini mon oule remersye Lasanble, pour zot latansyon e mon rekomande ki Lasanble Nasyonal i aprouv sa bann lamannman, ki pe

entrodwir dan trezyenm mwan lapey. Mersi Mr Speaker.

MR SPEAKER

Mersi Minis. Bon, nou ava prezan ouver deba pour bann Manm, mon anvizaz-e ki pour annan en bon deba lo la e avek plizyer Manm ki pour entervenir. Donk mon pour met en limit 15minit, mon krwar sa i pa irezonnab, aköz si bann Manm i reste *focus* lo sa ki dan sa *Bill*, mon krwar zot kapab kouber, tou sa ki zot bezwen dir dan 15minit.

Mon'n remarke ki bokou letan dan deba, i ganny pran par lezot size an deor *Bill*, so mon pa krwar poudir sa i pour vremen limit labilite lekspresyon bann Manm lo sa *Bill*.

Nou a komans avek 15minit e i posib ki mon pour bezwen reviz sa pli tar. Nou a ouver lasal pour deba. Onorab Philip Arissol in lev lanmen. Onorab ou annan laparol.

HON PHILIP ARISSOL

Mersi Mr Speaker. Bonzour Mr Speaker. Bonzour Minis avek ou delegasyon. Bonzour tou koleg Onorab espesyalman bann zabitan Anse Boileau.

Mersi Mr Speaker, pour donn mwan sa loportinite pour eksprim mon sipor pour

desizyon Gouvernman lo sa *Bill* Trezyenm Mwan Saler, ki vize ver provizyon spesyal pour peyman trezyenm mwan saler travayer pour lannen 2023, 2024, e 2025.

Koman reprezantan distrik Anse Boileau, mon santi mwan oblize defann lentera bann travayer devoue Anse Boileau e lentera tou travayer Sesel e siport sa Prozedlwa enportan.

Mr Speaker, Prozedlwa Trezyenm Mwan Saler, i pa en akt bonn volonte, me i en temwannayaz langazman Gouvernman *LDS*, atraver byennet sosyal e lotonomi ekonomik.

Ler nou pe asir en lot mwan saler, nou rekonnet kontribisyon e apresye valer travay, valer travayer e ki zot pe fer pour krwasans e devlopman nou nasyon.

Avan tou sa Prozedlwa i ganny servi pour rekonnet zefor nou bann mendev, bann travayer Anse Boileau e annefe tou travayer Seselwa ki travay dir toulezour; souvandfwa zot al pli lwen ki zot devwar.

Alor en trezyenm mwan saler i ganny servi pour rekonpans zot travay dir e zot akt devouman, e en saler siplemanter i definitivman byen merite.

Mr Speaker, sa koud pos finansyel, pa pour selman amelyor zot kalite lavi, me i pour osi servi koman en lankourazman pour kontinyen sa travay, e elev nivo prodiktivite. De plis trezyenm mwan saler, i annan en lenplikasyon pozitiv pour nou lekonomi lokal.

Ler nou enzekte plis reveni dan lekonomi, nou ankouraz depans konsonmater e ranforsi krwasans ekonomik. Logmantasyon pouvwar pour depanse parmi travayer i tradwi dan demann, pour marsandiz e osi plis servis ki benefisye biznes e lendistri lokal.

Sa a son tour i zener loportinite travay e ankouraz en serk prosperite, ki a benefisye nou distrik e nou pei an zeneral. An plis ki sa, trezyenm mwan saler i kapab kontribye pour amelyor moral e prodiktivite anplwaye.

Ler travayer i santi ki son anplwayer i donn li valer e ki ganny rekonpanse adekwa, pour son zefor, sa i ankouraz en lanvironnman travay pozitiv e amelyor satisfaksyon travay. Sa an retour i kapab ogmant lwayote, anplwaye e ogmant nivo prodiktivite e inovasyon.

Mr Speaker, i esansyel pour asire ki aplikasyon trezyenm mwan saler, i

akonpannyen par en sirveyans efikas e mekanizm pour ranforsi. Transparan e responsabilite i vremen enportan pour asire ki tou anplwayer i respekte Lezislasyon e ranpli zot obligasyon anver bann travayer.

Gouvernman i merit etablir en sistenm solid pour swiv konformite, e adres nenport ka ki pa konform san perdi letan.

Mr Speaker, an konklizyon trezyenm mwan saler i en pa progre e nesese anver en sosyete pli prospere e pli ekitab.

Ler nou siport sa Prozedlwa nou demontre langazman anver byennet nou bann travayer, krwasans ekonomik lokal e prensip lazistis sosyal.

Mon sipliy tou Manm Lasanble pour zwenn mwan, e aport sipor pour sa Prozedlwa enportan e asir en lavenir briyan pour tou nou bann travayer.

Mersi Mr Speaker, pour donn mwan loportinite pour prezant sa de mo, an faver sa Mosyon - an faver sa lamannman. Mersi.

MR SPEAKER

Mersi Onorab. Onorab Georges Romain.

HON GEORGES ROMAIN

Mersi Mr Speaker. Bonzour Minis ek ou delegasyon. Bonzour tou koleg Onorab e tou dimoun a lekout. Mr Speaker, mersi pour donn mwan laparol, mon osi mon ti anvi dir enn de mo lo sa Prozedlwa e mon krwar definitivman i en bon Prozedlwa ki pe vin devan nou, sa lamannman.

E mwan mon krwar parey ler nou dir lo trezyenm mwan saler, definitivman tou travayer ki travay dir i merit ganny son trezyenm mwan saler.

Me par kont enn de amannman ki'n vin dan sa Lalwa, mon vremen apresye en kantite aköz bokou kestyon in vin devan nou, baze lo par egzantp, par egzantp in dir ou komans travay an Zanvye, fodre ou fini ou travay by 31 Desanm pour ou kalifye en trezyenm mwan saler.

E la nou vwar ki dan sa amannman i pe vini, i pe dir nou ki menm ler ou ganny anploye an Zanvye, ou fini pas ou probasyon, e kantmenm ou pa fini travay le 31 Desanm, ou vwar ou pe kite dan Oktob, Novanm, ou *still* kalifye pour en trezyenm mwan.

Me byensir ou pa pour ganny ou *full* trezyenm mwan saler ou pour ganny – i pour kalkil li par proporsyon.

Savedir ou pour *still* ganny en larzan, baze lo kantite letan ki ou'n travay dan ou lakonpanyen. E sa i en kestyon ki mon'n ganny demande bokou bann dimoun *actually* sanmenm sa lannen, aköz ler Minis – *Cabinet* ti pas sa nou ti koz lo la, e bokou dimoun ki ti pe kite ti pe demann sa kestyon.

So, la mon kontan sa Lalwa pe vin devan nou. E lot kote osi tou, i dir kantmenm ou pa komans travay an Zanvye ou komans travay apre Zanvye, ou *still*, si ou kit le 31 Desanm sa lannen ou ankor dan ou lanplwa, ou *still* ou pour kalifye pour en trezyenm mwan saler; ankor i pour kalkile lo kantite mwan ki ou'n travay.

Me sa osi i vremen byen, savedir person pa vwar zot perdi nanryen baze lo byensir lo ou travay, ou performans.

E en lot keksoz Mr Speaker, mon'n vwar ki nou pour kontinyen ek sa 50poursan garanti, apre lot 50poursan pour baz lo ou *appraisal*, lo ou *performance appraisal*, parey Minis in fer resorti 2023, 2024, 2025 e pour mwan i byen en kote, aköz ou

garanti, *at least* ou – i pa - ou garanti 50poursan, be selman *still* fodre ou pe *perform* pour sa lot 50poursan.

Me selman ankor enn fwa, bokou koze kekfwa ki enn de travayer la deor i fer resorti, e dir baze lo sa *appraisal* ki mannyer sa *appraisal* i ganny fer.

Sa i en konsern ki mwan menm mwan koman en Manm, *MNA* bokou dimoun i met sa devan mwan, ki zot vwar li kekfwa lafason bann kestyon, oubyen bann - lafason ki bann keksoz i ganny met devan zot, pour zot fer sa *appraisal*.

Parey zot koz mwan enn ler zot bann *objectives* ki zot in dir mwan, tousala zot pa'n ganny *train* kekfwa vreman, lafason mannyer pour fer sa e zot santi, sa i vin koman en defayans devan zot.

E mwan mon santi kekfwa lafason pour fer sa *appraisal*, kekfwa ou ti bezwen vreman baz lo son performans byensir, me selman fer li dan en fason pli senp posib. Akoz parey Minis in fer resorti, in dir ki pour lannen 2022 mon mazine - *yah*, ki 250 lakonpanyen prive ti pey zot trezyenm mwan saler pour zot bann travayer.

E sa i vreman ankourazan - i vreman byen. E savedir i

montre ou deor bann lakonpanyen prive osi i vreman pe onor sa trezyenm mwan saler, vreman byen.

Be savedir mwan mon mazine mwan Mr Speaker, lafason ki mannyer kekfwa zot in peye, zot in pey byensir baze lo zot *appraisal*, zot bann - zot performans zot *staff* e byensir lo performans lakonpanyen.

Akoz si ou lakonpanyen i fer larzan, byensir ou bezwen santi ou retourn *back*, sa larzan travayer - atraver ou bann *staff* akoz zot ki'n fer ou fer bokou sa profi ki ou'n fer e sa i vreman byen.

Me par kont alor mon ti a kontan retourn lo la, Minis mon ti a kontan kekfwa pli tar atraver kekfwa Mrs Mohideen osi mon konnen i *expert* ladan, ki zot ti kapab ladan si zot ti kapab donn zis pli byen leksplikasyon pour bann dimoun ki pe ekoute la deor, ki mannyer vreman sa bann *performance appraisal* i ganny fer.

Mon konnen sak lakonpanyen kekfwa son lafason i diferan. *At the end of the day* kekfwa zot pe ganny sa rezilta ki pour kapab ziz zot travayer. Me selman mon ti a kontan kekfwa ganny en pe plis leksplikasyon ler Minis kekfwa i

fer son *summing up*, enn pti pe lo la.

Aprè mon ti a zis kontan fer resorti Mr Speaker, akòz mon pa pour vremen long lo la, akòz mon konnen i pe fer sorti bann keksoz ki vremen byen, e ler nou Minis in fer sorti ki lo sa bout R45 mil 450 ki sa travayer, sa sonm *maximum* ki zot pe peye, ki ganny sa trezyenm mwan, bann ki pa anba i a gannyen byensir, mon ti a kontan Minis osi si ou kapab fer resorti ki manner zot in tonm lo sa sif, 45 mil 450 ki sa son target ki zot ti'n tonm lo la?

E byensir Minis, ou'n fer resorti dan ou entervansyon ki ou'n dir, kantmenm i annan lakonpanyen sa pour baze lo zot diskresyon, ki zot kapab peye sa travayer, kantmenm i pe ganny sa saler, e byensir baz son diskresyon sa lakonpanyen.

Sa osi, byensir mon krwar ou'n mansyonnen ki i annan en *tax* ladan, ki pour bezwen peye e sa i byen, *at least* sa travayer ou santi li, osi in *perform*. Akòz ler ou regarde pour en lakonpanyen *perform*, pour en lakonpanyen ki'n fer byen, tou travayer i bezwen zwe en rol.

Kantmenm son saler komans pli ba, ou'n monte, li osi in bezwen zwe en rol. Alors nou pe koz en trezyenm mwan

saler, mon santi ki tou dimoun *at the end of the day*, i ti merit ganny en trezyenm mwan saler baze si nou pe ziz lo performans, akòz sansan i pour vin koman en dekourazan pour sa enn ki'n ganny pli o akòz i santi kekfwa li son saler, vre i pli ki pour tou - tou le mwan i pe ganny pli o saler.

Me selman trezyenm mwan i vin parey koman en *incentive*, koman en benefis pour sa dimoun ki'n *perform*. Me si ou osi ou saler i en pe pli - byensir i tonm dan sa *bracket* 45 mil 450 ou par gannyen, i vin enn pti pe dekourazan.

Akòz nou tou nou santi kekfwa vremen *at the end of the year*, Desanm, Zanvyè, *early* Zanvyè, nou merit ganny enn pti keksoz.

Alors kekfwa ler Minis i ava dan son *summing up* i ava eksplik enn pti pe pli byen lo la.

E an gro mon ti pour kontan dir osi, pour profite Mr Speaker, poudir sa lamannman i vremen byen dan sa *Bill* ki pe vin - ki la devan nou.

e mwan pour mwan mon santi ki vremen sa pour ankouraz bokou dimoun, kekfwa pour santi i a vin pa en dezavantaz pour zot, ki zot bezwen mazin Zanvyè ziska Desanm pour mwan ganny trezyenm mwan.

Be par kont i annan bann lamannman ki'n ganny fer ladan, ki zot pour ganny en keksoz. Tou dimoun pour vwar zot ganny en keksoz ladan.

E la osi mon le profite Mr Speaker, poudir avek nou bann zenn, leve kontinyen, leve al travay. E dan bokou travay ki tou le semenn nou koman Manm Lasanble nou pe kontinyen gannyen, bann *vacancies* ki *available*.

E par kont mon pour profite poudir mon le - dan nou kote distrik Anse Etoile, nou'n bokou nou bann zenn pe antre dan lanplwa, e menm sa bann zenn ki ti - parey nou dir zot, ki ti lo sibstans, nou lo en Komite kot nou zwenn zot, e i annan ki'n fini antre dan en lanplwa sa bann zenn.

E la mon pou – pa pour mansyonn okenn non, be selman mon vreman si zot pe ekoute ozordi mon le felisit zot, pou kontinyen sa travay ki zot pe fer, aköz mon konnen i pa fasil, pour zot antre dan en lanplwa aköz zot pa ti ladan avan.

Me nou ankouraz zot pour zot reste dan zot lanplwa e ki plis dimoun ava kontinyen antre dan lanplwa, ki a lafen dizour nou pa ava vwar bokou dimoun kekfwä ki pe al lo lasistans parey nou kontan dir.

Mr Speaker, mon pou dir Minis, i pour ganny mon sipor lo sa - bann lamannman ki annan dan sa *Bill*. E ankor enn fwa Mr Speaker, mon a dir ou mersi pour donn mwan laparol. Mersi.

MR SPEAKER

Mersi Onorab. Onorab Naddy Zialor.

HON NADDY ZIALOR

Mersi Mr Speaker. Bonzour Mr Speaker. Bonzour Minis avek ou lekip, Lepep Seselwa tou bann koleg Onorab, tou travayer isi dan Lasanble Nasyonal e tou travayer Seselwa bonzour.

Bomaten en *Bill* amande i retourn isi dan nou *Chamber*, pour nou diskrit lo la. En size ki mon asire ozordi radyo televizyon e bann diferan platform medya, pour pe ekout tre atantivman.

Mr Speaker, pour mwan komanse, mon anv i tir mon sapo pour tou travayer Seselwa. Pour tou fanm, zonm, zenn ki leve tou le bomaten, e avek lagras Bondye, pe travay sanses pour met dipen lo zot latab e pour fer sir ki nou pe i kontinyen progrese.

Alors bomaten lo non Lepep Seselwa e lo non nou tou

ki isi dan nou Lasanble nou dir avek zot, mersi Mr Speaker,

Bomaten, mon aport mon sipor pour sa *Bill* pour de rezon. Premyerman, trez mwan saler in en topik ki'n annan bokou politik ki'n ganny fer avek, me an menm tan, in en topik ki Seselwa i kontinyelman pe koz lo la.

E bomaten mon anvi felisit Departman Lanplwa pour retourn avek en *Bill* e fer sir ki i en *Bill* ki enklizif. Letan mon dir i enklizif, nou vwar bann lamannman ki pe fer sir ki tou travayer Seselwa pa ganny kit deryer Mr Speaker. Personn pa ganny kit deryer. E la mon anvi tous de keksoz ki mon santi i enportan ki dan lepase, pa neserman ti pe ganny pran kont.

Sa se enn, sa sizesyon ki'n ganny mete ki pour nepli ganny en kriter ki fodre ou'n komans travay depi Zanbye pour ou kalifye pour ou ganny ou trezyenm mwan Desanm. I pour en sistenm *pro rat*.

So, i annan diferan diskisyon, parfwa serten fristrasyon, pour sa enn ki li petet in komans travay Avril e ler i ariv Desanm i vwar li i pa kalifye pour li ganny en trezyenm mwan saler, trezyenm mwan lapey.

Alors ou ki pe ekoute, mon asire ki i ava en soulazman pour ou Mr Speaker.

Dezyenmman i en lapel, en lapel pour tou Seselwa pour nou travay, travay e travay, travay, pour ki letan i ariv Desanm, ouswa Zanbye, sa *thirteenth month pay* i a vin en rekonpans pour sa kontribisyon ki ou'n fer an plis, pour sa devosyon ki ou'n devoue dan ou travay.

E la mon anvi tous serten pwen, Minis ou'n koz lo mekanizm ki bezwen ganny met an plas pour fer *assessment* lo sa *performance base*, mon lapel i pour bann *human resource* dan bann diferan landrwa travay.

Mon swete ki pandan sa 3an ki sa *Bill* pe fer provizyon pour 50poursan mandatwar e 50poursan evalyasyon, zot koman bann lorganizasyon zot fer sir, ki vremen i annan sa mekanizm an plas pour *assess* nou bann travayer, pour *assess* sa dimoun ki pe travay, pour ki ler i ariv Desanm nou ava napa bann fristrasyon; nou ava napa politik, nou ava napa sa persepsyon ki annan serten faver ki pe ganny fer, me ki tou dimoun i konnen egzaktman depi ler mon antre travay, ler mon siny mon kontra lala mon bann obzektif, lala mon target.

E ki non-selman, nou esper Desanm pour nou *assess* en travayer, me nou fer ki a la baz *quarterly*, pour ki vreman en dimoun i konnen poudir a la i-mon target, en mannyer ki ler i ariv Desanm mon konnen poudir ki mon lekspektasyon, ki mon landrwa travay i ekspekte de mwan, e ki bor ki mwan mon bezwen fer serten amelyorasyon.

Alor Mr Speaker, i mon swe, ki tou travayer Seselwa i konpran ki nou koman en Gouvernman, en Gouvernman dizour, nou pe fer tou sa ki nou kapab pour ki nou amelyor nou servis, pour ki nou amelyor nou sistenm, pour ki nou amelyor lavi Lepep Seselwa.

Me pour sa arive, i pa pour depan lo Minis tousel, i pa pour depan lo nou tousel, me i pour depan lo sakenn de nou. E la mon anv i ankor enn fwa, dir ki se pa Minis ki fer evalyasyon pour ou ganny trezyenm mwan lapey, se ou koman sa travayer, ler ou leve dan bomaten pou fer sir ki ou ariv a ler, pour fer si ki ou delivre, pou fer sir ki ou pa pe rann lavi ou frer ek ou ser difisil letan i vin demann en servis.

Pou fer sir ki ou pa pe met politik dan travay, pou fer sir ki si ozordi ou departman i anv i ou delivre serten keksoz, koman en

travayer ou fer li, ou travay avek ou leker, ou travay ek lanmour, ou travay pour ou pe i e mon asire nou pour progrese.

Alors mon demann ek tou Seselwa, annou travay ansanm, annou tir tou lanmertim; annou tir tou lespri malis ki i annan dan nou louvraz, dan nou travay.

E travay ansanm pour ki vreman si nou anv i ganny 100poursan, nou tou nou a travay ansanm atrap lanmen kanmarad pour nou ganny 100poursan e non-pa dir poudir nou bezwen ganny 100poursan. Me annou fer sir ki nou merit ganny 100poursan.

Mr Speaker, avek sa mon aport mon sipor pour sa *Bill* e mon swete ki tou lezot koleg, isi dan Lasanble bomaten i osi donn sipor Lepep Seselwa. Mersi.

MR SPEAKER

Mersi Onorab. Bon mon napa Manm ki'n lev lanmen ankor la. Alor mon pour envit bann Manm ki anv i entervenir pour lev zot lanmen la an se moman. Mon war li bokou pli enteresan deba letan deba i en pe balanse avek le de kote. So nou a pran bann non silvouple. Tenir lanmen enn pti moman silvouple - letan kote isi.

Mon'n ganny bann kote isi, silvouple kote isi. Tre byen, wi nou'n gannye kote isi e ankor enn fwa, wi mon'n gannye Onorab Arissol, wi tou bann ki pe lev lanmen la - Monthly, e ankor enn fwa si bann *leaders* i prefere pour koz a lafen pour *sum up*, zot largiman ava dan zot kote, nou a kapab respekte sa.

Si, - *ok*, tre byen. Bon nou'n tann 3 Manm sa kote isi, e donk mon ava envit Onorab Aglae pour pran laparol sa kote.

HON EGBERT AGLAE

Mersi Mr Speaker. Bonzour Minis avek ou *panel*, *Chief Secretary*, Mr Pool e Ms Bresson, tou Manm Onorab e tou dimoun ki a lekout.

Mr Speaker, dabor mon pour dir ki si ou ti aplik san – mon pa pe kestyonn ou desizyon ki ou pran Mr Speaker, me selman sa lalis ki ou'n fer ki ler i annan deba, i balanse lo de kote, i pli meyer e annou aplik li osi, pa zis dan sa lenstans, me enn pti pe partou dan nou travay Lasanble.

Mr Speaker, *Bill* Trezyenm Mwan Saler lamannman ki devan nou, i pa nouvo, ki i annan lamannman kot i konsern *Bill*. Depi ler mon dan sa Lasanble, trezyenm mwan saler nou'n vwar bann diferans

lenstans, depi ler sa *Bill* Trezyenm Mwan ki ti vin anba nou ladministrasyon ti vin an fors e ki apre in annan sanzman dan ladministrasyon.

E ladministrasyon ozordi ti fer serten lamannman osi lo sa *Bill* par sa serten sityasyon. Me sa ki nou, lo sa kote latab nou pe vwar ozordi, se en lot kalite *U-turn*, ki pe ganny fer lo kote trezyenm mwan saler, e osi bann kondisyon ki zot pe met ladan, pour bann kalifikasyon kot i konsern si ou pour gannye, si ou pa pour gannye.

Mwan mon rapel poudir letan bann diskisyon sirtou dan letan Bidze lannen pase, kot trezyenm mwan saler kan nou ti'n mansyonnen lo sa kote, Speaker ti met en lord ek nou. Non! Pa pour nonmen konmsi, ti en parol ki nou pa ti devret pe nonmen, ti arive sa - mon pa pe koz lalang ti arive.

Ozordi *Bill* in vini nou kapab koz lo sa *Bill*, pou vwar lo ki fason lamannman pour ganny enplimante e ki bann kondisyon ki osi atase avek. Be letan mon pe regarde Mr Speaker, lo komansman nou, nou ti dir trezyenm mwan saler i en saler ki ou gannye apre ki ou konplet 12 mwan dan travay, se sa son realis par deryer sa. Apre 12 mwan ou'n

travay, ou ganny peye en trezyenm mwan.

Be dan letan ki ti annan moman difisil Mr Speaker, Gouvernman ti vwar li nesese pour anil sa, e ki nou, nou ti dir lo kote US, e kanmenm 50poursan donnen, akoz Seselwa ti pe pas atraver difikilte, dan sa problem ki nou ti ladan e pour fer de bout zwenn, sirtou ler ariv lafen lannen, i difisil pour bokou fanmir Seselwa e i ankor difisil pour plizyer fanmir Seselwa.

E a sa moman letan lot kote latab, pa ti donnen sa sipor pour sa arive, me apre ki nou ti vwar zot ti vini, lannen pase, ti vin avek sa 50poursan ki nou, nou ti pe demande dan lefase.

E la zot in dir nou poudir rezon se ki keksoz la zot kapab mete, lekonomi pe fer ase byen li menm li ki pe fer byen, zot kapab donn sa 50poursan e nou, nou ti santi poudir si nou pe fer byen, be donn tou dimoun son 100poursan.

Akoz i annan en sakrifis ki zot in fer bokou zot travayer pandan sa letan pandemik e nou santi poudir zot merite - sirtou bann ki ti dan bann servis esansyel, zot ti merite zot 100poursan e ankor enn fwa, lot kote latab pa ti agree avek sa.

E an menm tan zot ti vin avek zot performans, sa 50poursan se ou a garanti 50poursan, lot 50poursan i baze lo sa performans ki ou'n fer. Be ki nou ti vwar arive Mr Speaker?

Akoz nou, nou ti santi e nou ti konnen poudir ladministrasyon pa ti ankor pare *fully*, pour li kapab enplimant sa, akoz ti annan bann lezot prosedir entern ki bann departman i bezwen fer avek sa dele letan ki zot ti pe gannnen.

Mon krwar ti forse 3mwan-4 mwan pour zot al fer tou sa travay, pour zot kapab vin avek en bon rezilta pour baz sa kalifikasyon sa lot bout 50poursan ki pa mandatwar.

E lafen lannen ki nou ti vwar? I annan departman pa ti arive fer sa bann travay pour kapab *assess*, sa ki nou dir parey nou dir pour fer sa evalyasyon lo performans son travayer. Akoz depi lannen komansman sa travay konversasyon ti'n merit ganny fer, i pa'n ganny fer e ou bezwen fer li dan milye semen ki vin en *issue*.

E la plizyer departman Minister mon konnen ti *rightly* zis *come up* avek en sif, e i annan ti donn 100poursan e i annan ti ganny kriye ti ganny

demande, akoz ou'n donn 100poursan, kan ou sipoze donn 50poursan, garanti e 50poursan lo evalyasyon performans.

In arive sa. E la osi ki anmenn mwan lo en pwen enportan se dan *Mid-year Review* letan zot anmenn Bidze, nou'n vwar poudir gran parti *saving* ki Gouvernman in fer i annan pour fer avek sa lot 50poursan, ki pa'n ganny peye dan trezyenm mwan saler.

E pour mwan Mr Speaker, e pour Lepep Seselwa ki pe ekoute, mon pa pe koz lalang mon pa pe koz manti, i fe – eski i annan en *fairness* dan sa ki'n arive? Eski zot satisfè lafason ki sa trezyenm mwan pe ganny enplimante ozordi, e sa ki pe vini osi ki pe vini osi ki zot pe al amande la?

La Mr Speaker, nou koman politisyen dan sa Lasanble, nou annan en responsabilite anver sa pep, sa ki'n met nou la. Mon pa kapab reste trankil lo sa ki'n elekte mwan. Akoz i annan i dir mwan nou bezwen kontinyen koze lo sa bann size.

Fas a bann moman difisil, nou'n vwar Gouvernman, L'Egzekitiv, ki li i kapab donn son lekor bann gro sonm larzan, bann *allowance*, wi! (Mon pa pe gat deba mwan, i en

realite) ki mannyer zot, zot in kapab pran, ki letan ler nou ti dir be donn zot, zot 100poursan zot pa ti kapab donner!

Apre ou vin dir mwan nou fer *savings*, *savings* lo larzan Lepep *taxpayers money!*

Konmsi sa i pa en rezonnman dan zot latet sa pour zot reflesir lo la? E la Mr Speaker, ankor nou pe vwar bann lenstans kot menm yer atraver *PNQ*, i annan size ki pa bokou i kontan, me selman i en realite ankor en lot laranzman pe ganny fer.

Nou, nou bezwen koman politisyen rezonnab. Si nou anvi benefisye, nou bezwen osi get sa pep, sa pep osi i bezwen benefisye atraver sa ki li i travay pour li gannyen. E pour mwan Mr Speaker, nou ankor annan en kantite travay ki bezwen ganny fer.

En pwen ki mon anvi touse dan sa *Bill* se sa size *pro rata*. Lo kote servis piblik sa i konsern Gouvernman, i fasil pour zot enplimant sa. Me letan i vin *private sector*, i en *issue*, servis piblik i ganny finanse atraver *taxpayers*, servis prive li i bezwen *run* en biznes pour li zer reveni atraver sa servis ki i fer dan son biznes.

I napa garanti menm si i kapab fer en *forecast* reveni, nenport evantyalite i kapab

annan serten sanzman dan son reveni biznes.

Sa ki nou apel son *cashflow*, tandis ki pour Gouvernman li letan i pe fer son prevansyon, byensir pa tou ki san poursan me selman i pour anmase son larzan *tax*.

Prezan si ou pe dir mwan poudir ou pour pey *pro rata* pour en dimoun ki'n fek komans travay Zanvye ki apre dan Zen i deside kite, fek antre byen, ou pey li *pro rata* lo trezyenm mwan saler li, trezyenm mwan i konsern pour sot 12mwan li en, ou pour pey li sa *pro rata*.

Eski zot in fer restriksyon osi lo si sa pa vin en palto fann deryer dan li menm kot en dimoun i deside, mon pou travay pour 6 mwan pour mwan ganny sa lot bout?

Akoz zot pa'n set en standar? Poudir gete, pour ou kalifye *pro rata*, fodre ou'n pas sa barenm 1an, apre 2an, 1an edmi si ou anvite kite la ou ava kalifye pour sa.

Akoz i pour annan serten konsern kot i konsern *the private sector* lo sa size, e mon ti a kontan konnen aköz mon pa'n vwar zot pe konsilte sekter prive lo sa, lo sa *issue pro rata*.

Mon pa konnen, zot a dir mwan taler si zot in fer, e mon ti a kontan konnen ki *outcome*

ki *private sector* in fer? Si *SCCI* osi in mele ladan ki son propozisyon?

Parey mon'n dir lo kote servis piblik Gouvernman i fasil li be sa lot. En lot pwen Minis ou'n nonm size *grievance* ankor, ozordi Seselwa e lo zot kote departman, mon ti a kontan konnen ki kantite *grievance* ki zot in anmase?

Akoz en kantite ki'n ganny peye, apre sa 50poursan letan zot al kot zot *supervisor*, sepa zot anplwayer sa ki responsab zot, pa kapab donn li en bon rezon aköz, mon donn sa. Pa kapab! Poudir be aköz mon'n ganny zis sa pti bout la, ou pa'n donn mwan, mon pa'n malad mon'n vin travay, ki rezon?

Akoz i annan en kantite varyasyon nou'n vwar. Aköz dimoun ki vin ek mwan avek son prop *pay slip* ki mon'n vwar sa. Ti annan tro bokou gran varyasyon. Prezan mon ti a kontan konnen be ki mannyer zot kalkil sa lo sa *appraisal*?

Eski i fer par malis? In annan size politik ladan? Eski in annan tousala? Mon krwar i enportan nou fer sa bann refleksyon.

Lot pwen ankor Mr Speaker, i yer nou'n koz lo size kou lavi, e kou lavi li menm li, menm si Minis pa'n tro kontan lo serten keksoz ki mwan mon

ti dir, i enportan pour nou kapab balans malgre nou dir lenflasyon i redwir, me lendikasyon i montre nou, lo kote *spending power* nou dimoun ozordi, i vreman limite. E se sa ki nou, nou demande sa 100poursan.

Letan nou, avek nou Seselwa ki nou dir nou travayer, e dayer Mr Speaker, mon kontan Onorab Zialor ou'n koz *bonne bouche* konmsi, ou'n koz for, travayer Seselwa nou deryer zot, nou lot - be pa ti dir tousala ler nou ti pe lager pour donn 50poursan dan sa letan! Pa ti koze for koumsa person!

Ozordi mon kontan zot pe sorti. Nou, nou'n reste avek nou prensip, ki tou dimoun i bezwen ganny 100poursan, e mwan mon *still* ankor krwar ladan ki kapab ganny fer sa 100poursan si Gouvernman in arive dir, in fer *savings* savedir sa larzan ki i ti pour pey zot, ti la me ki zot pa'n gannyen.

Si nou anvi travayer dan servis piblik sirtou, i kontinyen vin performan, nou bezwen kontinyen annan bann reminerasyon ki rezonnab pour zot.

Nou pa kapab kontinyen ganny dir espere pour napa nouvo *Scheme of Service*, ouswa nou ankor pe travay lo *Scheme of Service*, *overtime* ki ganny

peye tar, bann *allowance* ki pa konplet, i arive ozordi.

Ki ou ekspekte en travayer ki leve bomaten, motive konmsi pour li kontinyen donner, donner, donner dan son karyer ki li in swazir pour fer, me letan i ariv kot i konsern son reminerasyon, ou pe zwe avek li ou, ou pe fer li monte parfwa demen tanto?

MR SPEAKER

15 minit Onorab.

HON EGBERT AGLAE

I fini son pti letid pour donn li sa pti *increment* ankor en lot letour i fer li, pour li ganny sa pti R500, sa R1000 pour li vwar sertifika in ganny an plis ankor.

Me tousala mon krwar, i bezwen ganny vwar. Akoz Gouvernman pa kapab kontinyen vin avek - ozordi i dir sa apre i fer *U-turn*, i vin avek en lot.

So Mr Speaker, mwan mon pa sitan, sitan konvenki ek sa lapros ki pe ganny pran e mon pour gard mon rezervasyon. Mersi.

MR SPEAKER

Mersi Onorab. Mon bezwen reviz letan ki mon kapab donner, mon annan 22 Manm ki'n lev lanmen pour koze e si

nou pran 15 minit, i pour pran nou plis ki 5 erdtan pour koze.

Donk mon pour demann Manm pour limit zot pour 10minit, me petet sa ki mon kapab fer se petet donn - bann de *Leaders* zot 15minit, pour zot kapab fer sir ki zot kouver pwen ki zot anvi, e nou a sey kapab fini nou biznes a tan dan lazournen ozordi.

Onorab Bistoquet. Onorab Bistoquet in sorti mon a pran - Mon demann *ok* - i annan en long lalis Manm ki'n lev lanmen, so mon konpran si Manm in lev lanmen, solman letan ou'n lev lanmen, ou devret reste dan lasal. Mon a pas laparol Onorab Andy Labonte.

HON ANDY LABONTE

Mersi Mr Speaker. Bonzour Mr Speaker, bonzour Minis avek ou *panel*, bonzour tou koleg Onorab. En bonzour spesyal tou travayer Seselwa espesyalman bann zabitan La Riviere Anglaise.

Mr Speaker, tou le bomaten ler ki mon leve, premye keksoz ki mon fer se ki mon lev mon lizye anler mon remerci Bondye, mon remerci Bondye pour lagras, kouraz lafors kouraz ki'n donn mwan, ki'n donn mwan en nouvo zour.

E san li nou pa kapab al okenn par, so mon pou komans

mon lentervansyon par lir Proverb 19 vers 24, ki dir,

“Sa enn ki pares i ploy son lanmen dan pla me i pa anmenn son lanmen - i pa anmenn son lanmen kot son labous.”

E Proverb 13, vers 4 i dir ou, “Dezir sa enn ki pares pa zanmen abouti, me sa enn ki travay dir i realiz tou sa ki i anvi”.

Mr Speaker, rezon ki mon dir sa, aköz la mon anvi pran sa loportinite pour mwan felisit tou travayer Seselwa. Ou konnen dan sa pei Sesel, malgre ki nou annan en konseps ki par ler nou dir ki Seselwa i pares, me mwan mon poudir Seselwa i travay.

Ou konnen mon toultan pran legzanp lo mon paran. Mon paran i en dimoun, mon manman annefe ensi byen ki mon papa i de dimoun ki montre mwan ki savedir travay dir, e mon remersye zot pour sa.

E mon osi rekonnèt tou zabitan ki leve tou le bomaten pour zot travay, pour zot travay, pour zot travay pour zot ede konstri sa pei.

Mr Speaker, ler mon get sa *Bill* ki devan nou, mon pa pou long vreman me selman i enportan ki mon donn mon sipor.

Mon donn mon sipor akoz ler nou pe koz lo trezyenm mwan saler, i en keksoz ki tou Seselwa i konsernen, tou Seselwa i konsernen akoz ou konnen, i gou ler a lafen lannen ou pe ganny en keksoz an plis pour anmenn kot lakour, pou ou kapab ed ou fanmir, pour - ou konnen fer zot zwaye.

Me selman i esansyel ki nou kit, nou kit antet ki - ou konnen pa nou tou ler nou dan en letablisman oubyen dan en sekter ki nou devoue pour nou travay.

So, i enportan ki nou toultan fer nou pep konpran poudir i enportan ki bomaten ler ou leve ou aswar nenport ki ler, tou responsabilite ki ou annan ou donn tou, ou donn tou sa ki ou annan ki finalman ler ou pe resevwar sa benefis ki vin avek, ou santi poudir ou'n transpire e vreman ou'n kontribye e ou'n ede fer en diferans.

So avek sa nide ki mwan Mr Speaker, ki mwan mon pour siport toultan, mon pou toultan siport travers Seselwa e lo sa baz kot i - i dir ki i enportan ki i met sa lanfaz si oule, lo travay dir e pozitivite osi dan travay.

So, mon kontan ki ler Minis in prezante sa lannen in plizoumwèn pran kont bokou

bann laspe ki bann travayer in fer sorti dan lepase.

Akoz nou ti pe vwar ki ti pe annan en labi, lo kote bann anplwaye, dan serten sirkonstans - pa tou me serten - ki nou ti pe tant pour nou pran en travayer.

Akoz sa in arive mwan menm mwan kot mon'n anvoy serten endividi kot pour travay dan diferan letablisman - ou konnen zot met sa dimoun travay 3 mwan probasyon, zot *extend* son probasyon ankor 3 mwan.

Me *in the end* zot - zis zot decide pour zot pa anploy sa dimoun, me solman i dir ek mwan poudir sa dimoun i travay li, i travay byen, me solman pour nou pa pey sa trezyenm mwan saler, so apre 6mwan nou zis decide pour nou fer sa dimoun arete, pran en lot travayer.

Me mon krwar ler mon pe get sa *Bill*, i pou pran kont poudir, malgre ki ou pa'n fer lan konplet, me ou pour kapab ganny serten benefis lo ou kontribisyon ki ou'n fer, akoz si en travayer i travay dan en lakonpanyen pour lan, oubyen menm 9mwan, i montre ou poudir i annan keksoz produktiv ki'n fer.

Me byensir ki i kapab ganny rekonpanse lo baz ki

kontribisyon ki'n fer dan son letablisman li menm li.

Aprè la mon pou osi zwenn avek Onorab Romain parey in dir; ou konnen dan distrik mwan menm mwan, mon'n vwar bokou bann endividi ki lo sibstans, me zot fer en zefor, zot fer en zefor ekstra pour zot leve, pour zot ale travay avek bi ki zot kapab kontribye ede, ed zot fanmir e mon poudir zot kontinyen.

Me par kont i toultan annan en group ki pa pe fer sa zefor ekstra. E la mon ti a kontan dir, ankouraz zot pour vwar rezondet dan travay dir pour, pour ou fanmir, pour ou pei an zeneral.

Ou konnen, Mr Speaker, bokou fwa, bokou fwa nou tant pour nou fer politik avek ler i vin lo trezyenm mwan saler.

Me mon pa krwar poudir i en keksoz ki nou koman bann politisyen ki la dan Lasanble nou merit servi sa pour nou fer politik akoz mon krwar i en keksoz ki sansib, i en keksoz ki nou merit met valer plito ankouraz, ankouraz nou Seselwa, pour vwar rezondet deryer travay dir ki finalman zot kapab ganny en rekonpans a lafen.

Mr Speaker, ou konnen yer nou ti diskite - ti annan serten keston ki ti vin dan

Lasanble e ozordi ler mon pe get sa ki nou pe diskite avek, mon vwar li i annan etrwat relasyon avek, avek kanmarad.

So, mon krwar i toultan enportan ki nou get meyer pour nou sitwayen, pour nou Seselwa, pour nou dimoun an zeneral.

So Mr Speaker, parey mon'n dir mon pa pour long. Me selman mon pour termin mon lentervansyon. Malgre sa vers i plizoumwèn an relasyon avek rwayonm Bondye, me mon krwar ki i enportan ki koman bann endividi, koman bann dirizan, nou osi pran kont petet sa vers sa i Sen Matye vers 20, i Sen Matye sapit 20 vers 1-16.

So, mon pa pou lir li an antye, me solman si nou fer referans nou pour konpran lo ki i pe koz lo la, malgre ki li i fer referans lo rwayonm Bondye, me i enportan ki nou rekonpans tou endividi ki kontribye dan lekonomi. Mersi Mr Speaker.

(comments off-mic)

MR SPEAKER

Mersi. Silvouple, nou ava evite fer komantr avtravèr lasal. Onorab Bistoquet mon a donn ou laparol.

HON ROSIE BISTOQUET

Mersi Mr Speaker. Bonzour Mr Speaker. Bonzour tou Minis avek ou delegasyon, bonzour tou nou Onorab. Mr Speaker, mon ankor petet dan sa kanpany 'Redwir Obesite, Bwar Bokou Delo, *Visit Comfort Room Souvan*'.

Mr Speaker, trezyenm mwan lapey 2023 i en peyman ekstra, ki travayer i gannyen pour fer sir ki zot saler i ganny - zot benefis zot saler. Sa i en rekonpans ki Gouvernman i trouve, ki travayer i donn tou dan zot travay, bann ki anmenn produktivite dan zot landrwa travay, ki sirtou ede dan lekonomi Sesel.

Wi Mr Speaker, travayer i donn tou, zot merit ganny sa ki zot merite, sa sistenm *performance-based appraisal* i en bon sistenm akoz sa ki kree konpetisyon - i kree konpetisyon ant bann travayer pour donn zot mye, pour zot kapab ganny plis benefis ki zot merite.

Dapre nou kiltir, toultan granmoun ti dir, ler nou ti pe grandi ki nou bezwen travay a 'lasyer de nou fron', pour nou ganny nou rekonpans.

Sa i vedir nou bezwen travay dir pour ganny nou dipen e ozordi nou bezwen travay dir pour nou ganny nou dipen.

Sa i fer mwan mazine Mr Speaker, mon ti fer en konversasyon avek en group travayer e nou ti fer en konversasyon atraver sa trezyenm mwan saler ki sa - sirtou anba sa *performance-based appraisal*.

Mr Speaker,, zot ti dir mwan ki i en bon sistenm, akoz dan lepase en kantite zot bann koleg ki trenn lipye ti osi ganny trezyenm mwan saler parey zot menm - pour sa bann travayer ki trenn lipye zot menm zot ti vin an retar, zot menm zot pa ti vin boner travay; zot ti sorti boner avan ler travay i fini, zot menm zot ki al tou lanterman Sesel, zot menm zot ki pran plis ki en 1 erdtan ler zot ganny zot *lunch break*, zot menm zot, zot vin travay - pa vin travay sirtou dan Lendi, zot menm zot, zot pran plis *sick leave* e lezot koleg i bezwen kouver zot laplipar ditan.

Alors Mr Speaker, sa group travayer ti santi zot enn pti pe pa tro konfortab e zot santi poudir sa Prozedlwa ki Gouvernman in anmennen, sirtou sa enn nouvo avek sa bann amannman, kot tou travayer ki travay dir, i kapab ganny rekonnet pour zot zefor eksepsyonnal.

Mr Speaker, sa group travayer ti osi ganny resorti ki

sa *performance appraisal* i kree en lanvironnman konvenab, pour tou travayer, sirtou bann ki merite ganny sa rekonpans.

Zot ti osi fer resorti ki sa trwazyenm mwan saler i ede pour anmenn plis larises, kot lakour, kot zot zanfana.

Mr Speaker, sa lamannman “*pro rata*”, i osi annan son merit akoz pour bann travayer - ki i annan en group travayer ki pa'n konplent ditou, me i annan en bann ki konplent ki zot ti'n dir ki zot tre apresye akoz dan lepase en kantite travayer ti konplent, ki parfwa i pa zot fot akoz zot in antre travay lo komansman lannen, sirtou Zanvye.

Me menm si zot in ganny anploye, par egzansp dan mwan Mars ouswa Avril, zot santi ki zot in donn tou e alors zot santi ki zot osi zot devret ganny sa rekonpans, e zot devret ganny rekonnet osi pour zot zefor ki zot in fer.

Mr Speaker, tou travayer Seselwa i apresye sa Prozedlwa akoz i kouven tou kous travayer menm si ou ganny anploye a plen tan, e sirtou letan ou ganny anploye a plen tan, pour tou bann ki ganny anploye a plen tan dan tou sekter Sesel, swa ou dan servis piblik, swa ou dan sekter prive, swa ou dan parastatal, swa ou dan ou

lorganizasyon non gouvernmental.

Mr Speaker, mon pou retourn kot sa group travayer, sa group dimoun ki mon ti ganny en konversasyon avek zot, zot in fer resorti ki sistenm *performance based* i ganny byen - i devret ganny byen aplike par tou bann *HR*, ou *supervisor*.

Akoz i annan serten mekontantman parmi bann travayer, kot *supervisor* i fer serten lapreferans ler *appraisal* i ganny fer, sirtou sa *supervisor* - si sa *supervisor* i dakor ouswa i dalon avek serten travayer. Mr Speaker, petet Minis sa i kapab ganny adrese avek tou bann *HR* dan Sesel.

En lot size Mr Speaker, mon pa pou kourt, en lot size ki devret pran konsiderasyon, se i annan en serten konfizyon parmi bann travayer ki ganny transfer, sorti swa dan en *unit*, ouswa pour al dan en lot *unit*, ouswa sorti dan e departman, ou Minister pour al dan en lot departman ki zot in ganny transfer, zot in ganny dir zot transfer.

I annan sa group travayer ki'n fer resorti, ki zot *supervisor* kot zot ti sorti pa ti oule fer zot *appraisal*. Zot ti ganny dir kot ou pe ale i a fer, sa *supervisor* i a fer. De lot kote ler zot in ganny

transfer dan sa nouvo landrwa travay, zot *supervisor* i fer resorti ki zot fek vini, e zot pa'n konn zot performans kot zot sorti.

Alors Mr Speaker, sa bann travayer zot santi zot tre kwense, alor mon pe rekomande Mr Speaker, ki sa i devret ganny adrese pour evit travayer tourn an ron.

Mr Speaker, mon pa pou tarde avek sa de pti mo avan mon terminen, me mon pour felisit tou bann travayer Seselwa pour kontinyen travay dir e rekonpans i toultan la devan zot.

Avek sa de pti mo Mr Speaker, mon pou siport sa Prozedlwa peyman trezyenm mwan saler 2023, 24, 25 pour tou travayer Seselwa. Mersi.

MR SPEAKER

Mersi Onorab. Mon a pas laparol Onorab Uranie ou apre pour koze?

HON ROCKIE URANIE

Mersi Mr Speaker. Bonzour tou koleg Onorab, bonzour Minis avek ou delegasyon. Mr Speaker, nou osi isi anndan nou bann travayer, alors nou osi nou bezwen fer sir nou vini, nou delivre, nou diskite bann keksoz ki pour vremen anmenn benefis pour travayer Seselwa.

Mwan mon'n en travayer dan Minister Ledikasyon pour bokou lannen e mon'n travay vremen dir mon vwar kot bokou ansennyan osi i travay vremen, vremen dir.

So apard bann ansennyan nou annan bann travayer Lasante, osi ki fer bokou dan zot travay. Mr Speaker, tou travay i enportan, tou travay i annan son merit e alors mon krwar tou travay i bezwen ganny rekonpanse.

Pour mwan sa zafer trezyenm mwan, i pa devret vin lo en baz parey zot in met li la, pour mwan i trezyenm mwan vi ki dan en lannen ler nou get kantite zour ki annan, pour mwan en trezyenm mwan i devret vin en saler ki otomatik lafen lannen, pour ed sa dimoun pandan lannen ki'n travay dir.

E sirtou pandan Desanm kot nou annan bann parey *Christmas, New Year*, pour sa dimoun i kapab petet apre en lannen ganny sa larzan pour li ed li, a lafen lannen fer en pe, bann depans kot li ki petet zis ek sa saler tousel ki i ti pe gannyan dan le mwan, i pa'n kapab arive fer serten keksoz kot son lakour.

Mr Speaker, pour mwan ler mon get sa ki zot in vin avek la, i montre pour mwan in

bezwen annan en *failure* par la. I bezwen annan en lenkonpetans par la, ki'n fer ki sa sistenm pa'n marse. Ki prezan zot pe bezwen *extend - extend* li.

mon krwar in bezwen mank serten keksoz ladan ki'n fer ki zot pa'n kapab enplimant sa ki zot ti anvi fer, aprezan zot anvi gamble ki i marse pandan sa 3 mwan, sa 3an (*sorry*) ziske 2025, pour zot kapab enplimant li lafen 2026.

So mwan mon krwar sa i pa en keksoz ki byen, akoz travayer i leve toulezour, i al debourye, sakenn i annan son pwen for ek son pwen feb, so-Me solman dan travay, nou konplimant kanmarad pour anmenn rezilta ki devret.

Me a lafen lannen pour ou dir mwan nou pe fer konpetisyon, pe ankouraz isi, pou ankouraz laba, pour mwan sa i zis bann, bann fason pour nou - ou konnen ser Seselwa ler kot zot saler i konsernen, ser zot ler pour donn zot enn pti benefis.

Pour mwan mon vwar li koumsa. Pour mwan mon vwar sa i devret en keksoz ki nou donn zot a lafen zot lannen travay.

Mr Speaker, e mwan mon ler mon asize mon reflexir konmsi, ki mannyer nou pe -

Gouvernman i met otan zefor lo sa zafer trezyenm mwan ek tou sord kalite *clause*, tou kalite keksoz ladan, pour mwan i pe - mon ti a voudre i ti a met otan zefor kot i konsern pri lavi, parey i pe mete lo sa zafer trezyenm mwan.

Konmsi ler mon get trezyenm mwan ki mannyer, zot pe lager, pe rod tou fason, tou bout isi, tou bout laba, si zot ti met otan zefors dan pri lavi, pour mwan sa ti ava fer plis sans pour nou bann dimoun la ater deor, sirtou dimoun lo mon zil ki pas atraver bokou difikilte avek koud lavi.

E zis parey an regardan yer ler nou'n vwar kot *VP* ti bezwen vin reponn kestyon konsernan bann gro logmantasyon ki zot ti pe al donn zot lekor pour - me selman pour bann travayer nou bezwen toultan pe tike, pe rod fason ki mannyer pour retire avek sa travayer.

Pour mwan mon krwar sa i mank, i mank, i mank en valer, en valer responsabilite anver Gouvernman, kot i konsern nou bann travayer, nou bann travayer Seselwa.

Pa nou ki ti dir isi lo sa kote latab poudir travayer Seselwa i pares, pa oule travay, pa oule isi, pa oule laba.

Sa in sorti toultan lo lot kote latab, ler zot koze zot dir Seselwa i pares. Seselwa pa le travay e finalman mon krwar zot in sey anmenn sa dapre zot pe - pour sey fer Seselwa travay kan nou tou nou konnen poudir Seselwa i leve tou le bomaten i al debourye, i eskente sirtou La Digue bann dimoun i leve i al debourye, eskente pour zot ganny, ganny zot dipen pour sonny zot fanmir.

Lo mon zil i annan apepre en 100tenn dimoun ki travay dan Gouvernman, e lamazorite dimoun i sorti dan prive. E bann prive mon krwar zot parey mon dir i annan en *failure*, kot bann prive zot osi zot pa'n ganny sa gidans ki mannyer vremen pour fer sa bann *appraisal*.

E alors bann prive in donn sa 50poursan dapre dir, apre zot in deside donn sa lot 50poursan lo en baz bonous, lo en baz bonous koumsanmenm.

So, Minis li menm li in dir ki preski tou bann landrwa ti pey 100poursan, *then* mon pa vwar aköz sa pa kapab kontinyen, donn sa bann dimoun zot san poursan, *ok*?

E menm dan Gouvernman si zot ti pe vwar larzan pour donn bann gro logmantasyon, ki menm a lafen zot manda 5an nou ti pour vwar

en bann ki ti pour tous bann gro, gro sonm, parey 3 milyon, me petet si nou ti pe vwar larzan pou fer sa, mon krwar nou kapab vwar larzan pour met dan sistenm, pour ed - pour ed nou bann dimoun.

So alor pour mwan Mr Speaker, mon pa pe tro, tro dakor avek sa ki zot pe dir mwan la. Mon ti a kontan ki nou mazin an premye lye aköz nou ti vin avek trezyenm mwan pour nou bann dimoun.

Annou pa fer nou bann dimoun soufer aköz pri lavi, i deza o, so sa mon krwar trezyenm mwan ti a vin en fason pour ede soulaz nou bann dimoun, ki pe travay la deor; nou bann dimoun isi menm la anndan kot sa Lasanble, bann travayer Lasanble, bann sekirite.

Zot ti ava vwar lafen lannen poudir tou sa travay zot i fer, nou pa vwar zot pe, aköz enn pti *mistake* isi, enn pti laba, zot vwar zot pe ganny pini, zot pa pe ganny zot saler ki zot, ki zot merite.

So Mr Speaker, mon ti a kontan petet ki zot revwar sa bann lamannman, ki zot in vin avek, e retourn keksoz parey ti ete. Aköz letan *COVID* nou'n vwar, i annan lannen ki bann - nou pa'n ganny ditou.

I annan bann *teachers* ki'n perdi zot *long service*, e tousala mon krwar ti ava en fason pour nou - annou rann zot, annou rann *back* zot larzan trezyenm mwan parey ti ete.

Mwan mon pa pe dakor senserman avek sa sistenm, kot nou bezwen *appraise* sa bann dimoun, apre en lannen travay dir ki zot in performen dan zot landrwa travay.

So avek sa de pti mo Mr Speaker, mon pou swet tou bann travayer kouraz, kouraz apre en lannen travay pour kontinyen donner dan lanplwa.

E mon ti a profite osi petet vi ki La Digue napa bokou lanplwa, petet vi ki nou annan sa kantite drenaz, ki toultan mon'n deryer zot pour donn kontra bann zenn, donn kontra petet Gouvernman ti a ekoute pour eseye vin avek bann kontra pour donn bann zenn pour debourye, akoz napa ase loubraz lo nou zil, pour nou bann zabitan. Mersi Mr Speaker.

MR SPEAKER

Mersi Onorab. Bon, mon ava envit zot pran en poz la, en poz lasante an se moman. Nou a rebran deba 11er.

(BREAK)

MR SPEAKER

Nou a rebran deba. Mon a pas laparol Onorab John Hoareau.

HON JOHN HOAREAU

Mersi Mr Speaker. Bonzour Mr Speaker, bonzour Minis ek ou lekip e tou dimoun a lekout ki pe sivre travay Lasanble ozordi. Mr Speaker, Prozedlwa ki devan nou, pe amann Lalwa Lanplwa pour permet peyman trezyenm mwan saler lo baz 50poursan mandatwar e 50poursan lo baz merit, atraver *performance management appraisal*, pour lannen 2023, 2024 e 2025.

I osi annan provizyon pour eksplike, ki fason en dimoun i ganny trezyenm mwan saler lo baz *pro rata* e ki bann ki pa pour kalifye en trezyenm mwan saler.

Dabor Mr Speaker, mon le felisit tou travayer Seselwa, tou bann ki travay dir, tou bann ki leve bomaten, e ler zot leve zot annan en sel bi se pour travay pour fer sa pei progres a lavan.

Mr Speaker, malerezman sa size in en size ki'n ganny bokou politize, sa size trezyenm mwan saler pour senpleman ganny *mileage* politik. Nou tou nou konnen, ki de moman nou koz lo bann size parey larzan e saler, i vin en bann size sansasyonnel ki provok divers lopinyon.

I annan ki krwar ki nou devret donn san poursan mandatwar e sa se plizoumwenn pwennvi Lopozisyon aköz depi bomaten nou'n ekout zot, zot pe zwe sanmenm sa lakord en sel - sanmenm sa gitar en sel lakord parey nou kontan dir zot, en pozisyon ki nou, nou santi i iresponsab.

Akoz premyerman i annan bokou travayer ki koze ki dir ou, be i pa normal si nou, nou pe travay dir nou pa pe trenn lipye nou pe donn tou, e bann ki vini tou le Lendi, aköz in kraze *weekend*, i pran konze dokter Lendi, ki trenn lipye dan travay i pa reponn telefonn, e li i pour ganny menm kantite saler a lafen lannen avek mwan, ki travay dir ki pe donn tou.

Mr Speaker, sa pozisyon iresponsab, nou vwar menm dan Lasanble. I malere poudir bann ki dir i pe travay dan kote Seselwa, parey Onorab Uranie in fer resorti, ki dan kote Seselwa i pe travay dir, me selman nou vwar li ek son bann dalon ki sorti dan Lasanble ler travay i annan pour fer!

(APPLAUSE)

HON JOHN HOAREAU

Ladan menm, lafen dimwan i pe pran menm parey, a lafen lannen i pe pran son gratwite

menm parey. Mr Speaker, nou'n vwar poudir Onorab Aglae ki'n vini, in dir nou poudir lo in annan propozisyon pour gro logmantasyon lo politisyen.

Mr Speaker, mon krwar poudir sa in vin en kalite rimer, en kalite fo propagann ki nou bezwen enn fwa pour tou met li dan en bin. In annan serten propozisyon, wi! Me selman *Cabinet* pa'n zanmen aprouv nanryen. E se sa ki zot pa pe kapab dir Lepep Seselwa.

Propozisyon nou kapab fer ek nenport ki kalite propozisyon, me a lafen dizour i pour bezwen vin dan en Lalwa, i pour bezwen vin la kot sa Lasanble, e nou ki bezwen vot lo la!

Mr Speaker, sa bann politik bon marse pe zis la pour retir latansyon lo en parti politik ki'n *expire*, ki napa nanryen de plis pour li anmennen.

Ki pa kapab anmenn en propozisyon pozitiv dan sa Lasanble ozordi. Zot sel largiman se donn 100poursan irespektiv si ou travay, si ou pa travay, kote ou pour gannyen sa larzan pour ou donner si sa dimoun pa pe prodwi.

So. sa bann kalite largiman koumsa pour nou i pa fer sans. E pour bokou Seselwa la deor zot vwar kler, e zot

konnen poudir sa largiman pa fer sans vreman.

Mr Speaker, mon senserman krwar ki en trezyenm mwan saler i ed en kantite fanmir pour fer de bout zwenn a lafen Zanvye. Sa mon 100poursan krwar ladan.

Me selman sa ki nou bezwen konpran, se ki ou bezwen *earn it!* Ou bezwen travay, ou bezwen fer sir ki ou donn tou pour ou kapab ganny sa trezyenm mwan saler an antye.

Mr Speaker, i annan bokou dimoun, ki travay tre dir osi pour amelyor lavi son fanmir e son lavi, me malerezman dan son landrwa travay napa en striktir apropiye, oubyen en striktir ki'n byen organize, pour kapab mezir son performans dan en fason zis. E la mon pou repete dan en fason zis.

Alor sa bann travayer, sa group travayer dan sosyete, i santi zot dezavantaze e dezapwente. Mon'n fer serten kour dan mon letid, ki'n permet mwan konpran tre byen ki si sa *performance management*.

E parey serten Manm in kapab fer resorti oparavan, *performance management* devret baze lo en *appraisal* ki ganny fer detanzaot. I pa devret

reste en keksoz ki ganny fer a lafen lannen.

E sa i vreman enportan, akoz si ou annan en striktir kot ou pe donn en serten *reward*, en serten *incentive* ou travayer, i bezwen osi annan en striktir ki pour ed li ariv kot sa lobzektif. Sa i vreman enportan.

E ladan ler ou pe gete mon pe fer en pledwari spesyal ki nou *Public Service College*, ki parey nou konn li koman *Guy Morel Institute*, ki i kontinyen, mon konnen in komanse sa louvraz me i kontinyen, i promouvwar plis *training*, pour bann travayer *HR* sirtou dan kad travayer sekter prive, ki zot kapab a lafen dizour - annan en *performance management system* ki pour reponn bezwen zot bann travayer dan zot sekter.

I osi - mon osi krwar ki i devret annan serten *incentive* pour ankouraz bann lorganizasyon pour fer demars ver *performance management*.

Akoz ki nou vwar parey nou'n ganny dir oparavan, se zis 30poursan bann lorganizasyon ki servi sa bann *performance management model* ki zot in ganny donner, pour zot kapab donn en trezyenm mwan saler. Leres swa i pe donn tou *by default*

akoz i pa – zot napa en sistenm *performance management*.

So si dan sa ka nou vwar ki zis 30poursan nou Sekter Prive, ki pe fer sa, alor i nesese ki nou *incentivize* sa keksoz – par sa mon le dir par egzant akoz nou napa en serten rekognisyon a lafen lannen, pour bann biznes zisteman ki pe fer *performance management* dan sekter prive?

Annou donn zot serten piblisite, annou donn zot – valoriz zot ki lezot, bann lezot biznes menm pti ou gro i a kapab *emulate from that*, konmsi i ava kapab vwar zot pe kopi sa bann model, pour zot kapab fer pour zot travayer.

I annan osi bann biznes ki vwar ki sa prosedir *performance management* ki zot in ganny donner, sa model ki zot in ganny donner pour travay avek i enn ki enn pti pe *cumbersome*.

Menm lo kote nou menm koman bann Manm Lasanble, nou annan en model ki nou pe servi, pour nou evalye nou Clerk. E ler nou gete i enn pti liv apepre sa groser konmsa Mr Speaker, ki fer ki annan en kantite! Vreman en kantite striktir en kantite keksoz ladan ki ou bezwen evalye.

Alor ki nou, nou pe demande ki Lasanble pe demande ki nou ganny en

performance model ki en pe pli *less cumbersome*, ki en pe pli fasil pour servi, i enn ki kapab reponn bezwen lamazorite nou bann travayer dan Sekter Prive, oubyen dan sekter Gouvernman li menm.

Mr Speaker, parey mon'n dir, i annan osi bann pti biznes e bann pti kontrakter ki vwar li difisil pour pey en trezyenm mwan saler.

E la mon – apre ki mon'n lir en keksoz dan Nasyon ki mon vwar poudir *PS* in fer serten deklarasyon ki *ESA* pour annan en rol enportan pour zwe, mon ti a kontan ki dan son larepons petet i ed nou pour konpran pli byen ki rol *ESA* ver sa demars?

E osi mon ti a kontan petet, si zot ti kapab donn nou serten detay ki bann kour ki pe ganny organize pour zisteman ed bann sekter prive apre bann pti biznes pour zot kapab servi en sistenm *performance management* oubyen en sistenm *appraisal*?

Ki pour kapab permet zot travayer byen ganny evalye, byen ganny *appraise*, ki a lafen zot a kapab ganny zot sa trezyenm mwan saler an antye. Akoz se nou dezir pour vwar ki prodiktivite dan pei antye i monte.

E i nou dezir pou vwar ki tou dimoun osi i ganny en trezyenm mwan saler. Nou pa pe fer keksoz ki pour zis la me i *far reaching* person pa pour kapab arive. I pa devret ganny vwar koumsa.

I devret ganny vwar koman en keksoz ki aksesib, en keksoz ki travayer i kapab aspire pour arive avek serten zefor lo zot kote.

Mr Speaker, avek sa mon pou remersye ou.

MR SPEAKER

Mersi Onorab mon a donn laparol Onorab Porice.

HON DOYACE PORICE

Mersi Mr Speaker. Bonzour Mr Speaker. Bonzour Minis ek ou delegasyon. E tou bann Manm Onorab prezan. E tou dimoun ki a lekout. Sa Prozedlwa lo trezyenm mwan saler baze lo performans, mon pou vot lo la. Akoz mon par epou siport bann travayer dan Sesel, sirtou bann travayer lo Praslin e Zil Pros.

E la mon pou felisit zot pou sa bann bon travay ki zot fer pou zot zil. Administrate en sistenm performans, i ede pou anmenn travayer pou fer pli byen diran lannen. Alor mon sipli avek tou travayer, pou annou donn tou sa ki nou kapab, si vreman nou anvi

ganny nou *full* trezyenm mwan saler.

Nou konnen ki parfwa i pa fasil, sirtou si nou annan en anlwaye ki pa konpran nou. Me fodre nou montre li ki nou kapab. I zis parey travayer, serten travayer *Maison Du Peuple* ki pa ti ganny son 50poursan. E la ozordi nou pe demann pou donn 100 poursan.

Lopozisyon pa koz ditou lo la, zot pa'n pare pou fer refleksyon lo sa size. Zis zot pare pou koz mansonz.

Me mon swete ki bann anlwaye i fer zot travayer, i fer zot travay byen e zis. Akoz parfwa nou bezwen konpran nou travayer e donn zot tou sipor posib.

E la mon pou osi demann sekter prive, pou zot osi get dan *welfare* zot travayer. Akoz zot osi zot travay dir pou zot lakonpanyen. E zot ganny bann bon reveni pou zot kapab partaz avek zot travayer.

Mr Speaker, sa i fer mwan mazin enn de mon zanmi lo Praslin. Parey Josianne, Christianne, Daniel, Nelson, e lezot ankor ki travay ek lakonpanyen prive pou zot osi benefisyé.

Mon konnen ki i annan bokou nou travayer la deor pe fer zot mye e pe travay dir. Mon

felisit Minister Lanplwa ek Gouvernman, pou a ker pou revwar sa size trezyenm mwan saler baze lo performans pou nou travayer Seselwa, pou 2023, 2024 e 2025.

Sa i montre nou ki sa Gouvernman pe kontinyen get dan *welfare* nou pep, letan i santi ki nou pe ganny en pti pe plis reveni. Pou mwan, mon vremen kontan ler mon tann dir ki sa i annan travayer ki antre dan trwa kar lannen li osi i benefisyen.

Mr Speaker, mon pou dir ek travayer la deor se konsantre dan zot travay e aret ekout rimer ki sa 10 boutey rouz pe anmennen.

Napa okenn logmantasyon ki'n vin dan sa Lasanble, ki konsern bann Travayer Konstitisyonnèl. Menm si Lopozisyon, minoriter pe dir avek piblik la deor. Mansonz pa pou anmenn nou okenn par. Nou koz lo kou lavi, wi, kou lavi i ankor ser. Me la deor napa dimoun ki lafen. Seselwa i toultan pe rod en fason pou li kapab met manze lo son latab.

Seselwa i konnen ki Gouvernman pe fer zot mye pou kontinyen siport nou travayer pou amelyor zot lavi.

Minis, mon ti a kontan si zot kontinyen get dan *welfare*

travayer Seselwa. Sirtou kot i konsern zot lapey osi.

Zis pou dir ki pri lavi byen lontan i koumsa dan sa Sesel. Alor mon pare pou siport sa Prozedlwa ki Minister Lanplwa in anmenn devan nou, devan nou Lasanble pou mwan siport tou travayer Seselwa. Spesyalman travayer lo mon zil Praslin. Mersi.

(APPLAUSE)

MR SPEAKER,

Mersi Onorab. Mon a pas laparol Onorab Herminie.

HON WILBERT HERMINIE

Mersi Mr Speaker. Bonzour Mr Speaker. Bonzour Minis ek ou delegasyon. Mr Speaker, atraver ou mon ti ava anvi dir Onorab Hoareau ki i nou drwa koman Lopozisyon e koman en Manm Parlman pou *walk out* a en sir protestasyon.

E menm parey ki i drwa Onorab Georges ek Onorab Clifford pou zot *attend* zot bann *court case* Ankour. Sa i normal ki i ganny fer koumsa, i napa naryen mal. Ou ganny en konpran?

Mr Speaker, lo nou kote, nou kler lo nou pozisyon lo trezyenm mwan saler. Akoz pou nou en trezyenm mwan saler, i pa en *bonus* me en drwa. Akoz

ki nou dir sa? Pandan lannen en dimoun i travay i ganny peye pou travay 28 zour par mwan. Me nou tou nou konnen pandan lannen, en mwan i pa 28 zour.

So, sa ki pandan lannen i ganny akimile e sa i vin sa trezyenm mwan pou en travayer. Lontan ler nou pa ti pe pey trezyenm mwan saler, ki manner nou ti pe evalye nou bann travayer?

Mon krwar ki sa largiman servi *performance base* i pa *hold grounds*. Mon napa problemm avek *performance-based appraisal*. Sa i pou al direktman lo kote logmantasyon saler, ouswa lo kote promosyon bann keksoz koumsa, sa mon a konpran.

Me selman pou en drwa pou en dimoun ki'n travay pandan lannen, in travay tou son bann zour, i son drwa pou li ganny peye. *As simple as that*.

Sa ki nou pozisyon. Nou pa pe koumsa pa servi *performance-based appraisal* pou bann lezot keksoz. Me pou en saler, mon krwar i normal pou sa dimoun ki'n travay pandan lannen ganny son lapey.

Nou pa pe fer keksoz ekstraordiner, sorti dan en

aletranze i vini ki konmsi ki nou pa kapab war kwa ki nou pe fer.

Akoz Seselwa in travay i bezwen ganny sa ki i merite, i bezwen ganny son bann *dues*. Ler ti napa trezyenm mwan saler, si sa dimoun ti vin tar, ki zot ti fer? Ti bezwen annan en fason ki sa dimoun ti ganny *appraisal*.

Mon krwar ki pandan sa bann letan, bann *HR Manager* ti bezwen *at least* fer ou troun lo probasyon. Ouswa anvoy ou plis *training*. Ouswa demosyon. Ti annan bann lezot fasilite pou kapab *deal* avek sa sityasyon.

Mon pa pe war aköz zot lo zot kote laba *LDS* pe zwe sa gitar en sel lakord, pou sey dir fer dimoun krwar ki *performance-based appraisal* i bezwen ganny fer pou ganny en trezyenm mwan saler.

Nou pe koz en trezyenm mwan saler la nou, nou pa pe koz *bonus*. *Bonus* definitivman sa ki'n travay i bezwen gannyen, sa mon krwar i merite. I normal sa.

En lot keksoz ki mon anvi, mon anvi touse ki Minis kekfwa i kapab eklersi nou en pe, ler sa dimoun ou'n dir koumsa i pe *travel*, i pe travay *pro rata* eski son bout trezyenm mwan saler pou enkli son probasyon ouswa i pou *kick in* zis apre?

Sa i enportan pou nou konnen, akoz mon pa'n tande mon'n seye lir mon pa'n war egzakteman si sa i antre ladan. Zis eklersi pou bann dimoun ki pe ekoute deor.

Mr Speaker, ler ou pa ti la Lasanble ti vreman trankil. Paret mwan konmela kan ou retournen, ou bann Manm napa respe pou ou, kan ou, ou dan *Chair* en bann *disturbance* pe ganny fer.

MR SPEAKER,

Onorab, prosede avek ou *speech* silvouple. Envit referans lo mwan.

HON WILBERT HERMINIE

Mr Speaker, mon a kontinyen mwan. En lot pwen ki nou'n war dan sa Lalwa, se lo kote dimoun ki ganny R45 mil i pa pou kalifye pou ganny trezyenm mwan saler. Zot kapab gannyen depandan lo zot anplwaye e i zis *according to* li.

Be nou lo kote *US* nou, nou tou kou nou dir koumsa akoz mon bezwen ganny pini, pou mwan al *study*. Mon'n *burn the midnight oil*, mon'n reste, mon'n travay – mon'n vin en profesyonnèl, nou pe ankouraz nou Seselwa pou pran bann pos bann etranze.

Nou pe ankouraz Seselwa pou vin pran pozisyon

leadership. Me ler ou ariv dan sa bann pozisyon i pe dir ou koumsa ki ou pa merit ou bann *dues*. I depan lo ou anplwaye. Mwan sa lo nou kote nou war sa mal. Nou, nou believe dan *equal opportunity under the law*.

Akoz si ou bezwen donnen lot i bezwen gannyen. Pa get akoz mwan, mon'n al *study* mon'n fer, mon'n ganny sa pozisyon, mon'n *advertised* mon'n ganny sa pozisyon e ki mon bezwen ganny pini lo kote trezyenm mwan.

So, mwan mon krwar Minis lo sa kote mon krwar ou kapab get ankor. Akoz napa bokou sa bann dimoun ki annan sa bann kalifikasyon. E larzan dan Bidze mon ti war i annan *savings*. *Ok*, zot in fer en on pe *savings* dan lo kote *non recruitment* epi *nonpayment of* trezyenm mwan saler.

So, mwan mon krwar ti pou vreman enportan ki sa kategori Seselwa osi tou pa ganny pini, akoz zot performans dan lavi zot in ekoute dan ban lekol. zot in al fer zot *extra class*, zot paran in peye, zot in al liniversite, epi ler nou pou tournen pou nou kapab vin devan sa, vin dan en sityasyon davantaz.

Mwan pou mwan mon war sa i vreman *unfair*. Akoz tou dimoun ki travay i bezwen

ganny son *dues* Mr Speaker. Mr Speaker, nou rezon ki nou pe larger for pou sa trezyenm mwan saler se ki nou'n war dan pei ki pri lavi in vreman pet plafon. E kantmenm mon pe ganny dir ki lenflasyon, lenflasyon pe desann. Me selman sa bann *numbers* pa *add up*, akoz sa bann limero ou pa kapab met dan kastrol pou manze.

Seselwa pe vin kot nou, pe apros nou pe dir ek nou i pli difisil. I pli difisil pou zot fer 2 bout zwenn. I vin pli difisil, pou zot kapab anvoy marmay avek ase goute pou zot kapab tenir lazournen.

So, pou nou sa zafer trezyenm mwan saler i vreman enportan, sirtou dan sa bann dernyen 3an kot bokou dimoun pe war li difisil pou zot kapab aziste zot Bidze le mwan. Pou zot kapab fer bann keksoz ki zot ti abitye fer.

Akoz bokou manman tousel ki vin kot ou, i pe eksplik ou zot sityasyon zot pa pe ganny asiste avek sipor sosyal. zot pa pe ganny asiste avek bann benefis ki ti deza la. *Part rental* nou ki'n bezwen lager pou fer sa tournen.

Ti annan en bon pe benefis ki'n ganny koupe, ki prezan sa trezyenm mwan saler ti en soulazman pou ler zot pe

anvoy zot zanfan lekol an Zanvye. Ti en soulazman.

Me ki nou'n war ki *LDS* in fer? Zot in vin avek diferan kalite keksoz ki pou met retar, ki mannyer ou pou ganny en trezyenm mwan saler. Sa ti sitan senp sa, en saler ou'n travay ou ganny li. *Simple as that*.

Si zot ti anvi ou war mwan pa pe travay, ti annan lezot ways ki zot kapab *deal* avek mwan. Akoz mon krwar mon *line supervisor*, *line manager* ou *supervisor* i war ou performans toulezour ou vin tar, ou mank travay.

I annan bann fason disiplin ki i mete anba *PSO* pou *deal* ek sa bann keksoz. Nou, nou pa'n vini prezan nou pran tou sa bann lezot keksoz, nou'n fer li vin zis pou trezyenm mwan saler.

Ti annan fason pou *deal* avek *nonperformance* avan trezyenm mwan saler. So, pou mwan sa largiman ki nou bezwen servi *performance base* pou en saler, pou en dimoun ganny son saler nou *completely against* nou!

Ou saler i ou drwa, i ganny proteze anba Lalwa. Mr Speaker, zot dir koumsa pei pe fer byen. Lendikasyon ki zot in dir *IMF* pe donner, nou pe fer tre byen. So, ki *issue* pou pey sa

bann dimoun zot *full* trezyenm mwan saler? Napa okenn *issue* pou zot gannyan, akoz si pei pe fer byen ou bezwen pas sa benefis avek ou pep!

Non, be ki nou'n war en Gouvernman *LDS* fer? Premye keksoz ki zot in fer se donn zot lekor bann gro, gro *allowance*. Bann gro, gro *allowance* lo ledo Seselwa. E ale donn Seselwa en 10 pousan logmantasyon ki zot pa'n menm eksplik byen, ki zot in pran tou bann *allowance* zot in met ansanm. E la zot dir ou koumsa sa i en 10 pousan logmantasyon. Kan an realite ou pa'n gannyan sa.

After tax bokou dimoun in vin dir ki zot pa'n gannyan sa. Mr Speaker, nou donn nou lekor bann gro logmantasyon, me selman nou koz lalang ek bann *staff* la mon kapab fer referans avek bann *staff* Lasante kot Minis ti vin la ti dir nou ki zot pe *revised* bann *scheme*. Selman letan *Mid-year review* i vini, napa okenn *scheme* pou bann travayer Lasante.

So, ankor ki nou montre ki sa Gouvernman liberal napa en leker pou Seselwa. Zot reviz keksoz pou zot. Me malere pa ganny naryen.

Long-term service allowance pou bann kad profesyonnel ki la nou pe koz

bann kategori ners, avek bann ansennyan sa zot in tire. Zot in tire. Bann ners bann profesyonnel lasante ki'n travay tou sa letan pandan *COVID* zot, zot pa gannyan zot bann *dues* zot. Zot pa'n gannyan zot bann *allowance*, tou sa letan zot ankor pe demande.

Selman nou war *savings* dan Bidze. Nou war *savings* dan non *recruitment*. Nou war *savings* dan lapey trezyenm mwan saler.

Me selman si ou Bidze en keksoz, ou'n bidzete pou pey tou dimoun zot trezyenm mwan saler, selman ou pe fer *savings* lo la ou. Ki mannyer i apele sa Mr Speaker?

MR SPEAKER

Onorab 10 minit. E ou nepli lo size *Bill*.

HON WILBERT HERMINIE

Mr Speaker, mwan mon krwar tousala i dan *Bill*. Akoz-

MR SPEAKER,

Ok, konklir silvouple. Mersi.

HON WILBERT HERMINIE

Doyace ti lo *Bill* li, Onorab. *Sorry* Onorab Porice ti lo *Bill* li. Mr Speaker, an terminan nou pe dir travayer Seselwa gete lekel ki pe larger pou zot drwa.

Lekel ki vin koz lo zot vant? Lekel ki pou anmenn zot bann konsern devan? Kan ler i annan bann *PNQ* ki vin dan Lasanble, zot pa koz lo la zot pa demann naryen. Okenn kestyon zot pa ni menm *take* zot Gouvernman *to task*.

Nou isi lo sa kote latab ki pe lager pou malere. E nou pou kontinyen lager pou zot *get* en *better deal*. Mersi Mr Speaker.

MR SPEAKER

Mersi Onorab. Onorab Norbert Loizeau.

HON NORBERT LOIZEAU

Mersi Mr Speaker. Bonzour Minis ek ou delegasyon. Bonzour tou Manm prezan e tou dimoun ki a lekout. Mr Speaker, mersi pou ganny en sans pou koz lo sa *Employment (Amendment) Bill*. Mersi pou ganny en sans pou koz lo sa *Amendment Bill, Employment (Amendment) Bill*.

E parey nou konnen sa i fer referans avek trezyenm mwan saler.

Mr Speaker, mwan mon lentervansyon i pou plito en pe an zeneral, akoz bokou in ganny dir. Mwan mon anvi Mr Speaker, fer ladiferans, ant nou isi lo sa kote latab ek zot laba lo lot kote latab.

Mr Speaker, nou, nou en Gouvernman ki enn;- nou krwar dan prodiktivite. Akoz prodiktivite dan travay i lakle. E nou krwar dan travay dir, dan en kiltir travay dir parey Minis in dir.

E nou krwar dan performans e osi dan responsabilite dan en travay. Mr Speaker, pou en pei progresse parey nou konnen dan tou domenn, i enportan ki nou annan en *workforce* ki performan - enn, e ki anmenn prodiktivite.

Alors Mr Speaker, nou lo sa kote latab, nou anvi felisit tou travayer. Tou bann travayer Seselwa ki serye dan zot travay. E ki osi annan sa sans responsabilite dan zot travay Mr Speaker.

E zot sa bann dimoun ki nou pe koz lo la, ki serye, ki konpetan, e ki performan Mr Speaker. Zot pa per sa Lalwa ki pe vini. Akoz zot pa per sa Lalwa? Akoz enn, zot annan responsabilite e zot konnen ki ou bezwen travay, travay e travayer dir parey Minis in dir.

Alors se pou sa rezon ki zot pa per. Zot pa per akoz? Zot en bann dimoun ki atraver sa travay dir zot konnen zot pou ganny rekonpanse 100 pousan Mr Speaker. Alors zot pa per

naryen sa Lalwa ki pe vin devan.

Mr Speaker, nou konnen Minis in koz lo la, responsabilite dan travay i lakle dan tou keksoz ki nou fer, si nou anvi nou pei i progrese. Ozordi Mr Speaker, mon kontan war ki omwen tou travayer Seselwa pe konpran sa sanzman ki Gouvernman *LDS* pe anmennen dan Sesel.

Gouvernman *LDS* parey Minis in dir pe anmenn sa kiltir travay dir. E sa Mr Speaker, i fer bann mon dir bann ki abitye kale ankoler Mr Speaker. Zot ankoler akoz zot labitid se kale e trenn lipye.

I annan bann osi Mr Speaker, ki'n ganny en plas travay menm si zot pa konpetan, zot ankoler akoz se zot ki pa pe delivre. Alors ler nou pe dir zot delivre montre performans zot ankoler.

E la Mr Speaker, mon anvi atraver ou dir ek Onorab Uranie, wi nou ti dir ki i annan serten travayer ki pares. Me mon a dir li lekel sa bann travayer ki nou sa letan nou ti pe dir. Mr Speaker, nou ti pe dir zot, sa bann Sekreter Sekter, ki ti ganny en plas travay dan Gouvernman menm zot pa konn naryen dan sa travay, ki apel Sekreter Seksyon, zot ti

apel sa Sekreter Sekter sa letan zot.

Ki apre midi Minis i dir zot al se zot, al vey zaksyon lo flat, lo *housing estate* lekel ki pa siport Gouvernman, lekel ki ...

(Interruption)

MR SPEAKER

Onorab, Onorab arete. Mon krwar okenn Manm pa devre met komanter direk lo okenn kategori travayer oubyen endividi. Gard ou remark zeneral. Mersi.

HON NORBERT LOIZEAU

Mersi Mr Speaker. Mon panse ki ou'n rikord mon letan ki mon'n perdi la tou Mr Speaker. Mr Speaker, se sa ki nou ti pe dir nou, se bann travayer ki ti pe ganny soutire. Mon pe koz Mr Speaker, soutire e Onorab Cosgrow koman Minis i konnen i konn byen sa li mannyer ti pase Mr Speaker, atraver ou Mr Speaker.

Mr Speaker, tro bokou letan ozordi si i annan tou sa bann trenn lipye, kot ozordi nou pe gele si nou pou ganny trezyenm mwan se akoz souvandfwa travay pa ti ganny donnen akoz ou konpetans. Travay ti ganny donnen pou rezon politik.

Ki ou afilyasyon? Ki ou fer dan distrik pou sa parti? E ki nouvel ki ou anmennen osi Mr Speaker. Sa ti lakle pou ou ganny en travay.

Menm si ou pa ti merit ganny sa travay, ou ti gannyen sa plas. Pou ou fer serten travay pou fer sa bann dimoun kontan. A lafen Mr Speaker, travay ki ou ti sipoze fer, pa pe ganny fer.

Me selman Mr Speaker, sa bann menm dimoun zot ler ganny menm rekonpans. Menm rekonpans ki sa enn ki'n travay dir li. Ki'n fer sir malgre ou e koz deryer li, ou pe sey kas li may li zambek li i pe travay dir.

E li sa enn ki pe trenn lipye, li i pou ganny parey li. Mr Speaker, se sa ki ou trouve. Dan lepase naryen pa'n marse dan nou Minister. E ozordi nou koman en Gouvernman nouvo, nou pe rekolte sa fri ki'n ganny senmen par *previous Government* sa letan.

Mr Speaker, ozordi nou pe sey sanz keksoz parey Minis in dir. Nou pe sey sanze tousala. Ozordi tou travayer i pou bezwen perform pou ganny rekonpans. Par kont Mr Speaker, i annan ankor bann ki ankor pe trenn lipye dan bann Departman Gouvernman.

Me selman Mr Speaker, parey nou'n dir Sesel i pou tou

son zanfan. Alors parfwa nou bezwen les zot, akoz Sesel i pou tou son zanfan. Me akoz Sesel i pou tou son zanfan Mr Speaker, eski pa in ler pou nou get en pe dan tousala Mr Speaker?

I enportan ki nou gete Mr Speaker. Si sa kiltir travay dir ki Minis in koz lo la ti egziste oparavan, nou pa ti pou bezwen vin ek en Lalwa kot pe demann dimoun pou perform, pou perform.

Nou pa ti pou bezwen vin evalye zot performans Mr Speaker. Akoz dimoun sa kiltir travay dir ti pou la, me problem sa kiltir travay dir in ganny detri.

Ozordi nou 2023 Mr Speaker, nou pe plennyen avek dimoun pou nou pran travay serye. Pourtan Mr Speaker, nou koman Seselwa nou konn tre byen nou ti en pep ki ti travay dir nou. Zis mazin nou bann dimoun ansyen, zot ti travay dir.

Mon mazin mon tonton ti marse ziska Anse Royale, ziskan Port Glaud pou al sye dibwa leve 4er bomaten. Mr Speaker. Be sa pa ti travay dir?

Personn pa ti bezwen vin dir li ou bezwen travay dir pou ou ganny sa rekonpans. Me ozordi nou pep i in arive ki nou bezwen tay deryer zot, pou dir

zot poudir zot ki travay i enportan.

E taler Onorab Andy Labonte in montre mwan en vers dan *La Genese* ki dir “Chapitre 3 verse 19 ki dir “ou pou bezwen trimouse pou ou ganny ou nouritir, ziska ou retourn dan lapousyer kot ou sorti,” Mr Speaker. Onorab in fer mwan rekonnet sa.

Mr Speaker, kiltir travay dir i enportan, sa in ganny ekrir sa in ganny ekrir. E se pou sa rezon ki nou bann dimoun lontan ti travay dir pou zot kapab ganny sa ki zot bezwen.

Mr Speaker, an terminan mon ti a kontan dir, nou annan dan lepase en Gouvernman ki’n soutir bokou. I annan bokou keksoz ki arive dan lepok ansyen ki pa’n byen pou nou Mr Speaker.

I annan dimoun ki’n ganny *scholarship*; i annan dimoun ki’n ganny *scholarship* zis aköz afilyasyon politik. Ozordi nou pa war zot dan Gouvernman pou delivre. Me selman zot ti’n bar plas en dimoun.

Zis get *URS*. Dernyen fwa avan eleksyon zot ti al tir tou sa dimoun ki zanmen in travay ki zanmen in enterese pou travay, zot ti anmennen pou zot donn en larzan an rezilta pou kapab ganny eleksyon.

E ozordi i annan larzan ki ankor reste kot Minis, ki personn pa’n vini. Aköz ti annan non ki’n ganny mete, ki personn pa’n vini pou vin pran zot larzan.

E la Mr Speaker, atraver labi ki’n arive ozordi, nou ti kapab donn tou dimoun 100poursan. Atraver bann labi ki’n arive dan lepase dan bann Minister.

MR SPEAKER

10 minit Onorab, terminen.

HON NORBERT LOIZEAU

... sa 2 pti lenteripsyon Mr Speaker, permet mwan lo sa bann labi Mr Speaker, ki’n arive dan bann Minister. Tousala ti bann larzan ki nou ti kapab servi ozordi pou nou kapab donn 100poursan.

Ozordi nou pe ganny difikilte avek *recruitment* dan bann Minister. Aköz? Pa, pa aköz napa dimoun Mr Speaker. Aköz, nou napa dimoun konpetan pou kapab fer sa bann louvraz.

E se pou sa rezon Mr Speaker, ki nou war bokou keksoz i trennen, bokou keksoz pa marse, aköz nou napa sa bann dimoun.

An terminan Mr Speaker, mon ti annan bokou pou dir. Mon ti a kontan mwan ki tou

travayer i ganny zot 100poursan trezyenm mwan. Mon ti a kontan osi ki tou travayer zot montre ki zot apre pou travay dir.

Montre sa sans responsabilite dan zot travay, e prouve ki zot merite. Akoz a lafen Mr Speaker, sa larzan ki zot pou gannyen zot pou fyer pou depanse. Ou konnen akoz? Akoz zot in travay dir. E pou sa bann ki pe fer sa bann *appraisal* Mr Speaker, i enportan ki zot onnet annou azir onnet.

Annou pa ser nou i bann ser travayer Seselwa pou fer zot ankoler, kot apre ou pou vwar *Leader* Lopozisyon ek larestan pe vin ek kestyon pe vin koz lo la.

Se akoz sa bann keksoz ki pe arive dan bann departman, ki pe fer sa bann dimoun ankoler, e ki met en move limaz lo nou Gouvernman.

Mr Speaker, mon ti annan ancor pou dir, me selman mon letan in fini. Mon a remerci ou pou sa, mon ava anmas larestan pou en konversasyon pou en lot zour ler Minis i ava vini. Mersi Mr Speaker.

(APPLAUSE)

MR SPEAKER

Mersi Onorab. Laparol pou Onorab Samynadin.

HON KELLY SAMYNADIN

Mersi Mr Speaker. Bonzour Minis ek ou delegasyon. E tou dimoun a lekout. Mr Speaker, mon pou komans mon lentervansyon par salye tou travayer devoue dan mon distrik Au Cap e dan pei an antye ki delivre dan zot travay avek pasyon, malgre plizyer defi ki zot pas atraver.

Journal Nasyon date Sanmdi le 27 Out i dir ki “en trezyenm mwan saler i en peyman ekstra ki ganny donner a tou bann anplwaye. E ki egal en saler regilye, me ki ekskli bann *allowances* en si ki bann lezot benefis monneter.”

Sa *incentive* finansyel i *tax free*, me malgre sa se bann anplwayer i ganny permet pou fer serten dediksyon ki ganny aprovizyonnen anba Lalwa. En legzanp; bann labsans in otorize.

Dan en lannen i konpri 12 mwan e i annan dimoun ki pou plizyer rezon i vwar li pe sanz plas travay, swa in ganny en pli bon *offer* oubyen i fek antre dan lanplwa apre ki i ti pe *job hunt* pou en pe letan.

I annan bann madanm ki’n bezwen al dan konze maternite. E i osi annan bann

dimoun ki'n bezwen absante dan travay pou rezon medikal.

E byensir i annan dimoun ki'n bezwen al fer serten *training* ki swa lokal ouswa an deor pei e pou plizyer lezot rezon.

Mr Speaker, zot pa'n arive konplet 12 mwan dan zot travay, pou zot byensir kapab benefisye avek en trezyenm mwan saler.

Dan sa ka mon pou agrer avek lamannman, ki sertifye ki en travayer ki pa'n ganny anploye avek en anplwaye pou en peryod mwens ki 12 mwan dan en lannen korespondan. E ki le 31 Desanm sa lannen korespondan i pa lo probasyon, i ava ganny peye son trezyenm mwan saler dan proporsyon sa peryod, servis ki enkli son peryod probasyon.

Mr Speaker, nou osi agrer avek bann lamannman ki'n ganny fer nab 46(2) ki fer resorti ki en travayer pa atitre en trezyenm mwan saler, anvi bann rezon swivan;

- Sa travayer ti lo probasyon letan son lanplwa in ganny terminen.
- Sa travayer ti lo probasyon, e son lanplwa in ganny terminen pou bann

rezon performans ensatisfesyan.

- Kot lanplwa en travayer in ganny terminen pou rezon lofans disipliner.
- E osi lo baz kot en travayer ki kalifye pou en trezyenm mwan saler e ki ti pe ganny detenir lo lord en Lakour konpetan.
- Oubyen ki'n servi en term prizon pandan sa lannen korespondan.

Dan sa ka sa peryod detansyon lo lanprizonman a ganny dedwir dan son trezyenm mwan saler.

Mr Speaker, i enportan osi pou fer remarke ki parey i annan bokou travayer ki debourye e asire ki i annan prodiktivite dan travay, i osi annan en group travayer ki pa donn ase.

Sa ansennyan ki tou le semenn i dan *sick leave*, oubyen ki deside pa vin travay e son koleg ki bezwen met son preparasyon lesan e evalyasyon, koreksyon kaye dekote pou kapab al kouven son laklas.

Sa enn ki deside ki malad tou le Lendi aköz *weekend* in byen *enjoy*. Sa enn ki toultan i war en defo ek enn son koleg.

Dan plas ed li adres son febles i prefere al raporte deryer son ledou pou li ganny penalize.

Mr Speaker, sa i zis detruwa legzanp parmi plizyer. I enportan ki sak travayer i pran kont ki sakenn ant nou, nou annan en rol entegral pou zwe dan devlopman progre e prodiktivite pei.

E nou pa pou kapab konplent letan nou pe ganny penalize, aköz nou performans pa alaoter. Me par kont Mr Speaker, mon ti a voudre lans en lapel a tou anplwayer. En kantite travayer la deor i devoue dan zot louvraz. E en kantite parmi zot, pa pe santi zot ganny valorize, pa pe ganny ekoute oubyen ganny siporte.

Annou annan en zorey pli pre pou ekout zot. En senp bonzour e en senp lankourazman souvandfwa i sifi pou li. Kot i annan en febles annou konn apros li poudir li ki i mal.

Annou azir zis dan nou bann zizman. Si madanm x i annan 15 zour ki i pa'n vin travay, eski son trezyenm mwan i merit plis ki sa enn ki'n kouver son 15 zour labsans?

Li osi i annan son problem, me i konnen ki si i absante i pou anmenn en lour lo son bann lezot koleg. E i

konnen ki lenportans travay dir.

En travayer ki lo son probasyon ki pe montre bokou lentere, malgre ki i annan serten mankman kapasite. Annou atrap son lanmen e ankadre li pou li osi kapab epanouir e zouri benefis en trezyenm mwan saler.

En zenn ki annan kalifikasyon, me ki napa leksperyans i merit li osi ganny posibilite pou li ganny anploye, pou li kapab li osi montre kapasite ki in akerir dan son letan formasyon. Zouri en saler pou li kapab viv e osi pou kapab zourir en trezyenm mwan saler.

En travayer i merit kapab ganny ankadreman kot i nesaser pou li kapab perform pli byen dan son travay.

E an retour demontre pli bon kapasite e an retour zourir en trezyenm mwan saler ki zis aköz son febles in ganny adrese. I vremen enportan ki performans sak travayer i ganny mezire dan en fason ki zis e ekitab atraver striktir *appraisal* ki'n ganny met an plas pou ki a lafen i pa santi li pe ganny defavorize.

I osi enportan ki sa proses i ganny fer kolektivman, e ki bann febles i ganny fer resorti e ganny adrese diplomatikman.

E en anployer i devret fer sak travayer konpran, akoz ki i bezwen pas atraver en proses *appraisal* a lafen sak lannen. E ki i annan en loportinite *grievances*, si i pa tonm dakor avek poursantaz ki in gannyen apre son *appraisal*.

E zis pou met a latansyon Onorab Uranie atraver ou Mr Speaker, sistenm *appraisal* pa fek ganny entrodwir an Oktob 2020.

Mon'n dan Ledikasyon pandan 10an, e tou le-z-an mon ti bezwen fer en *appraisal*. E mon konnen ki li osi in fer parey vi ki i ti en ansenyan parey mwan menm.

Mr Speaker, i egalman enportan ki tou travayer i trouv li dan en landrwa travay ki en lanvironnman agreab, pou li kapab epanouir. Akoz san sa pou napa prodiktivite.

Pou ou sa travayer ki leve tou le bomaten, avek en lanbisyon pou fer pli byen, mon pe demann ou pou *keep up the good job*. Mersi pou atak ou bann defi avek en lespri pozitiv. Akoz lanmour ki ou annan pou ou louvraz e pou ou pei.

Me pou ou sa enn ki konnen ki i annan bokou lespas pou amelyorasyon, apre plizyer lesey par ou anplwayer pou ed ou, mon pe demann ou pou fer en refleksyon otremman.

Ou travay i osi enportan parey okenn lezot travay. E i neserer ki ou delivre. Analiz lo ou bann febles, e rod led kot i neserer pou ou osi kapab zouir en trezyenm mwan saler ki pou byensir vin avek merit.

Mr Speaker, mon pou termin mon lentervansyon avek sitasyon en aktres Ameriken Sidney Sweeney ki dir ki

“Hard work pays off. The harder you work the more people will notice”. Avek sa, mon pou anmenn mon sipor pou sa Prozedlwa pou asire ki sa trezyenm mwan saler sak travayer pou lannen 2023, 2024, 2025 i garanti. Mersi Mr Speaker.

(APPLAUSE)

MR SPEAKER

Mersi Onorab. Mon a pas laparol Onorab Lemiel.

HON SYLAVANNE LEMIEL

Mersi Mr Speaker. Bonzour Minis ek ou delegasyon. Tou dimoun ki a lekout. Mr Speaker, ozordi Minis in retourn ankor devan nou avek en si mon pa tronpe en trwazyenm lamannman dan Lalwa Lanplwa. E kot nou pe koz lo trezyenm mwan saler ki manner ki Gouvernman pe mazin *go about* avek trezyenm

mwan saler pou sa lannen ki la 2024 e osi 2025.

Mwan a mon avi, mon krwar nou tou nou la pou nou kapab share nou pwennvi osi. Mwan a mon *avi* mon lopinyon, mwan osi mon santi ki en trezyenm mwan saler i drwa tou travayer.

Par kont Mr Speaker, mon santi osi ki tou travayer dan zot landrwa travay zot devret pe donn tou. Zot devret pe travay pou benefis zot lorganizasyon. E osi pep Seselwa ki deor ki bezwen zot servis.

Ozordi Mr Speaker, nou'n ganny dir ki devlopman ekonomik pe ganny son viger.

Si devlopman ekonomik pe ganny son viger, letan nou pe diskrit lo sa Lalwa Trezyenm Mwan Saler osi Mr Speaker, mon ti pou kontan petet rekomann avek Gouvernman, pou reget osi bann travayer ki'n lo kontra, ki nou war zot bann 5 pousan in ganny dis kontinyen.

Si lekonomi i an viger, i pe fer byen alors annou regard ankor en pti pe lo kondisyon bann travayer, ki vremen nou kapab dir zot annan bann pozisyon responsabilite.

E ki i annan serten benefis ki'n ganny retire avek zot ki Gouvernman i regarde, re get ladan. E vwar ki mannyer zot

pou kontinyelman amelyor lavi tou travayer.

I annan osi nou'n koz lo *long service allowance* ki nou ti ganny dir poudir avek letan, pa avek letan in fini aboli. Me si nou vwar poudir lekonomi pe vin a la viger, i pe fer byen, annou revwar tousala.

Akoz tousala Mr Speaker, ti bann *incentive*. Ti bann keksoz ki ti fer nou bann travayer met zefor. Ozordi i annan bokou travayer, ki dan sa bann *bracket* 45 mil 450 la. mon krwar zot lo kontra zot sa bann dimoun, *if i am not mistaken*.

Me i annan bokou zot sa bann travayer i dekouraze. I annan bokou zot sa bann travayer ki annan responsabilite responsab en lorganizasyon.

E zot dir ou ozordi, zot saler i bit lanmenm. Lontan zot ti pe *look forward*, zot donner. Zot ti pe *look forward* pou sa *appraisal* apre 2an, 3an, pou zot kapab war sa pti 5 pousan or mon pa konnen konbyen zot ti gannyen en pti *increase* i monte.

Zot al lo 3, 2 *step* anplis. Me depi *COVID* ti'n dir in arete, nou ti pe mazin ki Gouvernman pou revwar apre, me nou pa tann naryen ankor lo la.

So, ti a byen pli nou lekonomi i vin an viger, i mars byen i vin pli for, annou reget ankor en pti pe lo sa kote.

Mr Speaker, letan nou lo sa *Bill*, mwan osi vwar e nou konstate ki Bidze Siplemanter ti vini dan Lasanble, 2 semenn pase. Nou vwar bokou larzan in ganny retourn kot Gouvernman akoz bokou in dir - enn *recruitment*.

E dezyenmman, in akoz trezyenm mwan saler. I annan ki trezyenm mwan saler ti'n mal kalkile, ti tro ba. I annan petet i anplis, mon pa konnen. Me selman bokou larzan in retourn dan kof Gouvernman, an sa ki konsern trezyenm mwan saler.

Mwan osi annan serten kestyon Mr Speaker, petet ki mon ti pou kontan Minis i eklersi mwan en pti pe. Sa bann dimoun ki nou pe mazin, ou pe dir annou prezan donn zot trezyenm mwan saler komansman 45 mil 450 e osi pli o. Me osi pli o li i pou al avek en *tax* ki zot pou bezwen peye, en?

Nou vwar bann travayer pli ba i pe dir ou *appraise* sa bann travayer pou zot kapab ganny sa lot 50 pousan. Lekel ki *appraise* sa bann ki ganny 45 mil 450? Pou fer sir ki zot in delivre, e zot ganny sa trezyenm mwan saler?

Nou osi annan Mr Speaker, nou pe vwar e nou konstate ki sak fwa nou annan en larzan, en logmantasyon - en keksoz pou nou donn bann travayer, ki pe *earn* mwens dan pei, nou vwar ki zot pas dan bokou difikilte.

Dan bokou dokiman, papye, *appraise*, gannyen, pa pou gannyen i bokou difikilte zot pas ladan. Petet mon krwar ki, nou merit senplifye keksoz en pti pe pou sa bann dimoun.

Si i annan en keksoz pou nou donn zot, nou donn zot. E par kont parey mon pe dir, mwan mon pa en dimoun lese fer. Mwan mon osi mon kontan e mon pou ankouraze ki tou travayer dan pei - mon redir ankor - i donn son tou.

Akoz mon pran legzanp mwan osi lo mwan menm Mr Speaker. Mon pa en dimoun ki asize - zis asize parey nou ganny dir nou vin dan Lasanble zis nou asize nou demann kestyon. I form parti nou louvraz. Me mon annan en distrik mon responsab.

Mon marse dan mon distrik, mon al vwar dimoun. Mon santi ki mon en dimoun ki travay tre dir. Me mon pa bezwen vin felisit Prezidan, mwan osi mon pa bezwen felisitasyon.

Me selman Mr Speaker, antan ki mon en dimoun ki travay dir mon ti a osi demann tou travayer pe enport ki staz ou ete - ou pli ba, ou pli o, ou en sef, ou Minis *whoever* ou ete annou travay dir! Bokou sef i met presyon lo bann travayer.

Ozordi Mr Speaker, ou annan travayer ki ou'n toultan dir sa. I annan ki pe fer louvraz 3 dimoun, 4 dimoun. E ler in ariv pou ganny trezyenm mwan saler sa ki pou *assess* li?

I dekourazan letan ou pe vwar sa dimoun in donn son tou e apre pou dir li lo sa lot 50 poursan ou pou ganny zis 20 oubyen 25 poursan. I dekouraz li, ou konpran?

So, annou regard sa, regard sa bann keksoz en pe byen. Difikilte ki nou'n vwar in arive avek prosedir, ki nou bezwen fer sir ki ler nou pe enplimant trezyenm mwan saler ankor la, ki i pa ariv ankor.

Ou konnen mwan mon krwar Mr Speaker, i annan serten lorganizasyon travay, i mank serten lankadremman pou bann travayer.

Travayer pa ganny *assess* byen, e apre ou war ki zot ganny dir ki lo sa lot 50 poursan ou pa kalifye ou pa pou gannyen.

Akoz prosedir li menm pa'n ganny swiv byen. I

enportan ki prosedir i ganny swiv byen, *standard* i ganny *set* pou travayer kapab *reach* son *goal*. Pou li kapab dir pou dir ler ou pe dir mwan mon pa'n kapab fer sa, ou pe donn mwan tan pwen.

Mon kapab argimant ek ou pou mwan dir ou - e i enportan ki *as from now on* si travayer nou tou pe ganny demande pou fer sa bann keksoz koumsa, dokimant tou keksoz ki zot fer.

Travayer i enportan *as from now on* dokimant tou keksoz ki zot fer! Akoz i annan bokou travayer ozordi ki pe fer keksoz ki an deor, e plis ki sa ki zot *job description* i demann zot.

Dokimante, ou ava kapab prouve avek ou sef ler i pou *appraise* ou, pou dir pou dir mon'n *perform*. E mon pou *appeal* aköz mon pa satisfè, ou pe fer sir ki mon pa ganny mon trezyenm mwan, mon pa satisfè ek sa *appraisal*.

E sa travayer i a kapab annan laprev pou li al pli devan pou li kapab *fight* son *case*.

In annan lensidan ki'n arive Mr Speaker, dan *appraise* travayer, mon annan fe ki travayer etranze i ansarz sa bann Seselwa dan serten lekol, i pa pou *appraise* sa travayer li. Akoz li i en etranze i pa pe gannyen.

I dir ou i pa pe *appraise* ou, al pli lwen lot dimoun laba i ava *appraise* ou. Sa osi nou bezwen get ladan. I kapab ariv ankor la.

So, nou pou bezwen fer sir tou sa bann keksoz i ganny regarde, i ganny get ladan.

E mon krwar *training* pe donn ek bann *HR Officers* en pe partou pe ganny bann *training* entans, kot zot pe ale kot *Guy Morel Institute*. E mon krwar zot pe kapab *grasp* en pti pe, kwa ki zot pou kapab fer pou ki tou travayer i ganny son lot 50 poursan.

E ki parey mwan mon redir Mr Speaker, mwan mon krwar i ti merit ganny tou son larzan. E si ti annan en *bonus* ankor ki ou ti pou donn li, la ou ti ava *appraise* li, pou sa *bonus* anplis ankor ki ou ti pou donn li.

E sa ti pou vin en pli bon lankourazman ankor pou li delivre ankor en pe plis. I ganny en trezyenm mwan apre i ganny ankor en *bonus*, ti pou bon pou sa travayer.

Par kont Mr Speaker, an pasan letan ou koz ek bann dimoun - yer mon fek tann Onorab Sandy Arissol e nou osi lo sa kote latab toultan nou'n dir, annou revwar en pti pe, annou get en pti pe bann

dimoun ki pe ganny Sekirite Sosyal.

Zot osi, pli nou lekonomi i vin a viger, a la viger i vin pli byen. Bann trwazyenm az, bann dimoun aze. Sanmdi mon ti Bel Ombre, mon'n pas kot serten lakour, bann dimoun pe dir zot osi zot ti a kontan ganny en *thirteenth month*.

So, petet ti a bon sa osi en pti leko nou anvoy kot Gouvernman. Nou dir Gouvernman pli ki lekonomi i aranze, annou aranz tou dimoun.

Annou aranz nou bann dimoun aze, pou fer sir ki zot ganny en trezyenm mwan zot osi. Zot a kapab pas byen Nwel. Zot a kapab pas byen Lannen zot osi, parey nou tou bann ki ganny en *end of year gratuity*.

Enn ki ganny en Trezyenm Mwan plen. E sa bann dimoun osi mon krwar zot ti pou kontan si petet nou get dan zot *welfare*. E zot osi a lavenir pli lekonomi i fer pli byen, nou get dan zot *welfare* pou zot osi kapab ganny en pti keksoz anplis pou zot zouir sa nwel tre, tre byen.

So, mon dernyen lapel ki mon annan Mr Speaker...

(comments off-mic)

HON SYLVANNE LEMIEL

...mon krwar zot tou zot in koze mon'n les zot koze.

MR SPEAKER

Silvouple. Sirtou bann Manm lo kote *LDS*, nou bezwen ki sa deba i prosed dan lord. Ler zot, zot in koze personn pa'n lev lavwa. Ekout lezot.

(APPLAUSE)

MR SPEAKER

Mersi. Onorab, ou'n sot 10 minit, ou a terminen silvouple.

HON SYLVANNE LEMIEL

Mr Speaker, mon pe fini mwan. *As always*, mwan mon *short and brief*. E mon lapel ki mon re annan pou bann travayer Seselwa, annou kontinyen delivre. Pe enport kote ou ete, kote ou pe travay, annou travay dir1 Annou travay avek en leker, annou travay avek lanmour pou sa ki nou e fer. Akoz a lafen dizour se sa ki pe ganny sa servis sorti kot sa travayer ki dan sa biro, ki santi si in ganny sa bon servis.

Akoz i annan plen nou Mr Speaker, ou war sa bann dimoun ki pe ganny sa 45 mil 450 la, i annan plen zot osi dan sa... sanmenm sa mon'n demande, lekel ki pou *appraise* zot, zot?

Akoz i annan bokou ka dimoun ki pe ganny servis *from* sa bann dimoun, pa kot sa bann pli ba, me sa bann anler zot osi i annan en kantite aranze parfwa pou aranze.

Zot fason ki petet zot osi zot zwenn ek dimoun, zot akey dimoun. E petet ti a bon nou konnen osi Minis avan mon fini; konbyen dimoun dan sa *range* larzan ki nou pe koze la, si ou annan en lide statistik ki kantite dimoun apepre, ki nou pe dir avek en trezyenm mwan saler ki pou tonm dan sa range? Si ou annan ou kapab donn nou. Mersi Mr Speaker.

MR SPEAKER

Mersi. Mon a donn laparol Onorab Naidu.

HON SATHYA NAIDU

Mersi Mr Speaker. Bonn apre midi Minis ek ou delegasyon. Bonn apre midi tou koleg Onorab. Parfwa si ou pou swiv konsey ki sorti lo kote latab, nou pei pou koule pou faid. Trezyenm mwan saler pou dimoun aze? *Come on!*

Wi, dimoun aze i bezwen ganny en benefis anplis. E Gouvernman dizour pe fer le lesansyel pou fer bann letid neser pou kapab pas sa benefis a en moman apropiye e i pou ganny fer. Me selman an

relasyon avek dimoun aze, ti annan en moman kot zot ti ganny R500 anplis dan letan lasistans tanporer.

Ti annan dimoun aze ki ti'n resevwar R300 anplis lo kote elektrisite. E i ti annan bann lezot *incentives* ankor.

Akoz si nou swiv zot konsey nou pou tonm dan en presipis. E nou ti dan en presipis. Ler nou ti'n antre koman Gouvernman nou ti'n erit en kof vid dan letan *COVID!* E sa i enn bann rezon akoz nou ler nou ti pe fer sa deba lo trezyenm mwan. Premye 2an nou ti'n bezwen sispann trezyenm mwan, akoz pei pa ti kapab *afford* sa trezyenm mwan.

Me selman atraver bann desizyon desiziv, atraver bann desizyon dan lentere pep Seselwa, ozordi nou pe koz lo trezyenm mwan. Si nou ti pou ekout zot parey zot oule nou ekout zot, dan sa dernyen 2 deba ki ti'n ganny fer lo sa size zot dir donnen.

Me letan nou pe dir sispann nou pa pou kapab pei pa pe kapab, zot dir donnen akoz i popilis.

Ozordi laplipar zot lazanda ki zot, zot pe bouz de lavan se donn 100 pousan. Travay pa travay donn li son

100pousan. Non, sa pa filozofi Gouvernman *LDS*.

(APPLAUSE)

HON SATHYA NAIDU

Gouvernman *LDS*, i le ki sak travayer ler i leve bomaten, i pran son responsabilite ver latas ki li i annan ver bann dimoun ki pe rann son servis; *be it in Government, be it in the private sector*, pou ki lafen lannen ler sa lot 50 pousan pe antre ou kapab dir, "*ar I worked for it!*"

Mwan personnelman, lannen pase ler nou ti pe fer sa lamannman pou fer 50/50, dan mon lespri mon ti pe dir ki mannyer eski sa performans pou ganny *appraised?* E ler mon'n tande poudir zis 30pousan an term *compliance*, i annan en defi.

Ki mannyer eski zot anvizaze adres sa defi, akoz mon war zot anvizaze prolonz sa pou en peryod 3an. E eski an 2026, savedir nou pou bouz 100 pousan performans, *performance based?*

So, li akoz nou pou konnen poudir ki lo kote *compliance* i pou'n bezwen amelyore. E ki mannyer eski zot anvizaze adres sa laspe *performance management appraisal system?*

Ki manner lo baz sekter, dan sa 30poursan lekel sa bann sekter ki ou war zot pe *comply*? Lekel bann sekter ki pa pe *comply*? E menm lo kote Gouvernman li menm li dan bann diferan departman. Kote eski in annan bann departman ki pa pe neserman swiv sa *performance-based appraisal system*?

Eski akoz parey Onorab Hoareau in montre, ilistre en legzanp kot nou, nou ti annan bann *constituency clerk*.

Selman letan ou pe get sanmenm sa dokiman i vremen *cumbersome*. Eski pou annan bann revizyon neser ki ganny fer, pou fer sir ki i annan en letid pou nou kapab *assess the sectorial needs*?

E demann ki sak travayer i annan ver latas ki li i annan sak zour pou li delivre. E lo kote performans li menm li, eski i pa pou kapab vin lo en baz pli regilye. Savedir tou le 2 mwan ouswa tou le 3 mwan, performans sa bann travayer i ganny evalye, pou li konnen poudir ki *ok*, ant Zanvye ziska Avril mon'n ganny tan lo mon *performance rating*.

Alors si mon pou kontinyen koumsa, mon pa pou ganny mon 50 poursan lo baz performans. Akoz mon pa pe fer byen. Pou li kapab pran son

responsabilite pou li kapab delivre sa servis.

E eski an relasyon avek sa sonm 45 mil 450, sa bann travayer ki atraver lamannman, zot pe met li a diskresyon sa anplwayer, mon panse sa pou ganny fer pou kapab donn sa lakonpanyen ouswa sa anplwayer ki annan le mwayen, donn sa dimoun son *fair dues*, otan ki lakonpanyen pou kapab soutenir sa.

E i ti a bon pou nou konnen ki poursantaz sa kad, ouswa sa group travayer, ki pou resevwar sa benefis. E i ti a bon si pa ozordi menm *at least* pou nou pli tar konnen *how it's going to impact*.

Me an relasyon avek trezyenm mwan, mwan personnelman mon war li koman en mwayen pou kapab ed bann ki pli vilnerab. Bann ki tonm dan sa kous popilasyon, ki lafen lannen, ler zot ganny sa benefis apre ki zot in travay dir, i pou soulaz zot en gran kantite.

Alors lo sa baz 45 mil 450, vi ki i vin a diskresyon sa anplwayer, ki baz ki ganny servi par sa dimoun i li menm li ki pou ganny *appraise*, lo eski i merit gannyen wi ou non?

E la i kapab vin en konfli pou sa dimoun ki pe travay. I kapab pe war lakonpanyen i pe resevwar. Me selman dan sa

lakonpannyen ki li ki pe travay, i pa pe gannyen.

So, i pou annan en serten form diskriminasyon ki kapab ganny koz par en tel provizyon. Alors ki pozisyon Minis an relasyon avek sa? E an relasyon avek nou bann travayer menm, ki pe esey rod en *dyob*, espesyalman nou bann zenn ki parfwa zot ganny dir zot pa ganny leksperyans, parey mon koleg Onorab Samynadin in met kantite lanfaz lo la. Ki travay osi Minis pe fer akoz nou war i annan bann diferan program.

I annan bann diferan *scheme* pou kapab fer sir ki nou ganny sa prosen zenerasyon pou kapab ranplas bann ki pli aze. E an relasyon avek sa, kekfwa mon ava profite pou met devan sa pwen, pou pli tar Minis donn konsiderasyon nesaser, se ler en dimoun in ariv tan an term laz pli tar i ganny dir pran ou retret.

Eski i pa'n ler pou nou kapab regard en kou pran sa provizyon dan Lalwa Lanplwa, si mon pa tronpe se *PS* menm ki pou kapab dir sa dimoun i *fit for duty* i kapab kontinyen.

Me selman bann provizyon anba ki son kondisyon lanplwa, i pou enn ki pou totalman diferan an konparezon avek sa ki li i pe

komanse avek ozordi. Sa osi i en konsiderasyon ki nou, nou pou bezwen pran.

Akoz kontan pa kontan, malerezman Sesel a sa pwen ki nou, nou'n erite nou annan en cours nou popilasyon ki'n tonm dan sibstans. E ler mon'n tann mon koleg Onorab Georges Romain met devan en program ki pe mars byen dan son distrik, mon krwar i vin lo nou, nou osi koman bann diferan reprezantan dan bann distrik pou pran en tel linisyativ, pou kapab angaz sa kous popilasyon pou kapab antre dan travay.

Me ozordi zour sa i en defi. E alors pou bann ki pou'n ariv en serten laz, ki mannyer eski nou pou kapab sirmont sa defi. E mon pe profite la kantmenm i pa spesifikman relye avek trezyenm mwan, i en keksoz ki relye avek travayer. E alors mwan mon pou soumet sa devan avek zot.

Pou terminen Mr Speaker, sa slogan "Sesel pou tou son zanfana" in kre en platform pou tou travayer irespektif ou krwayans politik, irespektif ou lideoloji politik, irespektif ou afilyasyon lepase, pou ou ozordi travay.

Pou ou ozordi menm eksprim ou lopinyon, me selman konnen ki politik i

annan son moman. E ou pa pou kapab anmenn li dan travay parey bann politisyen irresponsab lo kote latab lo zot 34enm Kongre ti'n dir "anmenn travay dan politik."

Be sa bann kalite mantalite nou pe sey *do away with it!* E ozordi, ozordi wi, ler mon ti'n antre koman en Onorab, ler mon ti war bann ansyen *civil servant* ki mwan mon ti konn zot afilyasyon politik dan mon lespri. I *embrace the spirit*.

E i annan en bon pe zot ki pe delivre pou nou pei Sesel, kantmenm zot, zot ti annan en afilyasyon politik. E ozordi zot pe war travay ki Gouvernman pe fer i dan lentere pep Seselwa! I pa dan lentere en parti politik! Se sa diferans ant nou avek zot.

E silvouple, silvouple ase konfiz sa pep. Aret sey senm en bann lideoloji ki zis la pou konfiz sa pep. Koz laverite! Donn solisyon lo ki mannyer nou kapab amelyor sa *framework* ki an plas. Dan plas fer politik bon marse. I fasil pou fer politik bonmarse.

Me selman i enportan ki zot koman en Lopoziyon, si zot kontinyen fer sa ki zot, zot a pe fer zot pou bouz aver disparisyon dan bwat vote! Pa disparisyon parey zot, zot ti fer

avek nou bann ser ek frer dan lepase. Mersi Mr Speaker.

MR SPEAKER

Mersi Onorab. Mon a donn laparol Onorab Michel Roucou.

HON MICHEL ROUCOU

Mersi Mr Speaker. Bonzour. Bonn apre midi Minis ek ou lekip. Bonn apre midi tou Manm Onorab. E bonn apre midi tou zabitan Mont Fleuri.

Mr Speaker, oparavan pou ou ganny en pti *bonus* ouswa ganny en pti larzan lafen lannen, ou ti bezwen esper Minis apre lannen dan parti *end of year* travayer pou li dir si ou pou gannyen en pti larzan, en pti *bonus*.

E souvandfwa, si sa msye pa ti dan son bon *mood*, ou ti riske pa tann naryen si ou pou gannyen. Ki ti kit sa laplipar travayer bokou fwa lo doutans.

Mr Speaker, ozordi nou Gouvernman in fer li vin en fason ki tou travayer dan en fason travayan kot ou donner ki lafen lannen ou konnen poudir i apre en lannen ki ou'n donner, parey tou Manm i dir se ki ou konnen poudir *at least* ou pou ganny en pti benefis ki ou'n donner.

E ler mon'n asize Mr Speaker, mon'n ekout byen Minis, se ki sa Prozedlwa ki in

anmenn kot nou, se ki pou fer sir ki i annan en kontinyasyon 2023, 2024 ziska 2025 ki bokou dimoun atraver *appraisal* ki pou ganny fer, ki zot a kapab benefisye dapre lo kantite kouraz ki zot in mete dan zot travay, pou zot kapab ganny *appraise* pou zot kapab ganny sa trezyenm mwan saler.

E petet Minis dan son taler, ler i pou retournen pou donn son bann largiman ki in tandé. Si Minis i kapab dir nou si i annan en travay ki'n ganny fer. Parey in ganny dir se ki dan Bidze ki'n fek pas devan nou la, se ki i annan bokou *savings* ki'n ganny fer.

Si i annan travay ki ou Minister in fer, avek bann departman kot zot in war plis bann departman ki in annan bokou plis *saving*, pou konnen si vreman ki i annan.

Eski i annan problemm kot travayer pa pe performen li menm li. Ouswa si i annan landrwa kot zot in vwar parey bann Manm in dir oparavan, ki zot in war landrwa petet pa'n swiv bann regilasyon ki'n ganny mete pou *performance base* li menm li.

E apre osi Minis, e osi lo kote sa form ki in ganny tous lo la osi tou, nou osi nou'n war parey bann Manm ki'n ganny dir se ki i en form ki ou bezwen

i pran sitan bokou letan. Ankor nou bann Onorab pou nou *appraise* nou *clerk*, nou annan zis enn.

Be petet i annan serten bann departman ki i annan apepre plis dimoun ki zot, zot bezwen *appraise* plizyer *staff*.

Si sa petet sa pa ede pou petet kot i annan en pti pe bann defayans li menm li, kot sa petet ler zot a kapab si zot pou revwar en pti pe sa form li menm li pou gete.

E osi Mr Speaker, petet dan sa travay ki pe ganny fer i petet en fason lankourazman. Mon rapel en letan, mwan mon ti ganny aprozé koman en zofisye ki ti travay kot *Housing*. Kot mon ti *team up* ansanm avek bann zofisye Lanplwa, mon rapel Mrs Dookley sa letan bann plizyer lezot zofisye, kot nou ti al dan bann landrwa parey dan bann *ghetto* pou koz avek bann dimoun ki frekant dan sa bann landrwa.

Pou konnen aköz zot pa dan en lanplwa li menm li. Kwa ki pe anpes zot antre dan en lanplwa? I annan serten keksoz ki pe dekouraz zot, pou zot kapab ozordi war zot dan en lanplwa. Petet si sa travay i kapab ganny fer.

E osi get en pti pe bann lorganizasyon, e osi bann departman parey dernyen fwa

mon rapel nou ti annan en vizit ki Komite Defans ki mon lo la nou ti fer lo *airport*. Kot nou ti zwenn avek bann zofisye SCAA, kot zot ti dir avek nou poudir i mank zot en ta manm pou zwenn AVSEC.

Konmsi zis gete si i annan serten travay kot nou kapab ganny bann zenn, akoz laba i annan bokou loportinite kot SCAA. Plizyer keksoz ki ou kapab aprann, akoz i en lazans ki *deal* avek bokou keksoz enternasyonal.

Kot petet sa i ava vin en loportinite kot bann zenn i a kapab montre lentere. E osi parey mon'n tann Minis Rangasamy ti dir kot zot pe envit bokou zenn pou zwenn zot departman kot *Housing*.

Kot sa petet nou a kapab ganny plis zenn ankor pou antre dan bann plizyer domenn dan bann landrwa travay, ki dan plas nou tann bann zenn pe dir zot pe *apply* plizyer landrwa akoz zot pa pe ganny, petet zot pa pe ganny larepons bann keksoz koumsa.

E Mr Speaker, mon osi apresye ki Minis in dir se ki menm ki ou pou'n antre travay apre le 31 Zanvye, ou pou kapab ganny *appraise* pou ou kapab ganny en serten poursantaz lo *performance*. E sa i ava kapab ede kot i annan plis

dimoun ki malgre ki apre i a tir en pti pe sa dout li menm li. I a donn en pti pe plis sa klarifye.

E mon kontan ki nou Gouvernman in ozordi ekout bokou bann konsern ki bann dimoun deor ti annan. Ki sa i a ede kot bann dimoun i konnen poudir me malgre ki mwan mon pou antre travay, oubyen mon pe sanz lanplwa, kot mon ti pe travay pou serten kantite letan, mon konnen mon pou annan serten poursantaz laba ki mon pou ganny mon trezyenm mwan saler.

Oubyen si mon'n antre dan serten dan en lot lanplwa ouswa si mon'n transfer, kot la i annan serten bann *rules* ki'n ganny mete la, ki mwan demen mon ava kapab benefisyé.

E sa osi Mr Speaker, sa trezyenm mwan saler li, i pa pe ganny mete ki nou pa pe dir ki ou merit ganny zis sa 50poursan. Si ou pe donner ou landrwa travay i war poudir ou merite.

I annan serten landrwa ki dimoun in ganny bokou plis ki 70 poursan. E si ou pe donner dan ou travay, ou merite gannyen, ou pou gannyen ou.

E menm si fodre ganny 100 poursan Mr Speaker, ou pou gannyen. E nou, nou bezwen kontinyen ankouraz nou pep pou nou vin en pep

travayan, kot nou kontinyen travay, nou kontinyen anmenn sa ledikasyon espesyalman atraver nou bann *leaders*.

Fodre pa toultan ki i annan serten size ki nou bezwen fer politik avek. Me selman nou bezwen donn lanmen ki demen aköz, sansan dan le fitir Mr Speaker, nou pa pou ankouraz bann zenn ki pou vin apre nou pou zot annan lentere pou zot antre dan travay.

E zis parey mon ti pe koz avek en *businessman* Mr Speaker, i dir ek mwan koumsa poudir ti annan bann marmay ki ti pe fer *attachment* avek li dan son biznes, aköz ler zot ti pe lekol *SIT*.

E apre ki zot in fini *graduate*, in al rod sanmenm sa bann marmay pou vin travay ek li ankor. Me sa bann zanfan i dir ek li non, la nou'n fini lekol nou deside pran lan pou nou asize, pou nou *relax* apre nou a gete ki nou pou fer.

I sa bann mantalite ki nou, nou bezwen tire dan nou pep e edik nou zenerasyon ki ler zot antre, bann ki pou pran larelev pei. E sansan nou pou annan bokou lenkyetid la deor. E demen ki pou arive avek fitir nou bann dimoun ki pou vin bann fitir *leader*.

E sa nou bezwen komans atraver nou. Nou bezwen anmennen sa ledikasyon, atraver fer sir poudir i annan bann *rules* ki pous bann dimoun, pou zot kapab pous zot lekor devan. Pou zot kapab donner dan travay.

Aküz ozordi mazorite fwa ou tann dimoun pe konplent an term lo kote servis ki zot gannyen dan diferan departman ouswa dan bann landrwa prive.

Be si nou pa komans li la Mr Speaker, kot tou dimoun i konnen ki demen bomaten i leve i pe ganny 100poursan. Demen bomaten mon leve mon al kot Dokter, mon konnen poudir mon garanti mon 100poursan.

Be si mon konnen poudir be mon konnen poudir *weekend* in pase, lasemenn mon annan en responsabilite pou mwan antre dan mon travay pou mwan vin donner.

E mon konnen poudir lafen lannen kot mon pou kapab ganny *appraise*, pou mwan kapab ganny mon poursantaz, pou mwan ganny mon trezyenm mwan saler. Sa i pou ede Mr Speaker.

E mwan mon pou donn mon *full* sipor sa Prozedlwa. Aküz mon war poudir se ki nou pep la deor i bezwen sa, sa *push*

si ou kapab dir, pou nou kapab anmennen pou fer sir poudir nou pe donnen dan travay. Kot nou pep la deor pe ganny sa servis, ki ler zot al dan nenport ki biro pou demen.

Akoz konmela laplipar landrwa i annan en rekomandasyon, ki laplipar landrwa i annan en bwat ki laplipar dimoun i kapab ekrir dir ki mannyer in pase, ki servis in gannyen. E petet sa osi tou lekel dimoun ki in war.

E bokou landrwa ler ou ale, konmela i annan bann sistenm modern kot ou kapab dir. Si ou al kot *Cable*, ou pou war ki servis ou'n gannyen – ki mannyer ou'n war sa servis ki ou pe gannyen.

E tousala i petet bann keksoz ki petet nou devret anmennen, dan bann Departman Gouvernman ki ler sa dimoun in ganny sa servis, i kapab dir ki mannyer in war sa servis ki li in gannyen; ki i ava vin en lot nivo *appraise* an term lo nivo sa departman li menm li, lo nivo sa lakonpanyen, ki sa i a ed zot Mr Speaker, i a ed zot pou zot kapab lev en pti pe sa nivo, lev sa standar. Mersi.

MR SPEAKER

Mersi Onorab. Bon in arive letan pou nou pran poz. Mon pou verifye mon lalis avan nou

separe. Lo kote isi mon annan Onorab Loze, Gill, Cosgrow, Gabriel e Pillay.

Lo kote isi mon annan Onorab Arissol, Bastienne, William, Woodcock, Monthy, Georges. Eski mon'n mank okenn dimoun? Donk, mersi nou lalis i koumsa. Nou a pran poz e nou a rebran 2er. Mersi.

(BREAK)

MR SPEAKER

Bonn apre midi tou dimoun. Mon prezant leskiz avek tou konsernen. Bann Manm, Minis ek son delegasyon e nou piblik osi pou sa retar ki'n arive. Akoz nou'n ganny pri dan en travay Komite. Nou a kontinyen ek deba. Mon pou donn laparol Onorab Loze.

HON JOHAN LOZE

Mersi Mr Speaker. Bonzour Mr Speaker. Mr Speaker, dernyen fwa ki sa morso Lezislasyon ti devan nou Lasanble, sete pou distrik trezyenm mwan saler pou lannen 2022. *Now*, enn bann pozisyon ki nou, nou ti pran dan nou *Caucus*, sete ki nou ti kont sa zistwar *performance-based* kalkilasyon - *assessment*.

Nou ti fer kler ki nou kont, e nou ti elabor nou bann largiman aköz? Mon rapel ki

mwan personelman mon ti met devan konmkwa ki sa i pa ti en Polisi Gouvernman *LDS* parey nou ti pe ganny fer krwar. Me ti plito en restan *IMF* avek *World Bank* ki zot ti vin zwenn la, zot ti'n adopte e zot in dir ki zot pou *go along* avek sa koman *best principle*.

E lo lot kote latib, zot ti ensiste avek nou ki sa ti en bon keksoz. I ti parey pti lanmann ki'n sorti dan lesyel ti'n tonm lo later. E alors nou tou nou ti pou bezwen al avek. *Performance based* ti pou 50/50, apre la sa lannen i ti sipoze *full* kalkilasyon.

Me ki'n arive? Sa kin arive se ki enn bann pli move performans ki'n arive se lenplimantasyon sa *assessment performance-based*.

Pa ti'n pare li, nou pa ti'n form dimoun ni dan Gouvernman, ni dan sekter prive. Nou'n vini nou'n fer gro bra, nou'n pas Lalwa, nou'n al avek. Apre nou'n bezwen taye retourn lo televizyon vin re eksplik dimoun.

E an eksplik nou'n kre en lot *mess* ankor ki'n senm konfizyon parmi popilasyon. La zot vini sa lannen, olye enplimant sa *full* baze lo *performance base*, zot vin avek 3 an ankor kot i pou 50/50.

E nou'n ganny dir ki 2026 la prezan i pou al *full*. 100poursan i pou baze lo *performance-based assessment*. Mon annan keksoz ki mon oule dir avek Lepep Seselwa mwan.

Sa Gouvernman *performance-base*. I pa pou la 2026. I pou aret fatig zot avek zot bann sotiz *performance base* an 2026. E travayer Seselwa i pou ganny son trezyenm mwan saler ki zot in ganny vole dayer an plen.

Zot pou ganny zot *performance*, zot trezyenm mwan saler pa baze lo *performance base*, me baze pirman lo lefe ki zot in travay, e ki zot deserve en trezyenm mwan saler.

Zis parey sa rapor ki nou'n site yer, ki'n propoz bann saler *up to* R239 mil pou en endividi. R166 mil pou en lot endividi, R133 mil pou en lot endividi par mwan e bann *end of term* ki pou *up to* R3 milyon.

E i annan en keksoz enteresan ki pe devlope. I annan en largiman ki pe ganny aranze konmkwa, napa larzan pou donn dimoun *full* trezyenm mwan. Taler en Manm in dir be kot larzan pou sorti.

Me yer nou ti ganny dir poudir sa Komite ki'n prodwir sa rapor ki nou, nou ti pe

kestyonnen dan Lasanble ki'n vin ek bann gro saler R239 mil pou en person, nou ti ganny dir ki sa Komite i annan bann akter ekonomik lo la.

E sa Komite zot bezwen konnen kantite larzan i annan dan lekonomi. E ki lenpak i pou annan, e si zot in met sa bann sif alors i annan larzan. Sa nou ti ganny dir apre ki Onorab Gill ti'n poz en keston. So, bann eksper lo Komite in kler ki i annan larzan pou pey bann saler *up to* R239 mil.

E bann gratwite 5an *up to* R3 milyon, be napa larzan pou pey travayer zot trezyenm mwan saler. So, travayer pou ganny zot trezyenm mwan saler li i bezwen pas tes, dray dan *cone*, al fer *reverse* lo *car park* kot *IDC* laba.

E mwan depi 6enm Lasanble, ler nou ti pe diskit 5poursan saler i annan en keksoz ki mon ti met devan mwan. Zanmen, isi anndan la, zanmen i annan ase larzan pou sa ki pli ba. Toultan i annan larzan pou sa ki anler, pou sa ki pli o. Napa problem pe pey sa ki anler.

Be annou retourn lo sa zistwar *performance-based assessment*. Zot oule laprev ki pa marse? Mon a donn zot zis enn de legzanp. Taler nou'n ganny dir si *supervisor* i dakor

ouswa i dalon avek serten travayer, la i gannyen. En lot Onorab in dir *performance model* ki pli *less cumbersome*.

Mon krwar mon'n ganny sa fraz lanver byen, in demann zot pou vin avek en *performance model* ki pli *less cumbersome*.

Vedir zot *performance base model* ki zot annan i *cumbersome*. E sa zot prop Manm ki'n dir laba lot kote. I annan en lot mon'n tande, bann ki pe fer *appraisal*, i enportan ki nou onnet. Annou pa ser nou frer Seselwa.

Bann ki pe fer *appraisal* i enportan ki nou onnet, annou pa ser nou frer Seselwa. E sa i parol bann Manm *LDS*, i zot *appraisal of the appraisal process* ki mwan mon pe dir zot pa'n marse.

Ki mwan mon pe dir zot i en *utter and complete failure!* E zot konnen zot poudir in en *failure*. Selman ki arive ozordi, Gouvernman i reve e ler i fini reve, i leve e i enplimante sa ki in reve apre ki i leve.

Me ki bor ki kapab sey dir Gouvernman, be non se isi anndan. Normalman nou isi anndan nou devret dir ek Gouvernman non, *Hold on* en moman la ou mal.

Be lamazorite i en *chorus line* pou Gouvernman! Zot fonksyon se zis sant refren sa ki

Gouvernman i anmennen. E se sa rezon ki nou pep pe ganny en *very raw deal* ozordi. I annan en nespes kolizyon ant Legzekitiv e mazorite dan Lasanble kot mazorite i fer fonksyon en *chorus line* zis i sant en refren, i sant louanz pou sa ki Gouvernman in anmennen.

Mwan sa parti ki mon reprezante, dir mwan sa ki zot oule, nou pozisyon i tre senp. Pey trezyenm mwan saler an plen san okenn kondisyon. Si ou oule met en *performance-based bonus* sa en keksoz separe. Vin avek en *performance-based bonus*, anmenn son Lezisasyon nou ava aprouve.

Ou konnen, dimoun i sitan konfize kot la an 2023, en dimoun i dir ou koumsa ou konnen lontan pou ou ganny en pti larzan lafen lannen fodre esper Minis dan parti *end of year*, si i kontan i a donnen.

Be, ki lannen sa? Nou pa pran *best practice* ki nou ti pe aplike avan ki nou'n sanze? Nou pa pran li depi letan ki nou'n donn trezyenm mwan, ki Seselwa ti pe zourir son trezyenm mwan? Oule fer mwan krwar ki nou pou fer krwar Seselwa la deor ki i pa ti pe *enjoy* son *end of year benefit* san okenn kontrent lo li?

Nou sitan konfize? Mon a donn ou en lot pti legzanp Mr Speaker, kot *we sang as chorus line* isi anndan. Dernyen fwa, ki Minis ek son delegasyon ti isi, i annan zis en Manm ki ti lev sa bann papye *performance-based assessment* pou clerk Lasanble Nasyonal anler. Ti lev anler ti dir gete, la mon annan dan mon lanmen i tro gro, i tro, i tro konplike en 15enn fey papye. Johan Loze.

While zot, zot ti pe bat lanmen ti pe sant louanz, bravo i bon fantastik Minis - *good job!* La ozordi zot pe met laliny, ou trouv enn par enn pe denonse ki sa *process* pou nou *clerk* i tro konplike. Akoz nou pa dir at the *start of the race that there is a problem with the track*, ki nou pe al tay lo la? annou dir ki depi lo komansman poudir i annan fot lo sa ki pe al ganny fer.

Annou dir Minis, annou ed Minis. nou pa dir fot avan i fer? Nou esper fini apre nou dir Minis; Minis ti annan en fot ek sa ki ou'n fer, sa i tro konplike.

Be Minis, si pou nou prop *clerk* nou Manm Lasanble, pou nou prop clerk nou pa'n dir ou nou pa'n gid ou. Nou pa'n ed ou dan sa travay ki ou pe fer. Nou esper fini, nou esper ou retournen lan pli tar pou nou dir ou be ou konnen kwa Minis,

sa ti tro gro, ti tro lour, to tro konplike.

Be Minis be ler ou ti donn zot 15 fey papye pou ranpli konmsi, zot pa ti war poudir 15 fey papye i tro bokou? Non, akoz Loze ki'n dir. Akoz Loze ki'n dir, alors zot pa pou antre ladan, nou a zwe bliye nou a les 1an pase, 12 mwan pli tar nou a koz lo la.

MR SPEAKER

10minit Onorab.

HON JOHAN LOZE

Yes, Mr Speaker. Mr Speaker, (ou tande Onorab Larue, mon dir ou ler ou pa dan Sez i trankil li, dezord zis ler ou la, ki zot fer) Mr Speaker. Sa pep i *deserve* reprezantasyon. Sa pep i *deserve* en Gouvernman ki *rise to the level* ki sa pep i bezwen. E mwan en keksoz ki mon poudir, Seselwa ganny byen kler.

2026, ki ou pansyon, ki ou trezyenm mwan, ki ou *long service allowance* tou sa bann keksoz ou pou ganny *the best deal*, ki ou kapab gannnen avek en Gouvernman *United Seychelles!* Mersi Mr Speaker.

(APPLAUSE)

MR SPEAKER

Mersi Onorab. Laparol pou Onorab Sandy Arissol.

HON SANDY ARISSOL

Mersi Mr Speaker. Bonn apre midi Minis ek ou lekip. Bonn apre midi tou Manm Onorab. E bonn apre midi tou bann dimoun ki pe ekout nou. Mr Speaker, mwan ler mon get devan lo latab *panel* enkli kot Mr Monnaie i asize ek sa fiy o bor li, mon pa war en group *failure*. Me mon war bann profesyonnel Seselwa ki travay *nuit au jour*. Zot antre dan lakour tar, e zot sorti kot zot granmaten pou sey asize pou gete ki mannyer nou kapab soulaz nou Seselwa.

E pou sa mon anvi felisit zot e dir zot kontinyen sa bon travay ki zot pe fer.

(APPLAUSE)

HON SANDY ARISSOL

Mon pa war zot koman bann *failure*, parski letan nou koz trezyenm mwan saler, mon osi toultan mazin pei. Ler mon get mon pti pei Sesel, ler mon rapel mon ti a pe grandi, toultan mon rapel mon manman ti travay lotel. Sa bann letan ti *Seychelles Hotel*, nou ti bezwen al sers zwenn li dan bor semen minwi, 1er bomaten, parski sa letan transpor pa ti ariv pre ek lakour.

Ti napa en kantite lalimyer. Mon rapel bann dimoun ki ti travay parey mon boper Alfred Marie 43an dan PUC, toultan ti dir ek nou ti napa *excavator* sa bann letan, zot ti servi pik avek lapel.

Menm parfwa ti napa *boots*, ti napa legan pou zot travay. Be letan mon get mon pei Sesel, Sesel in ganny batir par en group dimoun ki ti travay dir.

Bann Seselwa zonm ek fanm ki'n konstri pou anmenn pei kot mwan mon'n zwenn ozordi. Mazorite zot sa bann dimoun, pa ti ni menm konnen si ti annan en trezyenm mwan saler, si ti annan en *bonus*, si ti annan *service charge*, si ti annan *long service award*.

Me zot ti travay dir Mr Speaker. Zot ti leve granmaten, mars long zistans parey nou tann dir, en pe ti marse ziska Anse Royale. Sa ki ti reste Port Glaud ti desann ziska lavil. Sa ki ti Baie Lazare ti marse, zot dir mwan ziska la kot *airport*.

Kot *airport* zot dir mwan ti annan en ros la, ki lanmer ti bat la kot zot ti arete pou zot pran zot *dejeuner*. Se sanmenm sa ki prezan i apel Anse Dejeuner sa landrwa.

So, bann Seselwa ti kontan zot pei. Zot ti leve granmaten, zot ti al debourye

pou anmenn pei kot nou nou'n pran ozordi koman bann zenn.

Mon komans koumsa Mr Speaker, parske mon krwar sa i kiltir ki nou, nou bezwen kiltive dan nou zenes e dan nou dimoun ki la ozordi. Se sa kiltir travay dir, donn tou avek bi pou ou ganny en keksoz. Alor se pou sa rezon mon toultan mazin bann dimoun aze.

E se pou sa yer Mr Speaker, mon ti dir, mon toultan ankouraz mon Gouvernman pou kontinyen rode. Pou rod fason, mwayen pou nou kontinyen asiste nou bann dimoun aze.

Letan zot dan lakour pe get nou, pe ekout nou lo radyo pou nou rode kwa ki nou kapab met en keksoz anplis dan zot pos.

En keksoz ki rezonnab e soutenab, pou ki zot viv dan dinyite e pou zot kontiny zot lavi akoz zot in travay dir pou nou zwenn sa Sesel ki nou, nou'n zwenn ozordi.

Mon ti a kontan komanse par dir letan nou pe koz, mwan mon en dimoun ki krwar dan performans e mon pou toultan pe siporte sa lide performans. Akoz mon dir sa?

Mon'n travay 10an dan ledikasyon koman en *staff* Minister Ledikasyon. Parey Onorab Kelly Samynadin in dir,

mon rapel dan mon letan, letan mon ti kot lekol toultan mon mazin Ms Marie-Ange Moustache en *librarian*.

Mon mazin sir Philip Gomme en lab teknisyen. Konnen ki zot ti fer sa bann dimoun? Souvandfwa letan ti annan en mankman ansennyman, swa sa ansennyman i malad, swa i pa'n vin travay, swa son zanfan i malad, swa sa ansennyman ki'n al konze ki pa'n retournen parske in antre tar, sa bann dimoun ti vwar zot ti bezwen kouver laklas sa bann ansennyman.

Al get zanfan, vey legzanmen. Be kestyon ki toultan ou demann ou lekor, eski sa bann dimoun ki pe kouver lezot son kanmarad ki pa la, eski son trezyenm mwan i double Desanm? Zanvyé.

Eski i ganny en pti pe anplis lo son trezyenm mwan, lapenn ki in kouver Sandy Arissol ki pa'n vini? Non, i pa leka. Me Sandy ki'n deside pou li pa vini aköz li menm li ki son zanfan toultan i malad, oubyen li menm li Sandy ki'n byen bwar *weekend*, alor i bezwen raport lopital tou le Lendi pou li ganny en pape 2 zour, 3 zour.

Letan Sandy in deside aköz i annan en promosyon pe fer *Dubai* ki komans Zedi pou li tourn Dimans, i ale, e selman

Dimans i mank avyon e Lendi i pa vin travay, e en lot dimoun i bezwen kouver li.

Sandy li, i pou ganny menm trezyenm mwan ki sa enn ki'n kouver li en lannen antye. Mr Speaker, me letan ou asize ou balanse eski sa i lazistis ki nou koman Manm Lasanble nou pe rode pou nou travayer Seselwa la deor?

Eski sa refleksyon ki nou anvi anvoy ek mon zanfan ki mwan mon annan, koman en papa la deor, poudir ek li,

“Boy Dadi in donn ou sak, liniform, bolpenn, kaye, kreyon la prezan al dan laklas Mis Sheryl donn poum mannyer oule ou; pa aprann ou, aköz Dadi in fini pey en lasirans lavi pou ou. Ler ou pou ganny 18an ou pou ganny ou 2.5milyon lo ou kont. Pa aprann lekol ou, zis al lekol.”

Se sa kalite latitid ki nou koman Manm Lasanble nou anvi pase avek lazenes? Nou zanfan ki pe ekout nou laba deor?

Se sa mesaz ki mwan mon anvi anvoye? Non! Pa sa ki mon paran ti dir ek mwan. Mon paran ti dir ek mwan mon bezwen al lekol pou mwan aprann lir ek ekrir, konte. Pou mwan sorti byen dan lasosyete, pou mwan travay kontribye pou mon kapab ed mon pei parey

mon pei in ed mwan. Se sa ki mwan mon krwar dan performans Mr Speaker.

E se pou sa rezon mon ti siport *Bill* Trezyenm Mwan ler i ti vini. Mon ti vote mwan letan *Bill* Trezyenm Mwan ti vini.

Ler Lopozisyon ti propoz e ki i vin 100poursan, Gouvernman ti ekoute ti dir *ok*, i donn 50poursan otomatik. Mon ti vote menm mwan Mr Speaker. Parske mon ti kontan bann travayer Seselwa ki pe travay dir.

Se pou sa rezon mwan Sandy John Arissol mon fer sir letan Bidze i vini Desanm, mon siporte Mr Speaker.

Ou konnen akoz mon siporte? Parski mon anv i ki tou Seselwa ki travay dan sa pei, zot kontinyen ganny zot saler. Zot kontinyen ganny zot trezyenm mwan.

Zot kontinyen ganny tou zot bann benefis ki vin avek zot tann servis, zot gratwite. Ki bann trwazyenm az i kontinyen ganny son sekirite sosyal parey i ete dan Bidze.

Pou ki bann zanf an i kontinyen al lekol. Bann ansennyan i kontinyen ganny peye. Se pou sa rezon mon siport Bidze. Parske mon pou toultan siport travayer Se..sel..wa! Sirtou bann ki debourye dan lavi.

Dezyenmman Mr Speaker, mon krwar dan performans. Dezyenmman, letan ou koz ek piblik an deor nou tou ki la nou'n koze ek bann dimoun. E bann dimoun i dir ek nou, i pa balanse. Parski en dimoun ki li i pa vin travay, i pa kapab ganny menm benefis avek enn ki pa debourye dan lavi. Pa zis nou ki koz lo la sa.

Nenport ki dimoun ki nou koz avek deor i dir ek ou, i mal parske li tou le Lendi li i fer krwar i malad li.

Toultan son fanmir ki mor dan lakour.

Toultan son zanf an ki malad. E dimoun i dir ek nou sa. Se pou a rezon mwan lo sa kote latab, mon ti krwar dan performans. Parske mon ti osi ekoute ki sa ki dimoun letan ou koz ek zot, zot dir avek ou deor Mr Speaker.

Parske Seselwa i balanse li. Seselwa i byen ek ou, me ler i konsern son larzan i pa byen ek personn.

I anv i ki si i travay ou pey li. E i konnen ki son dalon pa travay, alor i dir ek ou non li in kale li. E nou tou nou konnen letan ou kale ki ou vini Mr Speaker.

Mon trwazyenm pwen an relasyon avek sa Proze Lalwa. Ozordi nou annan en problem dan nou pei. Ozordi tou dimoun

i dir ek ou, pou son biznes bouze, pou son laferm marse, pou gannyen en dimoun pou get son vye paran i koz zis etranze, etranze, etranze!

E nou tou nou konplent lo etranze. Zot ler mon al lo lans Beau Vallon mon war zis etranze. Ler mon al lavil mon war zis etranze. Be si nou, nou pa komanse koman bann dimoun responsab dan Lasanble Nasyonal, pou nou komans kiltiv sa lespri travay dir, leve debourye ed ou pei, ed ou lekor, ed ou fanmir.

Mr Speaker, be eski nou pou kapab ranplas etranze en zour dan nou pei? Non, nou pa pou kapab.

Si nou kontinyen kit sa kiltir ek dimoun, annou zis donn li son trezyenm mwan otomatik. Akfer kestyonn li? Donn li son larzan!

Mr Speaker, nou pti pei pa pou al pli devan, i pa pou al lwen. Me politikman pou ganny vote, wi, ou pou gannyen. Parski dimoun koumsa i kontan li, desann fer en pti papye al war Minis ou a ganny en pti larzan mon *boy*, pase al laba ou, ou pa bezwen travay ou. Ou pou gannyen vot lo la.

Me eski i soutenab pou nou pei? Eski i bon pou nou pti popilasyon? Eski i legzanp ki nou donn nou zanfan? Se pou

sa rezon ki mon pou siporte Mr Speaker, sa Prozedlwa. Parski mon anvi keksoz ki bon pou mon pei, i bon pou mon pei.

Mon kontan letan mon'n tande poudir bann trwazyenm az, pe propoze ki bann trwazyenm az i ganny en trezyenm mwan saler.

Me Gouvernman in la pandan 43 an, zanmen zot in propoz en trezyenm mwan saler pou bann trwazyenm az. Me sa ki zot ti propoze pou trwazyenm az, se R50 sak fwa ki Mr Rene ti ganny son laniverser depandan son kapris ki i ti ete sa zour i donn zot en R50!

Be nou, nou bezwen osi et responsab! Se sa ki mon krwar ladan, mon kontinyen krwar ki mon Gouvernman i bezwen kontinyen soutenir tou dimoun, fer sir ki tou dimoun atraver sa 10poursan, rode ki mannyer nou kapab met en pe plis larzan ankor lo sa 10poursan.

Rode ki mannyer nou kapab soulaz nou trwazyenm az. Rode ki mannyer nou kapab soulaz nou bann zenn ki dan pos-segonder avek sa *allowance* ki zot gannyen, pou ki zot osi zot rezouir en fason ekitab Mr Speaker.

Lo sa Prozedlwa, mon pou siporte Mr Speaker, parski mon kontinyen krwar dan performans. Mon kontinyen

krwar dan mon Seselwa. E mon kontinyen krwar dan en Sesel ki bezwen bouz lo en nivo pozitiv pou nou kapab avans de lavan.

Mon ava aret la Mr Speaker, e mon anvi dir ek Minis mon pou donn ou *full* sipor pou sa Prozedlwa. Mersi bokou.

(APPLAUSE)

MR SPEAKER

Mersi Onorab. Mon donn laparol Onorab Desheila Bastienne.

HON DESHEILA BASTIENNE

Mersi Mr Speaker. Bonn apre midi Mr Speaker. Bonn apre midi Minis ek tou ou delegasyon ki la avek ou. E bonn apre midi tou Onorab e tou dimoun a lekout.

Mr Speaker, lamannman ki lo sa Prozedlwa ki devan Lasanble ki annan pou fer avek peyman trezyenm mwan saler pou anmenn bokou soulazman pou tou nou travayer ki leve byen bomaten e donn tou; pa zis pou zot fanmir, me osi pou lekonomi pei an zeneral.

Ozordi Mr Speaker, mon pe santi ki sa lamannman i pou fer bokou zistis. Akoz i pe osi anmenn enn de nouvo fason fer. Mr Speaker, dan sa Lalwa

ozordi i prononse ki 50 poursan i reste mandatwar. E sa lot 50 poursan pou reste ankor baze lo ou performans.

Mr Speaker, wi i vre ki serten dimoun ankor pe ensiste ki travayer i merit resevwar en trezyenm mwan saler plen. Akoz zot in travay en lannen antye.

Me mwan kestyon ki mon pe demande, eski nou koman travayer, nou vin fran avek nou lekor e evalye nou prop performans pandan en lannen antye? Ki ler nou komanse? ki ler nou fini?

Mr Speaker, dan lepase travayer ti war lo *ok* pou fer s aki zot ti anvi. Antre travay ler ki zot anvi, e byensir avek bokou leskiz kot menm dan en mwan se menm travayer ki pou vin avek 2, 3 a 4 konze dokter.

Li menm ki pa pou respekte ler travay. E menm pa pou respekte son bann koleg travay ki avek li, dan menm departman. Akoz i kontan kale, i kontan toultan profit lo lezot.

Mr Speaker, dan lepase menm sa fame stil "*work from home*", ki nou ti war? Letan ou pe *call* sa dimoun pou en lenformasyon, i pa pe reponn son *mobile*. E la nou demande be akoz?

Ler en dimoun i ale, dir be *ok* mon a sey al gete kot entel i

ete pou nou gannye tel lenformasyon, i sipoze pe “*work from home*.”

Ki ou dekouver? I a pe fer son miray, i a pe dormi, i a pe get son *film*, i a pe fer son zarden. Apre se li menm li ki merit 100poursan trezyenm mwan saler?

Ozordi Mr Speaker, dan sa Lalwa i fer kler ki 50poursan i mandatwar. E pou en travayer garanti sa lot 50poursan, i pou tre enportan ki i performen. I respe son travayer, son travay.

Pou li arive rezouir son zefor dan sa Minister, ouswa dan sa tel lakonpanyen. Mr Speaker, mon a osi dakor ki dan bann serten landrwa travay prive, i vre ki zot ti swazir pou pey zot travayer 100poursan zot trezyenm mwan saler. Sa ti a zot diskresyon, e osi satisfaksyon ki son bann travayer in anmennen dan son lakonpanyen.

Mr Speaker, i normal e akseptab ki ler en anplwayer i war son travayer vin tre prodiktiv e ede pou fer son lakonpanyen kontinyen grandi e fer profi, ki i demontre son lapresyasyon anver son travayer. Me si en travayer ki desann bomaten, i vini i zis kale rod tou sa pti kwen pou kasyet. Ouswa ler ou rod li, i dan bazar, i kot *hairdresser*. Akoz in

travay 3 ou 4an dan sa lakonpanyen, i oblize ki i ganny sa 100poursan trezyenm mwan?

Mr Speaker, atraver ou eski sa ki Onorab Uranie pe sey dir donn sa malere son trezyenm mwan? Menm si i pa travay, i pa delivre nek i tir la i met la, rekonpans li menm? Me Mr Speaker, sanmenm ozordi annan pa pe war sa fermal. Zot pa oule aksepte pou travay lo baz performans.

Akoz dan lepase koumsa ki ti ete. Ou pa travay? Me ou byen ganny peye, ou byen pase. La, la nou rezilta ozordi. Nou war li fermal pou nou travay, pou nou ganny nou saler ki nou merite.

Mr Speaker, letan trezyenm mwan saler ti ganny entrodwir, nou tou nou ti kontan. Akoz wi, i ti en soulazman anver tou nou bann depans lafen lannen.

Me ki nou ti war ankor Mr Speaker? Bokou travayer ti vremen donner, me bokou osi ti vin pli parese e abize dan nenport ki fason. Eski sa i normal pou sa anplwayer? Ou pa pe prodwir? Ou pa pe siport ou landrwa travay? Me selman oule byen pase?

Mr Speaker, parey Minis in dir dan son deliberasyon, lentansyon Polisi Gouvernman

dizour se pou elev performans e osi fer ki travayer i vin pli prodiktiv.

Mr Speaker, ler en travayer i vremen kontinyen donnen e donnen - parey i annan en Onorab in dir, byensir i ava ganny son rekonpans ki i merite.

Minis in osi dir atraver sa lamannman prezan trezyenm mwan saler pou osi aplike pou bann travayer ki'n komans travay depi Zanvyé. E si i arive ki pou en rezon ou en lot i bezwen kite dan sa travay pandan lannen, swa dan mwan Oktob ou mwan Novanm, ki i pou posib pou li omwen ganny en pti keksoz selon son performans deza.

Mr Speaker, sa lamannman pou osi vin koman en souldan pou serten travayer ki'n antre dan son landrwa travay, dan milye lannen. E ki le 31 Desanm i ankor pe travay, i pou osi kapab ganny par son performans.

E la Mr Speaker, nou a dir ki par ler en travayer ki antre dan son travay dan milye lannen. Me son performans i eksepsyonnel e i vo plis ki en lannen travay, ki lezot son bann koleg travayer ki ti la avan li.

E la byensir, son anplwayer i menm kapab

konsidere en tre bon rekonpans anver sa travayer.

Mr Speaker, mon mesaz pou tou bann frer ek ser la deor ki serye. Ki pran zot travay a ker e pare pou leve bomaten, lapli koman soley. Zot desann pou zot ariv travay, mon swet zot bonn sans, e bon kouraz.

E mon pou ankouraz zot pou kontinyen travay alaoter, pou zot prop benefis. E osi pou zot landrwa travay ki demen zot ava annan tou rezon pou selebre zot 100poursan rekonpans.

Mr Speaker, mon pou aport mon sipor anver sa Prozedlwa pou ki tou travayer Seselwa a kontinyen ganny zot trezyenm mwan pou sa lannen 2023, 2024 e osi 2025. Mersi.

(APPLAUSE)

MR SPEAKER

Mersi Onorab. Onorab Gill, ou annan laparol.

HON CHURCHILL GILL

Mersi Mr Speaker. Bonn apre midi Minis ek ou delegasyon. E tou Manm. E tou dimoun ki pe ekout nou. Mr Speaker, dan sa *Bill* i annan bann *clause* tel parey bann *clause 46C(g)(6)* ki dir ou ki en travayer in travay mwens ki 12 mwan, me le 31 Desanm i pa ti lo probasyon, i

devret ganny peye son trezyenm mwan saler lo en baz *pro rata*, enkli letan i ti lo probasyon.

Alors, mon ti a voudre demann Minis keston kot ler i fer son *Right of Reply* i ti a adonn nou en pe leklersisman. Sa se si en travayer in servi 6 mwan probasyon, me selman in komans travay le 1 Zen i vedir ki le 31 Desanm i fer son 6 mwan probasyon. E i pa decide kontinyen, eski i *entitle* pou li ganny son *pro rata basis* trezyenm mwan saler?

Menm senaryo i annan lo *clause 46C(g)(7)(a)* kot i dir si en travayer i kite travay lo probasyon, i pa devret ganny peye en porsyon son trezyenm mwan saler. Me ki i arive si en travayer i pe performen dan letan son probasyon, e son anplwayer ki pe donn li problem, ki arive dan sa lenstans, eski sa dimoun i kapab met en *grievance* pou li kapab ganny en rekour?

Apres nou osi annan bann lenstans kot en travayer i lo probasyon. E eski dan bann lenstans kot son anplwayer pa'n donn li bann lenformasyon an term son performans, dan bann lenterval ki rezonnab avan i fini son probasyon; pou si an ka i pa pe perform, pi li konnen pou li kapab aziste son lekor.

E dan sirkonstans ki son anplwayer pa pe donn li sa komunikasyon lo son performans, sa i pou dan dezavantaz sa dimoun si apres ler i fini son 6 mwan i pa ganny konfirman e i perdi son travay.

E dapre sa Lalwa mannyer i ete, i pa pou gannyen peye. Me selman i kler ki i pa'n ganny sipor son anplwayer, pou li kapab aziste son lekor.

I osi annan *clause 7* ki koz lo performan *appraisal*. Dapre sa *clause*, si en anplwayer napa sistenm *appraisal* an plas, sa travayer i devret ganny peye son trezyenm mwan saler. Nou'n tann bokou Onorab dir ki i bezwen annan *performance base*.

Akoz zot, zot krwar ki si en boug i kale, i pa kapab li i pe ganny menm saler ki en dimoun ki travay. Be la Lalwa menm ki dir pa bezwen *appraisal*. So, sey eksplik nou sa pou en mannyer sa bann ki ti annan bann dout pe dir ki i *compulsory* ou bezwen annan *appraisal*.

E la Lalwa i dir non, sa bout la pa bezwen *appraisal*. So, sey donn nou en leksplikasyon. Lalwa i dir ler ou napa en sistenm an plas, si sa anplwayer napa en sistenm an plas pou fer *appraisal*, i pou

bezwen pey sa travayer. Lalwa ki dir sa.

En lot konsern, se Minis in dir ki si en travayer son anplwayer i deside pey li son trezyenm mwan saler, me selman vi ki in performen, i pou pey li anplis.

Dapre sa Lalwa, sa dimoun pa pou ganny *exempt* sa bout anplis. Ni lo *income tax* oubyen *non-monetary benefits tax*. Sa bout par lao sa trezyenm mwan, i pou *attract* sa bann *charges*. E sa i *stipulate* dapre Lalwa dan *Cap 273*.

Me selman donnen sa kantite larzan ki nou pe koz lo la koman en trezyenm mwan saler. Akoz boner sa lannen Gouvernman ti donn en *relief* lo *tax* pou bann *businessman* ki fer profi 1 milyon. Si nou ti kapab fer sa akoz pou sa trezyenm mwan saler pou sa R1000, R2000 anplis ki i pou gannyen lo son trezyenm mwan, li i pa bezwen ganny *exempt*, *given* sityasyon ekonomik ozordi.

E nou tou nou konnen pri lavi i en *challenge*, petet ti a bon sa osi i ganny diskite ek Gouvernman, si nou kontinyen dan sa direksyon. Oubyen si nou kapab donn *businessman* serten *poursantaz* benefis, alors ti a bon lo trezyenm mwan saler osi en keksoz i ganny fer.

Dan - ler Minis pe eksplik son Lalwa i dir si en dimoun i al *training*, sa dimoun pou ganny peye en porsyon son trezyenm mwan saler.

Klarifikasyon ki nou ti a kontan gannyen se ler ou pe dir sa, eski ou pe dir ki ler sa dimoun li menm li ki'n *initiate* son *training*?

Oubyen son anplwayer ki'n anvoy li *training* pou kapab pous son abilite travay ki i en ed pou sa konpanyen. E dan sa sans mon krwar i devret ganny *pro rata*. Akoz sa ki i pe fer, i pou kapab prodwir plis dan sa konpanyen ler i fini son *training*.

Dan sa Lalwa osi, i pa'n fer mansyon lo bann serten konpanyen ki travay anba kontra avek Gouvernman. Mon a mansyonn parey bann konpanyen sekirite, oubyen bann travayer ki annan kontra netwayaz ek *LWMA*. Pou konpanyen sekirite, deswit sa Lalwa ler i pase i pou *effective* deswit.

Me selman dan bann kontra ki sa bann konpanyen i annan, i napa sa provizyon pou zot kapab met sa ler zot ti pe fer kotasyon sa letan. Akoz i pa ti en norm.

Me la ki sa Lalwa pe vini, ki pou arive? Vi ki sa bann dimoun i ganny zot kontra i

avek Gouvernman. Akoz sa ban dimoun ki travay ek zot, zot otomatikman annan en *grievance* e zot pou annan tou drwa pou zot al kot Lanplwa pou zot demande be ki mannyer mon pa pe gannyen?

So, la en konversasyon i bezwen ganny fer pou konnen, ki i arive avek sa bann konpanyen, vi ki sa pa ti form par dan zot rotasyon ler zot, zot ti pe *bid* pou sa bann travay.

E mon mazine vi ki sa dan Lalwa napa naryen ki koz lo sa lefe, mon krwar ki i en keksoz ki nou bezwen ganny leksplikasyon ki pou arive. An menm tan pou sa bann dimoun deor, kapab konnen ki zot fer, pou sa bann dimoun pa ganny *deprived* zot peyman vi ki i pou dan Lalwa.

E bomaten i annan bokou Manm ki'n *praise* bann travayer ki i byen. Akoz si nou lekonomi, nou annan dimoun pe travay pe fer keksoz bouze se akoz sa bann dimoun pe travay. Menm si i annan bokou koze lo bann dimoun ki pa perform, mwan mon pa krwar poudir nou annan en kantite dimoun ki pa perform.

Annefe nou annan plis dimoun ki perform. E alors eski sa bann *praise* ki nou ti pe fer bomaten. Kestyon se ki kantite lezitim i ete? Akoz la nou pe

diskit en keksoz ki pou sa bann dimoun.

Me selman nou pa kapab fer keksoz pli byen posib ki nou koman en Lasanble ti kapab fer, pou kapab benefisye sa bann dimoun. Alors mon swete ki nou koman Manm Lasanble, fodre pa ki nou donn leskiz si nou ekout nide e i pou *bankrupt*. napa responsabilite. Akoz tou keksoz i annan en fason fer si ou konnen ki mannyer pou fer. Mersi Mr Speaker.

MR SPEAKER

Mersi Onorab. Onorab William.

HON WAVEN WILLIAM

Mersi Mr Speaker. Bonn apre midi Minis ek ou delegasyon. Mr Speaker, i en plezir pou pran laparol e remersi Bondye. Remersi li pou gid nou bann dirizan ek lasazes e pridans dan fer e pran desizyon ki bon pou pei.

Mr Speaker, sa lamannman devan Lasanble, i levidans demars konsistan, pou gard Sesel lo en semen ekonomik soutenab.

Mr Speaker, permet mwan donn en pti bilan kwa ki lo rikord globalman lo sa size trezyenm mwan saler.

Serten Mr Speaker, pe ozordi koz lo katorzyenm e

kenzyenm mwan saler. Mr Speaker, trezyenm mwan saler i en koutim dan serten pei, e dan serten i ganny reglemante.

Sa fason fer i ganny pratike dan serten bann *top markets*. Son lorizin dapre resers in komans an *Philippines* kot en Dekre fer par Prezidan an 1975 ti vin an viger. E pli tar amande dan 1986, sirtou pou bann travayer ki travay an deor pei.

Pli tar Lanmerik Latinn, Lerop e Lazi ti osi adopte pratik ki zot bann travayer i ganny en trezyenm mwan saler. Ki vedir ki anplwayer ki pe anploy travayer etranze, i bezwen konsider trezyenm mwan saler dan zot *payroll* global.

Dan serten pei, trezyenm mwan saler i ganny regarde koman en *bonus*. Baze lo performans, serten i ganny kouver anba en stati legal, ki vedir ki travayer i bezwen ofer zot travayer san regard zot performans ouswa pozisyon.

Pou serten i mandatwar pou tou pei pey trezyenm mwan saler zot travayer etranze. Me dan diferan pei i depandan lo ki Lalwa nasyonal anfers vizavi trezyenm mwan saler Mr Speaker.

Dan serten pei baze lo diskresyon Lalwa ki anmars,

depandan lo performans e pozisyon.

Mr Speaker, a ler aktyel an Lerop i annan 11 pei Lazi, *Mediterranean* i annan 12 pei, Sid Lanmerik i annan 14 kot trezyenm mwan saler i an viger.

Resers i montre ki lo Kontinan Lafrik trezyenm mwan saler i pa tro komen, ziska pei tel parey *Angola*, *Nigeria*, Sid Afrik, *Morocco* ki pe pey trezyenm mwan Mr Speaker, Moris dapre resers pe koz lo en douzyenm peyman. En douzyenm lapey 1 mwan Mr Speaker.

Mr Speaker, mon pou aprouv sa lamannman avek sa pli gran portre devlopman ekonomik global. Bann lafors e lenfliyans zeopolitik, bann fenomenn klimatik e tandans devlopman e pratik komers mondyal.

Ki tousala zot enpakte direk e endirek lo rezilyans nou pti leta zil. Malgre ki i en *rating* Labank Mondyal koman en *middle income country* Mr Speaker.

Wi, lekonomi i an viger, e pei pe fer byen nou *Fitch Rating* in anba *BB Plus*, *BB Minus* Mr Speaker. Nou *Fitch Rating* Mr Speaker, *BB Minus*, e si menm nou remont *BB Plus* san ki nou dekouver delwil ouswa gas pou vann, sa lamannman i bezwen

ganny anmennen par Gouvernman pou gard kiltir travay dir lo son *peak* Mr Speaker.

Mr Speaker, *Fitch Rating BB Minus* menm si pei i lo bon semen, sa *rating* i ganny *translate* ki pei i ankor anba *high risk defaulted* peyman son bann det. E vilnerab ek bann sok mondyal ekonomikman.

Okenn kalamite nasyonal ki kapab arive, i kapab plonze pei dan en sityasyon kot i kapab pa pey son *loan* e atrakte bann investiser. Vwala akoz Sesel i bezwen al kot Fon Monneter Enternasyonal amba en program restrikte devlopman ekonomik pou gard li lo semen soutenabilite Mr Speaker.

Fon Monneter Enternasyonal i pa zis vin akonpanyy ou, me osi met restriksyon lo ou depans fiskal. Wi, Onorab, mon ti dir ki sa bann *rating* pa kwi dan kastrol pou Seselwa manze. E letan mon ti pe dir sa Mr Speaker, zot pa ti debout a kote mon, poudir.

Ozordi ler zot dan Lopozisyon zot pe sot lo sa ki mon ti dir an deor konteks. Se sanmenm sa lipokrizi Mr Speaker. Yer pa ti bon ler nou ti o pouvwar ganny dir. La ler nou dan Lopozisyon i *palatable* mon repete.

Mon pou vot lo sa lamannman ki pe ankouraz e diriz nou lafors travayer pou reste touzour performan, ek en krwayans for ki ler ou travay dir ou merit ganny rekonpanse.

Mon apresye ki Gouvernman pe asir ki travayer i kontinyen ganny sa 50poursan, san evalyasyon, me lot 50poursan i baze lo evalyasyon performans.

Mr Speaker, mesaz i kler, sa lamannman i devret ganny pran dan en fason pozitiv. Pou ed nou fer en evalyasyon personnel. Si nou pa ti byen performan pou nou *up* nou *game* e pou delivre dan sa nenport pozisyon ki nou ete dan pei.

Mr Speaker, serten i a dir akoz pa'n donn travayer son trezyenm mwan saler an plen san evalyasyon. Koman en pti pei ek pe resours, pe skente dan sa vilaz global, pou reste konpetitiv. E pe fer tou sa ki posib pou reste soutenab.

En Gouvernman pridan e responsab dan sa kalite klima ekonomik volatile ki konn son limitasyon, i pou reazir ek pridans, i pou reazir avek lasazes Mr Speaker.

Mr Speaker, nou pe trouv sa dans a lamannman ki devan Lasanble ki anliny e konsistan ek bann mezir ki'n ganny pran

pou gard Sesel lo sa semen soutenabilite, depi ler sa pep in donn li gouvrenans pei.

Menm si lezot pei sakenn pe fer li son fason baze lo zot groser lekonomi kapasite posibilite pou li kapab grandi ouswa fer grosi son lekonomi, napa en konvansyon ouswa en trete ki Sesel i form parti ki fors li Mr Speaker, pey trezyenm mwan saler.

En nenport Gouvernman i kapab fer li dan son fason ki i krwar i devret fer li. Baze lo en kriter ki vreman relevan dan konteks soutenabilite. Sa se lo baz performans. Akoz larises pei i ogmante ler en nasyon i performan. I bon pou travayer, e i bon pou pei akoz nou tou nou benefisyer Mr Speaker.

Mr Speaker, i ankor annan en leokri lo performans lafors travayer dan diferan sektor. La mon pa pe dir kou tou travayer i pares, ouswa pa oule travay. I annan en gran mazorite ki pe performen.

Mr Speaker, *savings* lo larzan Lepep, *taxpayers money* i larzan Lepep. I pa larzan *LDS*, i pa larzan *US* pou donn bal ladan e depans an fou. Epi kwa Mr Speaker?

(APPLAUSE)

HON WAVEN WILLIAM

Pep pou redonn ou pouvwar ler ou'n fer li faid, avek en politik iresponsab dan larzan Lepep?

Sa Gouvernman iresponsab i pe pran sa travay ki pep Seselwa in konfyè li o serye lo ladministrasyon larzan. Mr Speaker, Minis in dir ki si en Lazans Gouvernman napa en sistenm an plas pou evalye sa travayer, i pou bezwen pey sa travayer tou son trezyenm mwan saler.

Mon anvi konnen ki aksyon pou ganny pran ek bann ki iresponsab, ouswa pe rezenbe pou met sistenm an plas, pou evalye performans sa bann travayer Mr Speaker.

Eski pou fer lo lezot ki'n met en sistenm an plas, kan sa ki responsab lo en kote pa'n fer e i bezwen pey pou son evalyasyon. An terminan mon anvi envit tou travayer Seselwa, partou kot zot ete ki pe ekoute, pou konsider byen sa pi gran portre ki pe arive globalman.

E rezondet par deryer bann demars ki Gouvernman pe fer, pou ed ou valoriz ou performans.

Mon remerci tou travayer ki pe travay dir ki konsyan e konpran akoz travay dir. Felisit tou paran ki pe pous zot zanfàn, e sipòrt zot pou fer byen lekol. Mon felisit tou etidyan pe mazin al pli lwen posib dan lavi, pou

en travay desan. Ki Bondye i kontinyen beni nou pei Mr Speaker. Mersi.

(APPLAUSE)

MR SPEAKER

Mersi Onorab, Onorab Gabriel ou annan laparol.

HON CONRAD GABRIEL

Mersi Mr Speaker. Bonn apre midi tou bann dimoun a lekout, spesyalman zabitan Pointe Larue. *Welcome panel.*

Dabor pou komanse, mon rekonnet ki tou Seselwa i devret travay dir. Nou pa pou soutir okenn dimoun ki pares. En trezyenm mwan saler i en drwa, i pa en bonous zis parey Onorab Herminie in dir nou.

Nou bezwen etabli sa byen e fer li byen kler. Tou ti komans le 23 Desanm 2015, ler ansyen Minis Finans Jean-Paul Adam ti deklare dan son Ladres Bidze pou 2016 ki Gouvernman pou entrodwir en sistenm trezyenm mwan saler, pou tou travayer dan sekter piblik.

Pli tar apre ki Bidze ti'n vote, en lamannman ti ganny vote. Ti ganny anmennen pou amann sa Lalwa kot seksyon 46(7) ti ganny azoute. Sa morso Lalwa ti donn detay lo ki manner Minister Lanplwa pou

enplimant sa rezim trezyenm mwan saler.

I enportan fer remarke e note sete mon koleg Onorab Wallace Cosgrow ki ti ganny sa latas pou pa administre sa nouvo sistenm saler, ki ti ganny trouve koman en gran laviktwar pou travayer Seselwa.

(APPLAUSE)

HON CONRAD GABRIEL

Remersiman spesyal pou Onorab Cosgrow ki ankor la pe ed bann ki mwen fortinen, e vilnerab dan nou sosyete.

(APPLAUSE)

HON CONRAD GABRIEL

Pli tar an 2016, Legzekitiv ti anforsi sa Lalwa ler i ti tous sekter prive. Tou travayer ti ganny sans pas en bon lafet Lannen avek en keksoz dan zot pos, e kot lakour.

Traka le 15 ti'n ganny met 2 kote *at least* pou le moman. Se Sepandan sa lakontantman pa ti pou dire pou lontan Mr Speaker. Le 10 Desanm 2020, apepre zis 2 mwan apre ki *LDS* ti vin o pouvwar, Prezidan Ramkalawan avek en senp gout bolpenn ti sispann sa trezyenm mwan saler.

Sa ti al atraver Lalwa *of 28 of 2020*, ki Lasanble ti'n vote

detrwa zour avan. Ti en gran sok pou tou travayer, sirtou bann ki ti pe pas atraver lefe *COVID-19*. Gouvernman *LDS* ti blanm *COVID* menm si ti annan biznes prive ki ti pare pou kouver zot travayer ek en trezyenm mwan plen.

Sa imilyasyon travayer pou ganny repete an 2021, ler Minis Francourt ti dir Lasanble bliye sa trezyenm mwan. I annan ki ti aplodi, lezot pa ti koze. Me deor lepep ti montre son fristrasyon atraver bann linyon, *ARID*, *Human Rights* e lezot *platform*.

Lamizer sa pep ti pou kontinyen. La ozordi ki nou vwar, en nouvo *Bill* ki vin zwen ankor avek trezyenm mwan saler. Nou konnen zot pe ganny presyon sorti kot zot bann gro *sponsors* lo sa Trezyenm Mwan.

Serten sa bann gro msye i rod leskiz. Me lamazorite ti pe pey zot bann travayer. Ki mannyer ou ekspekte dimoun dan travay pou krwar zot ankor? Ler zot pe koz labous plen lo bann mezir, lamazorite Seselwa ozordi pe koz zot bokou koze mirak – “Bann gran prometer pti doner!”

Ki kart zot pe al bat latet Seselwa avek ankor? Ziska ki tan sa kalite politik bon marse pou kontinyen? Yer dan sa Lasanble, gro sif in ganny

nonmen pou lapey Prezidan e lezot. *VP* in ezite donn detay. Tout sort kalite leskiz in ganny donnen. Tel parey konsiltasyon;

“Pa ankor fini.”

“Napa propozisyon konkret.”

“Ankor pe evalye.”

“ Sa ti zis en rapor preliminar e konsiltasyon avek bann lezot lebra Gouvernman pa ankor fini, e pa ankor ariv lo en desizyon final. ”

Selman Mr Speaker, pou malere zot in fini paran desizyon final. Silvouple aret zwe ek sa pep. Mon demann pep Seselwa pou ouver zot lizye byen gran.

De lapar mon bann zabitan ki pe donn tou, mon ti a kontan demann Gouvernman pou silvouple get byen dan welfare Seselwa. Spesyalman bann dimoun aze ki ankor pe esper zot R10mil.

Fer lapenn war en Onorab lot kote latab sot anler, letan en Onorab lo sa kote latab i dir donn en pti keksoz nou bann vyeyar. Fer keksoz byen, ki popilasyon i santi zot pe ganny sa lapresyasyon e respe ki zot merite pandan zot vye zour.

Zot in kontribye bokou pou Sesel ariv kot i ete ozordi. Parey Onorab Sandy Arissol in fer sorti. I devwar Gouvernman

pou fer sir ki zot pran zot retret dan lape e trankilite.

Mr Speaker, i enportan pou nou konnen lekel bann lezot antite ki pou ede fasilite Minister Lanplwa akonpli sa travay.

Nou konnen e nou rekonnet ki i pa en travay fasil. Bann travayer i bezwen ganny *empowered* pou ki zot donn le meyer.

Nou bezwen swazir en model ki pou aplikab e soutenab pou nou pei. Avek pri lavi ki pe kontinyelman monte, nou zabitan i vwar zot dan bokou difikilte pou fer 2 bout zwenn. Bokou soufrans la deor. E mon repete bokou soufrans Mr Speaker.

E bann Manm lot kote latab i konn sa tre byen. Gouvernman *LDS* ti promet larzan dan pos Seselwa. Ler in arive pou donn li sa ki i merite, zot deside rod poursantaz. Sa i pa akseptab Mr Speaker.

Lo sa kote latab atraver nou *LOTO*, *Chief Whip* e lezot ankor ki pe *lead* sa parti nou'n debout e nou'n debat tre for pou lans en mesaz tre kler ek sa Gouvernman.

Mon a osi profite poudir ki nou'n akonplir bokou pou sekwe sa Gouvernman. koman en Lopozisyon responsab, nou pou kontinyen nou lalit sa

lafreyer. Nou la pou reprezant sa pep, i fer sir ki sa *joie de vivre* i retournen parmi nou popilasyon.

Koman *MNA* Elekte pou Pointe Larue, mon pou fer sir ki distribisyon nou larises i ganny fer byen, san diskriminasyon oubyen malis. Fer sir tou sa ki merit lasistans i gannyen dan en dele letan pli kourt posib.

Fotespere ki sa Gouvernman i senser dan sa travay, ki devan nou la ozordi. Bokou in ganny dir, mon pa pou repet bokou. *At least* sa i ed bann dimoun ki'n pas dan bokou difikilte pou 3an konsekitiv pou fer 2 bout zwenn.

I responsabilite Gouvernman pou met an plas en mekanizm, pou ed bann pti e mwayen biznes pou zot kapab pey zot trezyenm mwan saler. Nou osi bezwen konsidere ki i annan bann gro biznes ki pe fer tre byen la ater.

Zot, zot kapab *afford* pou pey trezyenm mwan an plen. Nou pa devret pe donn zot leskiz atraver Lalwa pou zot pa peye. Mon repete i responsabilite Gouvernman pou soulaz soufrans sa pep.

Zis lo en note final, bann *childminder* ki ti okip bann atlet pe debourye pou ranpli sa

avyon ek meday lor, ankor pe esper zot pti mwenza.

Minis konsernen silvouple, aret fer soufer bann atlet ki'n donn tou. Donn zot, zot rekonpans. Kestyon ki nou devret pe demande; ki mannyer nou mezir performans sa Minis baze lo sa ki pe arive. Avek sa 2 mo mon a dir ou mersi Mr Speaker.

(APPLAUSE)

MR SPEAKER

Mersi Onorab. Onorab Woodcock.

HON WAVEL WOODCOCK

Mersi Mr Speaker. Mr Speaker, mon pa ti konnen ki bann atlet ki'n al Zwe de Zil, dan Zwe de Zil ti bann marmay 2an, 3an ki bezwen *childminding*. Mon pe rode ki larzan pou *childminder* ki'n al vey atlet laba Madagascar.

Mr Speaker...

(comments off-mic)

MR SPEAKER

Order! Pwen?

HON WAVEL WOODCOCK

...Mr Speaker, trezyenm mwan saler, kontrerman avek sa ki Onorab Conrad Gabriel in dir, trezyenm mwan saler ti vizyon

pa lot ki nou Prezidan aktyel, Prezidan Ramkalawan.

Propozisyon trezyenm mwan saler, i annan en lartik lo la annefe mon fek pe lir dan "*Today in Seychelles*" ti vizyon - ti propozisyon ki nou Prezidan Ramkalawan ti fer byen avan eleksyon 15 lo 10!

E parey sa propozisyon ki i ti fer, e propozisyon ki nou Gouvernman osi ti fer dan sa bann menm letan pou ogmant Pansyon Sekirite Sosyal, nou bann *elderly*, ki zot ti dir Gouvernman sa bann letan. enkli zot Prezidan Michel? "Se bann Lopozisyon popilis, politik".

Me selman apre ki zot ti fer Mr Speaker? Zot menm zot, zot ti vini zot ti enplimant sa bann menm propozisyon ki Lopozisyon sa letan, ler nou ti dan Lopozisyon nou ti fer, ki enkli bann propozisyon ki nou Prezidan aktyel Prezidan Ramkalawan ti fer.

Mr Speaker, *in fact* zanmen mon pou oubliye, ti dir lenformasyon ti'n *leak* - devan sa Lasanble. Papye dokiman ti'n voltize, ti'n disparet ti'n ariv dan lanmen *Leader* Lopozisyon.

E Mr Speaker, ou konnen sa Lopozisyon la, zot parey zot ansyen Prezidan i toultan dir, "lipokrizi dan tou son splander."

Mon kontan ki Onorab Gabriel in fer sorti poudir sete sa letan ler trezyenm mwan saler ti vin anfors, sete pa lot ki Minis Cosgrow ki ti Minis *for Employment, Entrepreneurship, Development and Business Innovation*.

Mon a montre zot lipokrizi Lopoziyon. Pli boner - dan tou son splander Mr Speaker - Onorab Herminie taler in sant en zistwar,

“Ar ou konnen i annan en bann ki’n *burn the midnight oil*. E la ozordi R45 mil 450, bann ki pe ganny par lao R45 mil 450 pa pou *eligible* pou zot ganny zot trezyenm mwan saler. Sa i mal, mon pa dakor ek sa” isi laba.

Me selman in bliye poudir se son menm Minis, *Ex Minis Cosgrow* sa letan ki ti pas en *S.I., S.I. of 2017 Employment Act* kot i koz lo *Employment Thirteenth Month Pay fixing of eligibility limit regulation 2017*.

Ki ti dir?

Dezyenm;

“for workers whose basic salary is above R45 mil 450 shall not be eligible, shall not be eligible for thirteenth month pay.

(APPLAUSE)

HON WAVEL WOODCOCK

Onorab Cosgrow - Mr Speaker, li ki ti sinyen, li ki ti *sponsor* sa pou fer. Ki bann dimoun ki ganny par lao R45 mil 450 pa pou ganny trezyenm mwan saler.

La, be i ti kapab pas mesaz avek, ek sa i asiz zis lanmenm la a kote li Mr Speaker, dan Lasanble. Lipokrizi dan tou son splander. E nou ozordi, nou’n fer en lamannman ki nou pe dir i a diskresyon sa bann anplwayer pou zot donn sa ban dimoun en trezyenm mwan saler.

Nou’n aranz li, zot ti dir non pa pou donner. Selman “zot in *burn the midnight oil* Mr Speaker, get zot.”

Pa fini Mr Speaker, ou konnen enn bann rezon akoz ki nou Gouvernman ozordi pe entrodwir *result-based management*, pli gro leokri, pli gro konplent deor se servis dan sekter piblik ki nou Gouvernman i bezwen aranze ozordi.

E le rezon det akoz ki *US* ozordi in nepli o pouvwat, se akoz konplent ek fristrasyon kont servis dan Sekter Piblik. Nou tou nou konnen ki manner keksoz ti marse dan lepase. En ta dimoun ti ganny pozisyon akoz zot siport en parti politik.

Partou dan Gouvernman i annan en bann dimoun. Mon bezwen dir i annan bann bon travayer, bann dimoun konpetan, kosto, konpetan e kapab. E an menm tan i annan bann dimoun ki'n ganny zis met dan bann pozisyon, akoz faver politik.

Ou'n siport sa parti pou bous trou, ouswa bann pozisyon i ganny kree ki ozordi nou annan en *bloated Government* ek en bann dimoun, bann *ex MNAs*, *ex DAs* bann dimoun ki'n siport zot e met dan bann pozisyon ki zot napa sa konpetans.

Ouswa en bann i ganny anvoy dan Lasanble pou vin bous trou Mr Speaker, akoz napa louvraz pou zot. Mr Speaker, i annan *ex Minis* osi ki'n ganny mete dan bann pozisyon parey *ex Speaker*, en pos ti ganny kree pou li ki ozordi i *Leader* en zafer politik.

Mr Speaker, pandan *COVID*, *of course* mon frer Onorab Gabriel, nou ti bezwen sispann trezyenm mwan saler. Kot Gouvernman ti pou ganny larzan pou pey trezyenm mwan saler? Pei ti lo son zenou. Reveni pa ti pe antre. Tou biznes ti ater, ti'n fermen.

Ou ti pe ekspekte biznes sa letan - *airport* ti'n fermen, pey trezyenm mwan saler kan

napa okenn reveni ki pe antre dan pei? Be, non zot ti pou faid nou Mr Speaker. Dir granmer si *LDS* i vin o pouvwar. Akzo si *LDS* pa ti vin o pouvwar Mr Speaker, ozordi nou pei ti pou'n fini faid avek rezonnman sa parti laba lot kote laba.

Sanmenm sa ki apel Mr Speaker, en *SPUP/SPPF/US* fatigue Mr Speaker!

Mr Speaker, en kantite keksoz pe ganny anmennen dan sa Lalwa ki pou ed bann travayer. Mon plizyer travayer in konplent avek mwan. Akoz? Get sa, mon pa'n fer 1 an dan travay me selman 8 mwan mon'n travay mwan.

8 mwan mon'n travay mon'n donner mwan. Mon'n donn tou mon lenerzi, me selman *at the end of the year* mon pa gannyen, akoz mon napa 1 an. Lalwa pe fer provizyon ozordi si ou'n pas ou probasyon ou'n prouv ou lekor ou'n travay byen, menm si ou'n travay 6 mwan, 7 mwan, 8 mwan, 9 mwan, 11 mwan mon'n perform byen, mon *eligible* pou mon ganny mon trezyenm mwan saler *pro rata* dapre lakantite letan ki mon'n travay.

E anplis ki sa Mr Speaker, kontrerman avek sa ki Onorab Gill in dir, sa Lalwa i pa pe dir ou poudir sa bout kot i dir si

anplwayer dan Gouvernman ouswa sekter prive napa en *performance appraisal system* avan lafen lannen.

E osi si *performance appraisal* pa'n ganny fer, ou oblize pey sa travayer 100poursan. I pa vedir ki nou pe dir pa neser sa bann keksoz. Annefe parey Onorab William in dir or en Manm in dir nou bezwen *enforce* sa fer sir ki dan tou sekter prive, sekter piblik zot annan sa *appraisal system* dan tou prive, Gouvernman.

Prive ok, nou pe servi *result-based management*. Sorry, dan Gouvernman nou pe servi *result-based management*. Me dan prive osi, zot bezwen *ensure* poudir i annan sa sistenm evalyasyon, sa sistenm *appraisal*.

Zot bezwen met li anfers, i bezwen en *recruitment* ki tou bann lakonpanyen prive i bezwen servi. So, so, *far* si zot pa fer li ou bezwen pey sa travayer son 100poursan.

Me ki nou pe dir fodre i annan, aköz nou, nou *believe* dan ankouraz performans, ankouraz lefikasite dan tou sekter. Menm dan Sekter Gouvernman i bezwen annan lefikasite, nou bezwen deliver. Aköz Lepep Seselwa deor pe ekspekte ki bann travayer dan

sekter piblik pe donn zot sa servis a sa oter ki zot merite Mr Speaker.

En lot keksoz ki zot in dir Mr Speaker, ki mon war i pa fer sans, zot pe koz anr in fer *savings* lo trezyenm mwan saler. Be nou bezwen fer *savings* lo trezyenm mwan saler, pa zot in lir Bidze Siplemanter zot siplemanter in vini la ki i dir ladan?

Ki'n dir ler in er sorti dan *Mid-year Review* ki in dir? In dir po dir in napa en bon pe *recruitment* pa'n ganny fer. E ler *recruitment* pa'n ganny fer, ki mannyer ou kapab pey trezyenm mwan saler bann dimoun ki pa'n ganny *recruit*?

But of course, i bezwen annan *savings*. Aköz parey zot ti fer dan lefase, mon pa konnen si zot oule nou pey nanm. Aköz nou ti pey nanm, bal dan simityer lo soz ASP ou rapel? Nanm ti ganny peye Charlot, Charlette, Charla en bann non ki ti ganny kree.

Mr Speaker, anplis ki sa Mr Speaker, ler Gouvernman i fer Bidze pou sa lannen ki pe vini, *at the end of the year* ou bezwen bidze li lo 100poursan. Aköz *there is no way* pou konnen si en travayer son performans pou 75poursan, 80poursan, 90poursan. Si tou sa travayer i perform byen zot

ganny zot *full* 100poursan. Me si kekfw a son performans i pa'n ariv 100poursan i a ganny son 95poursan. I a ganny son 75 poursan.

Of course, pou reste en pti poursantaz ki reste Mr Speaker, ki ozordi i ganny konsider koman *saving*. Akoz i pa'n ganny peye, akoz i annan en travayer ki pa'n ariv sa 100poursan, ki zot *meet* sa kriter 100 poursan ki zot merit.

Mr Speaker, revizyon saler; ou konnen i enteresan pou mwan tann zot pe sot anler lo sa Komite ki'n ganny *set up* pou fer revizyon saler tou bann travayer, tou bann *constitutional appointees*.

Revizyon i bezwen ganny fer, sa i en standar partou dan lemonn pou Gouvernman ou bezwen fer revizyon saler. Revizyon saler normalman ou bezwen gete, akoz lenflasyon *every 5 years* i bezwen bann revizyon ki pe ganny fer.

E i enkli pou tou travayer swa pou apwentman konstitisyonnèl swa ou en travayer dan Gouvernman, revizyon i bezwen ganny fer *over the years* akoz ou bezwen pran faktè bann ko lenflasyon.

E osi Mr Speaker, ozordi Mr Speaker, sekter prive pe *compete* avek Gouvernman. Sa Komite in ganny *set up* pou fer

evalyasyon, *obviously* ki i pou vin konsilte avek Lasanble e avek tou sa bann antite tou sa bann apwentman konstitisyonnèl.

E ler ou pe dir pou reviz saler bann apwentman konstitisyonnèl Mr Speaker, ou pa kapab zis vini dir *ok*, donn en logmantasyon isi, donn en logmantasyon laba parey zot ti fer lontan. Zis donn en logmantasyon fer li fasil.

Mr Speaker, i annan plizyer Lalwa ozordi pou ou sanz saler okenn lapwentman konstitisyonnèl i bezwen vin atraver Lalwa. I annan 5 Lalwa Mr Speaker, mon pou koz lo la.

I annan *National Assembly Member Emolument Act* ki *deal* avek Manm Lasanble Nasyonal.

I annan *Judiciary Act* ki *deal* avek saler bann Ziz. I tousala parey mon'n dir i preskri anba Lalwa.

Zot saler tou sa ki zot gannyen, tou zot bann *dues*.

Ministerial Emolument Act ki *deal* avek Minis.

I annan *Constitutional Appointees Emoluments Act* ki kouver lezot bann lapwentman konstitisyonnèl parey *Ombudsman*. Oditer Zeneral, *Chairperson of the Electoral Commission*, *Chairman of Constitutional Appointment*

Authority ek son bann manm, *Chairman of the Public Appeals Board and Members, Attorney Zeneral*.

Presidential Emoluments Act i deal avek bann *dues*, benefis, saler ki Prezidan i gannyen. Tousala i preskri anba Lalwa. E si nou pou donn logmantasyon pou sa bann dimoun, Mr Speaker, i bezwen vin devan sa Lasanble pou laprouvasyon!

Oli Lalwa devan Lasanble? Mon pa war okenn Lalwa ki pe anmenn okenn logmantasyon pou okenn saler, okenn lapwentman konstitisyonnèl, ni pou *Leader* Lopoziyon, ni pou personm mwan Mr Speaker.

Mr Speaker, tousala se bann egzazerasyon Lopoziyon Mr Speaker. Akoz? zot konnen poudir nou *rally* pe vini Dimans, zot konnen poudir sa balye fatak in pri lo zot ledò. Prezan zot oule tir zot balye fatak anvoy lo nou! Zot in manz zot bannann, lapo bannann in fini la prezan zot anvoy balye fatak lo nou Mr Speaker.

Mr Speaker, pou fini an konklizyon. Nou Gouvernman pe fer en kantite ozordi pou soulaz nou pep. Yer nou ti pe debat lo sa size *MRP*, ki manner nou pou fer sir poudir ler bann konsonmater i al aste

bann prodwir *STC*, zot ganny li a sa pri ki'n ganny preskri.

Mr Speaker, i zisteman en lot komodite in azoute la ki tonm anba *MRP* - lay. E nou *rally* pe vini la Dimans, zis mon fer lapel ek tou nou bann siporter *LDS*, Dimans ler zot desann pou *rally*, sakenn pa bliye pou met en gous lay dan zot pos.

Akoz apartir 6er nou bezwen fer atansyon. Akoz bann sorsye i kapab sorti 6er. E nou bezwen fer tou sa bann nanm farous! Bann nanm ki zot in al detere dan simityer Mr Speaker.

(Interruption)

MR SPEAKER

Ok, Onorab, mon war ou'n fini. Mon war ou'n fini lo *Bill*, konklir.

HON WAVEL WOODCOCK

Wi, Mr Speaker, mon dir ou mersi. Avek sa 2 mo mon pou siport sa *Bill* ki devan nou. Mersi bokou.

(APPLAUSE)

MR SPEAKER

Mersi. Onorab Cosgrow, ou annan laparol.

HON WALLACE COSGROW

Bonn apre midi Mr Speaker. Bonn apre midi tou Manm, tou protokol mon obzerve, mon pa pou al dan bann detay.

Mr Speaker, mon pa pou koz lo ni nanm, ni balye. Mon pou les bann ki konnen, ki abitye avek nanm ek balye pou zot koz lo la. Bann ki zot abitye dan zot fanmir i annan nanm ek balye ek sorsye, koz lo la zot.

(Interruption)

HON WALLACE COSGROW

Mr Speaker, mon anv i koriz 3 keksoz apre midi avan ki mon antre *proper* dan mon deba - dan mon lentervansyon lo sa *Bill* ki devan nou.

Limero 1 Mr Speaker;

Onorab Gabriel in koz lo larzan *childminding*. Si Onorab pa konekte avek atlet dan son distrik la, mon a fer li konnen ki poudir i annan en *allowance* ki bann atlet i gannyen pour *childminders*.

Pour bann ki annan zanfan, bann *High Level Athlete* pou zot kapab met zot zanfan veye. E ler zot *travel* pou al *compete*, zot ganny en *allowance*.

Se sa ki i pe koz lo la li. Si li i pa konekte, pa bezwen vin gognard Onorab Gabriel. Li ki pa konekte, li ki pa konnen.

Mon pa konnen ki i pe rode avek balye, ek sorsye.

Mr Speaker, i annan ankor en lot keksoz mon anv i korize la apre midi, e sa, sa zafer travay dan Lasanble. Mr Speaker, ou, ou konn byen e bann Manm dan Lasanble i konn byen, ki poudir travay Lasanble i enkli *walkout*. Si nou pe proteste, en protestasyon i en *walkout*.

Me par kont Mr Speaker, ozordi i annan Manm Lasanble. E mon pou nonm tou lede non - i annan Onorab Georges avek Onorab Andre, zot 2 Avoka. Zot sorti Lasanble, zot al Ankour.

Dan *Standing Order* i annan provizyon pou ou *deal* avek sa. Mon pa konnen, petet ou fer li. Be selman mon pa krwar zot ganny koup saler mwan. So, alors ki nou pe dir tousala? Annou aret pe fer bann kalite politik sal ki pa ni enteresan, ki pa ni gou!

Trwazyenm keksoz Mr Speaker, mon pa pou al dir bokou lo la. Si i annan okenn travayer *Maison Du Peuple* ki pa'n ganny pey son trezyenm mwan saler, vin kot mwan akoz mwan ki ansarz, mwan ki peye. Annou aret rabase.

(Interruption)

HON WALLACE COSGROW

Annou aret rabase dan sa Lasanble. E mwan mon kapab garanti ou Mr Speaker, ki tou travayer *Maison Du Peuple* in ganny peye zot trezyenm mwan saler lannen pase. Mersi bokou.

(Interruption)

HON WALLACE COSGROW

Mr Speaker, ler mon ekout lentrodiksyon Onorab Sandy Arissol, pour mwan - son lentervansyon pour mwan i *encapsulate* vizyon travay, travay dir. E progresyon ki nou'n fer konman en pei pandan 43an Mr Speaker. Anba sa 43an.

Progresyon dan domenn travay Mr Speaker. Drwa ki nou'n donn travayer e amelyorasyon ki nou nou'n fer dan kondisyon travayer Sesel. En kantite travay in ganny fer? Konmsi pou nou asize pou nou dir keksoz pa ti isi, pa ti laba. En kantite travay in ganny fer.

E an 2016 ti annan lentrodiksyon trezyenm mwan saler. Amelyorasyon dan drwa e kondisyon travayer Seselwa. *Ok?* Trezyenm mwan saler ti ganny entrodwir. E son rasyonnal par deryer Mr Speaker, pou entrodwi en trezyenm mwan lapey, sete pou donn Seselwa en lot benefis. En benefis. Osi senp ki sa.

E mwan mon kapab dir sa konviksyon akoz mwan ki ti anmenn sa Lalwa devan Lasanble.

(APPLAUSE)

HON WALLACE COSGROW

E mon konnen. Mon konnen ki rezon - ki rezon nou ti entrodwir sa trezyenm mwan lapey Mr Speaker. Me sa Lalwa ki devan nou ozordi e tou sa bann lamannman ki'n anmennen depi 2020 ziska la Mr Speaker, i konsernan Mr Speaker. I konsern mwan.

I konsern mwan akoz nou pe pli konplik keksoz ki nou pe fasilite keksoz. Nou pe fer tro bokou konplikasyon. *Ok?* Sa zafer ti sipoze senp. Ti annan serten kriter ki ti vini avek, me ti senp. Dimoun i ganny peye son trezyenm mwan lapey ki *due* le 31 Desanm. E i bezwen ganny peye *by* le 31 Zanvye. Osi senp ki sa.

Ozordi nou pe entrodwir isi, nou pe entrodwir laba. En pake zafer e i fer li vin konplike pour anplwayer e travayer.

Premye keksoz Mr Speaker, sa zafer 50poursan. 50poursan. La nou pe *extend* li pour 2023, 2024 e 2025. Akoz ki nou pe *extend* li? Akoz nou ti ganny dir Mr Speaker, ki poudir

sa lannen nou pou *apply* li 100poursan.

Akoz ki ozordi nou ankor pe *extend* li, *extend* li, *extend* li? *Anyway*, nou ti dir ler ti vini sa Lalwa. Nou ti dir ki poudir sa zafer pa pou marse. E si ou swiv sa ki nou, nou ti pe propoze, be ozordi nou war. Nou pe *extend* li ankor 3an aköz nou konnen poudir i annan en problem met sa zafer *performance appraisal* an plas.

Ki swa dan Gouvernman. Mon'n koz ek enn de *HR* dan Gouvernman mwan. I en latet fermal pou *deal* avek sa zafer *performance appraisal*. E pa bliy osi dan sekter prive, mazorite bann lorganizasyon.

E *PS*, tou bann dimoun kot Lanplwa i konn byen. Mazorite sa bann lorganizasyon napa en sistenm *HR* an plas pou *deal* avek sa bann sityasyon. I difisil pour zot.

Se pour sa rezon ki ou war bokou sa bann dimoun in prefere zis pey trezyenm mwan saler 100poursan, pou zot pa al antre dan sa bann *administrative burden*, Mr Speaker. E se sa rezon ki nou war.

E pour mwan, sa zafer *appraisal* pour trezyenm mwan – mon fer li kler, *appraisal* pour trezyenm mwan, pour mwan mon krwar nou devret fini avek

sa. Aboli. Donn Seselwa son trezyenm mwan lapey parey orizinalman ti ganny propoze.

E Seselwa i ava ganny son - Parey bokou lezot pei i fer. Moris i fer, i donn en *Christmas bonus*. Bokou, bokou lezot pei. Lanmerik Latin, Lazi, Lerop. I annan pei ki donn zot. I *customary*. E osi i annan landrwa ki mandatwar ki donner.

So, pour kwa ki nou pa kapab adopte sa? Mr Speaker, ler nou pe koz lo sa zafer *appraisal*. Parey mon'n dir, nou pa kont *appraisal* nou. Nou pa kont ditou *appraisal performance system*. Nou pa kont.

Me selman ki nou, nou pe dir; nou pa *mind* annan en *appraisal system* pour *bonus*. Si en anplwayer ouswa Gouvernman i anvi donn en *bonus over and above* sa trezyenm mwan, *appraise* sa dimoun. Fer li vin lo en baz performans.

Si Gouvernman i anvi donn en *salary progression*. Ouswa sa anplwayer prive i anvi donn en *salary progression*. En *increment* dan son saler sa dimoun. Donn dimoun plis larzan i baze lo en *appraisal*. Aköz i pa kapab ganny plis larzan san ki i travay plis.

So, san ki i perform. So ou *appraise* li e ou *raise* – ou *increase* son saler baze lo en *appraisal system*. Or si ou donn sa dimoun en promosyon, ou donn li en promosyon baze lo *appraisal system*. Me non pa lo sa trezyenm mwan ki nou'n donn li konman en drwa. So sa i bann propozisyon ki nou'n deza fer, ki nou'n koz lo la Mr Speaker.

Mr Speaker, Onorab Lemiel in lev sa zafer *constitutional appointees*, *ok?* Konbyen – ozordi nou pe met tou sort kalite *burden* lo tou travayer Seselwa.

Be bann *constitutional appointees*; Prezidan, Minis, nou menm, bann lezot kad ankor ki parey nou'n koz lo la yer. Lekel ki *appraise* zot? Nou ganny nou *end of year* gratwite nou. Lekel ki *appraise* nou tou le lannen?

Konmsi nou bezwen fran avek Lepep Seselwa! Napa naryen pou kasyet. Ler nou koz lo la, tou dimoun i le ankoler, en. Lekel ki *appraise* nou tou le lannen, en?

(comments off-mic)

MR SPEAKER

Onorab Woodcock, ou'n koze silvouple.

HON WALLACE COSGROW

Mersi bokou Mr Speaker. Napa personn ki *appraise* nou. Akoz tou kou ler bann lezot kategori travayer i bezwen ganny en benefis, en *dues*, nou bezwen met tou sort kalite lanpayaz, nen pou sa dimoun ganny en pti 5 sou? Be *come on!* *Ok.*

Ok, nou'n dir si sa bann dimoun pe vin travay, pe ganny en promosyon, en saler; en *increment* dan son saler swa en *bonus*, annou *appraise* li. Me letan i vin son drwa trezyenm mwan lapey, donn li!

Mr Speaker, *pro rata*. Mwan mon napa naryen mal ek sa zafer *pro rata*, me selman son prensip mon krwar i mal. Ler mon dir mon krwar i mal, akoz mon dir koumsa Mr Speaker?

Pro rata, si ou get *the basis of a* trezyenm mwan. So ou bezwen travay 12 mwan pou ou ganny en trezyenm, *ok?* Si ou pe get son *basis*, *then the pro rata* i tonbe. Si en dimoun pa'n travay 12 mwan, i pa kapab ganny *pro rata*.

Me selman nou pa kont si nou anvi re aranz en sistenm kot tou dimoun i benefisyé. Si nou krwar poudir sa i devret al dan sa laliny, mon napa naryen kont sa.

Me selman mon pe get li konman en prensip. Prensip trezyenm mwan lapey. *Ok?*

Then i pa vin en trezyenm mwan, *once* ou fer li vin *pro rata*. I vin *kind of en bonus* pour sa dimoun. Ou konpran? So tousala mon krwar fodre nou gete Mr Speaker.

An sa ki konsern pli o ki R45 mil pou zot ganny zot benefis. Wi, mon ki ti siny sa regilasyon Mr Speaker. Akoz sa letan ti annan serten kondisyonalitye, akoz nou pa ti pe *appraise*.

Be la si zot le *appraise*, si zot fer li *appraise*. *But then* donn tou dimoun. Si zot le fer li *appraise*, donn tou dimoun. *Appraise* sa bann dimoun menm par lao R45 mil e zot ava ganny zot *dues* parey zot merite.

Akoz ozordi mazorite sa bann dimoun, sirtou bann ki lo *PSA Contract* dan Gouvernman, pa pe ganny zot *PSA supplementation*. Pa pe ganny zot 5poursan a lafen lannen.

So, annou rod en fason ki mannyer nou kapab donn sa bann dimoun osi ki travay osi dir. E ki travay bokou, bokou apre ler pou zot fer keksoz marse dan sekter piblik. So, Mr Speaker, mwan mon bann pwennvi i bokou diferan avek sa ki ozordi pe ganny anmennen dan Lalwa.

Mr Speaker, mon annan osi - i annan osi mon pwennvi,

sirtou lo kote Lalwa Mr Speaker. I enn ki Lalwa i devret senp – i devret senp. I devret fasil pou nou konpran e i devret fasil pou nou enplimante.

Sa ki ozordi devan Lasanble, malerezman i difisil pour lenplimantasyon. I vremen, vremen difisil pour lenplimantasyon.

Mr Speaker, i annan bokou ki'n dir pou dir i annan politik dan sa Lalwa – dan sa zafer. Met en Polisi ki depi lentrodiksyon. Mon rapel mon vin la 2016 Mr Speaker, politik, politik, politik. Zot ti demann mwan pou retir Lalwa. Mon dir zot non mon pa pou retire. Zot ti *vote* kont lo *merits of the Bill*. Zot ti *vote* kont, ti bezwen sorti.

Ti bezwen al asiz dan en lasanm laba deor pou sey negosye avek detrwa zot la anndan, pou nou kapab fer Seselwa ganny sa trezyenm mwan lapey. Le 31 Desanm pou li vin *effective*. Zot pa ti oule. Zot pa ti zanmen oule sa Mr Speaker!

(APPLAUSE)

HON WALLACE COSGROW

Ok! Zot...

MR SPEAKER

10 -10 minit Onorab.

HON WALLACE COSGROW

Mr Speaker, mon pou terminen. I en size sitan, sitan sansib pour Seselwa. E mwan mon krwar poudir Seselwa i devret konnen. *Ok?*

Onorab Ramkalawan, Onorab Georges, Onorab Afif – nou ti bezwen al asiz dan en lasanm ansanm ek Onorab Pillay avek Onorab Basil pou nou kapab ganny en lagreman. *Akoz?*

Akoz nou ti anvi ki sa trezyenm mwan lapey i kalifye by le 31 Desanm 2016 e ki Seselwa i ganny peye. *Initially*, zot, zot pa ti anvi sa trezyenm mwan lapey Mr Speaker, malgre tou sa ki zot pe dir laba lot kote latab.

(APPLAUSE)

HON WALLACE COSGROW

E Mr Speaker, ozordi nou, nou krwar poudir en trezyenm mwan lapey parey mon'n dir, i merit reste e i merit ganny peye Mr Speaker.

E nou, nou krwar poudir baze lo en baz matematik parey in ganny eksplike taler, i annan 28 zour dan en mwan. Ler ou tir sa bann lezot zour, i tonm egzaktaman en lot mwan, donn Seselwa en trezyenm mwan lapey e Seselwa i ava *enjoy* son lafen lannen.

Mr Speaker, lo en baz kou lavi. Ozordi problemm, problemm, problemm Sesel, mazorite fanmir pe ganny difikilte pou fer 2 bout zwenn lo en baz kou lavi. Desanm, annou donn pep Seselwa zot trezyenm mwan lapey. Seselwa i a kapab met 2 bout ansanm i a kapab *enjoy* avek son fanmir.

E osi petet si i annan en pti keksoz pou li fer kot lakour. Si i annan en pti *investment* i anvi fer, i ava met dan son pti *investment*. Annou donn li Mr Speaker.

E osi lo en baz ekitabilite. Ekitabilite. Nou pa kapab nou annan en propozisyon devan *Cabinet* Mr Speaker, kot Prezidan pou kapab ganny li *up to* R239 mil. Vis Prezidan i kapab ganny li *up to* R166 mil, Minis R163. Me selman pep Seselwa, malere ler nou pou koz lo en trezyenm mwan lapey, nou pa kapab donn li en trezyenm mwan lapey. Ekitabilite!

Nou bezwen lev dimoun ki zot lapey i la anba e fer li ariv preski menm nivo *or* ekitab avek sa ki par lao Mr Speaker. Nou bezwen fer sa. Sansan nou pou dan problemm e nou pou annan en kantite – en gran group, en gran kous nou sosyete ki ozordi – ozordi i kontinyen pri dan vilnerabilite.

MR SPEAKER

Konklir Onorab. Konklir.

HON WALLACE COSGROW

So, Mr Speaker, mwan mon krwar - Mwan mon krwar nou bezwen revwar sa konsep retourn *back to the concept of thirteenth months pay*. E annou donn Seselwa son *thirteenth months pay* parey i merite. Dernyen pti keksoz i vreman teknik sa enn...

(Interruption)

HON WALLACE COSGROW

I an sa ki konsern *grievance* Mr Speaker. Dan Lalwa or mon krwar dan Lalwa i koz lo *grievance* pour sekter prive. Mon ti a kontan petet Ms. Mohideen ouswa Minis i dir nou; *what is the grievance procedure?*

Par egzanp en dimoun letan ou'n fer *appraisal* i pa apresye son *appraisal*. I pa kontan. I krwar poudir in mal ganny fer. Ki *public service* in met an plas pou *deal* avek *grievances* dan sekter piblik? Avek sa Mr Speaker, mon a dir ou mersi.

MR SPEAKER,

Mersi Onorab. Bon, nou a pran en poz la e ler nou tournen nou

ava annan Onorab Monthy. Apre Onorab Pillay, Onorab Georges. E apre nou a kapab prosed lo konklizyon. Nou a rebran 4er – keler nou'n arive la? Nou a rebran 4er 15. Mersi.

(BREAK)

MR SPEAKER

Byen. Nou a donn laparol Onorab Monthy.

HON PHILIP MONTHY

Mersi Mr Speaker. Bonn apre midi tou dimoun ki pe swiv sesyon Lasanble ozordi. Mr Speaker, ler mon'n ekout plizyer deliberasyon sorti lo lot kote latab, lo sa size ki nou pe koz lo la ozordi, trezyenm mwan, i annan lenpresyon ki zot ki ti anmenn sa. Zot ki ti deside. Zot ki ti entrodwir. Zot ki'n enplimante.

Se sa ki Onorab Cosgrow in dir nou. Li ki ti anmennen. E se sa ki Onorab Gabriel in dir nou. Minis Adam ki ti anons sa. Mr Speaker, mon pou avek ou permisyon, lir en pti ekstre lartik *Seychelles Today* le 6 May 2015. I lir koumsa;

“SNP promises thirteenth month salary to workers. The measure which will be included in the party manifesto concerns only workers in the civil service for the moment, the party says.

After having promised to raise the old age pension from approximately R3 thousand100 to 5 thousand’.

En keksoz ki apre ler ti al dan dezyenm *round*, zot, zot ti fer ki zot pa ti oule. Zot pa ti oule ler voter ti anvoy eleksyon dan dezyenm *round*. Zot ti taye, zot ti entrodwir. Sa an 2015 Prezidan Ramkalawan ti pe deza pe koz lo la.

“The Leader of the Seychelles National Party SNP Wavel Ramkalawan has now pledged to pay a thirteenth month bonus to all employees of the civil service, with a satisfactory record of employment. If his party wins the elections, the money to finance this measure is there”. He told Today.

Sa zafer zot ki ti deside. Zot ki ti anmennen, pa vin dir nou! Pa vin bat latet pep Seselwa avek sa, Mr Speaker!

(APPLAUSE)

HON PHILIP MONTHY

Ozordi zot le vin fer nou krwar ki ler sa Mosyon, ler sa Lalwa - sa *Bill* ti vin dan Lasanble, Lopozisyon sa letan ti kont. Ti bezwen al dan en pti lasanm separe pou negosye? Mr Speaker, be sa bann dimoun i

bann spesyalis dan konfiz Lepep Seselwa. Enkrwayab!

Mr Speaker, ler mon get sa *Bill* la devan nou ki pe propoz serten amannman dan lafason ki trezyenm mwan saler i ganny peye, pour mwan mon kapab idantifye 2 eleman prensipal dan sa bann lamannman.

Premye se promouvwar prodiktivite.

E dezyenm se asire ki en pli gran group Seselwa i resevwar sa benefis atraver sa bann lamannman ki pe ganny propoze. En benefis ki Prezidan Ramkalawan ti anonse an 2015. En benefis ki lide SNP sa letan, an 2015.

(APPLAUSE)

HON PHILIP MONTHY

Pa lide *SPPF* oubyen *US*. Oubyen mon pa konnen ki mannyer zot apele mwan. Ler mon'n ekout lentervansyon bann Onorab *US* parey zot labitid, depi ki nou'n met nou lipye la dan sa Lasanble an 2020, se ki zot in adopte zot en latitid popilis.

Onorab Lemiel taler fek konfirm sa ankor Mr Speaker, avek en trezyenm mwan saler pour bann pansyoner. Popilis akoz i sel opsyon ki zot annan apre ki pep Seselwa in war ki zot en parti fatigue e

“entelektyelman *spent.*” Parey Mr Herminie ti dir. E Lepep in poz zot trankil laba dan Lopoziyon.

Ki zot pe dir? Donn tou travayer zot trezyenm mwan. Be Mr Speaker, Gouvernman atraver Bidze i touzour fer provizyon pou ki tou travayer Seselwa i ganny zot trezyenm mwan.

(APPLAUSE)

HON PHILIP MONTHY

Larzan i la, i ganny vote. Nou menm nou ki *vote* Bidze. Si tou Seselwa i performen, i travay. Tou Seselwa i gannyen zot trezyenm mwan!

(APPLAUSE)

HON PHILIP MONTHY

Ler ou ekout sa bann dimoun koze lo lot kote latab, konmsi trezyenm mwan saler pa egziste. Larzan pa la. Zot ki pe vin avek sa. Zot ki pou donn Seselwa trezyenm mwan. Zot ki ti prezant sa, sa ti zot nide.

Be, Seselwa, mon konnen 2020 lizye in ouver. Pa les sa lizye ferm ankor silvouple!

(laughter)

HON PHILIP MONTHY

Mr Speaker, mon pa konnen ki langaz ki nou pou bezwen servi pou fer sa bann Dokter dan senm konfizyon konpran. Si en travayer in delivre dan son responsabilite, in *meet* son bann *target* ki'n *set*, i napa okenn rezon akoz i pa pou ganny son trezyenm mwan.

Onorab Herminie, Sesel pe fer byen - wi, anba ladministrasyon *LDS*. Ekonomikman nou pe fer byen. E si sa 12mil travayer dan servis piblik i delivre a 100poursan zot abilite, sa i vedir ki zot pou gannyen zot trezyenm mwan.

Larzan in ganny mete dan Bidze pou fer provizyon pour tou sa 12mil travayer ki anploye dan servis piblik. Alor pei pe fer byen e sa benefis pe ganny pase avek pep Seselwa lo en kondisyon, nou travay, nou performen. Nou pa kapab rekonpans dimoun ki pa pe travay, Mr Speaker.

Se sa ki konman en Gouvernman ki responsab, e ki pe fer tou pou ki i annan en amelyorasyon dan lafason ki servis i ganny delivre. I anvi war. E se sa ki sa pep i anvi war Mr Speaker. Me fodre ki nou konman bann *Leaders* nou konmans vin fran avek nou lekor, e aret sa lipokrizi zis pou ganny pwen politik.

Mazorite travayer Seselwa Mr Speaker, pe fer en travay ekselan e pe donn tou pou asire ki servis ki zot pe ofer i a laoter pou deservi piblik Seselwa.

Be Mr Speaker, nou pou bezwen admet osi ki i annan ki pa pe donn le meyer de zot menm pou rann lavi nou pep la deor ki depan lo zot servis, pli fasil.

Nou menm nou konman *MNA* souvan nou war nou fas a bann tel endividi. Souvan zabitan i *call* ou pou montre zot fristrasyon ver serten travayer dan bann departman Gouvernman, lo lafason ki zot pe ganny deservi.

Eski parey Lopozisyon pe dir nou, kontinyen rekonpans medyokrite? Kontinyen fer lavi sa pep la deor difisil kot telefonn pa ganny reponn? *File* i ganny *misplaced*? *Staff* ki souvan absan.

E a lafen lannen nou dir, *Bravo? Well done?* E nou donn en *tap* lo zepol, e nou rekonpans sa bann tel travayer.

Mr Speaker, konman en Gouvernman responsab e bann *Leaders* responsab, nou pa kapab aksepte sa. E se sa ki *US* pe dir nou zot, zot ti pou fer si zot ti an mazorite dan sa Lasanble la ozordi. E ki zot pou fer si par maler, zot retourn lo pouvwar an 2025.

En travayer ki'n donn tou e zanmen mank travay, pe war son koleg ki'n trenn lipye pe ganny *full* trezyenm mwan. Eski zot mazine ki mannyer sa bann travayer pou santi zot?

E si nou al dan sa laliny, oli amelyorasyon dan prodiktivite? E oli meyer servis pour sa pep la deor Mr Speaker?

Mon konnen ki zot bi se pa war Sesel prospere anba Gouvernman *LDS*. Me plito fer tou pour ki sa Gouvernman i *fail*. E Sesel i *fail* konman en pei. E sa i eksplik zot pozisyon la ozordi dan sa Lasanble Mr Speaker.

E in zot pozisyon a sak fwa ki Gouvernman pe propoz en keksoz ki bon pour Seselwa e sa pei ki apel Sesel.

Tel parey yer avek *MRP*. Lalis komodite esansyel i fer vini par *STC*, nou pe fer sir ki napa labi lo kote pri, ki sa i reste abordab - sa Seselwa ordiner. Ki'n arive yer, zot in vote zot? Zot pa'n vote, kit zot lanmen anba. Selman zot vin dir nou fer desann pri lavi.

Fer desann pri lavi. Ler zot, zot ganny loportinite pou kontribye pou fer desann pri lavi, swa zot *walkout* oubyen zot kit zot lanmen anba!

(APPLAUSE)

HON PHILIP MONTHY

E la le 6 Oktob 2022 Mr Speaker, “*US walkout. No vote on approved thirteenth month pay Bill.*” Humph. Ennler mon pa konnen ki mon pou dir. Mon pa konnen ki mon pou dir.

(Interruption)

HON PHILIP MONTHY

Mon pa konnen ki mon pou dir. Dezyenm eleman prensipal dan sa *Bill* Mr Speaker, se pou asire ki en pli gran group Seselwa i resevwar sa benefis.

Mon kontan pou vwar ki bann travayer ki'n konmans en Lanplwa, apre le 1er Zanvyé i ganny konsidere pour zot trezyenm mwan lo en baz *pro rata*. Sa i pou fer ki plis travayer pou benefisyé. E mon asire ki Seselwa la deor i apresyé sa.

Akoz lannen pase mon'n ganny plizyer dimoun ki'n *call* mwan. Ki ti en pe konfize, pe rode; mon'n konmans travay an milye Zanvyé, Fevriyé, Mars, eski mon pou ganny konsidere? Eski mon pou ganny mon trezyenm mwan?

In en pe fermal pou fer zot konpran poudir; be non, ou pa pou ganny konsidere vi ki ou'n konmans travay dan milye lannen, oubyen ou pa'n konmans le 1er Zanvyé.

Sa amannman i pou ganny resevwar tre byen par plizyer Seselwa ki pou tonm dan sa kategori. Akoz omwen la zot pou ganny konsidere pour en trezyenm mwan Mr Speaker, baze lo *pro rata* lakantite letan ki zot in travay.

Travayer ki'n aret travay lo zot menm, e ki pa'n kit akoz okenn rezon disipliner, pe osi ganny konsidere atraver sa bann lamannman Mr Speaker. Sa i pou ganny kalkile lo sa 50poursan ki mandatwar.

Konmsi, ki mannyer sa i kapab en move keksoz e ki nou war sa bann Onorab *US* pe vin avek tou sort lenvansyon pou konfiz sa pep ozordi Mr Speaker?

US olye ede pou avans sa pei devan e fer ki Seselwa i war li pe viv dan en pei, zot swazir pou adopte en tel lapros negativ.

Mon a zis swet zot bonn sans Mr Speaker, akoz pep Seselwa la deor pe obzerve e pe gete. Napa naryen konstriktiv ki zot vin avek. Tou sa ki Gouvernman pe vin avek ki pozitiv pour sa pep, swa zot bat kalot ladan; swa zot vin avek bann largiman, bann lenvansyon ki pa vre. Swa zot *walkout*.

Ozordi i en legzanp. Ler ou'n ekout tou sa bann

largiman ki zot in vin avek lo lot kote latab, tou sa bann lamannman ki mon pe gete i pour benefis Seselwa, eski ou le dir mwan nou pe pas sa bann lamannman pou defavoriz Seselwa? Non!

Kontrer nou pe fer pou anmas plis dimoun ki petet avan ti'n ganny kit ater. E ki nou war? Plizyer largiman; Nnou pe ogmant nou lapey. Selman zot menm zot ler zot zwenn nou; en, "kan lapey pou revwar pour nou?"

(APPLAUSE)

HON PHILIP MONTHY

Selman la zot menm zot, zot vini, bann ipokrit dan koridor ler zot koz ek nou;

"lapey pe al ganny ogmante."

"Nou pe ogmant nou lapey par sepa konbyen."

Selman zot menm zot ki konplent plis.

(laughter)

MR SPEAKER

Konklizyon Onorab.

HON PHILIP MONTHY

Mr Speaker, mon a konklir. Mwan mon pou aport mon sipor pour sa bann lamannman, aköz mon annan plizyer dimoun dan

mon distrik Cascade ki pou benefisye, ki petet in konmans travay dan milye lannen. Ki omwen i a ganny en pti keksoz.

Petet i annan ki'n aret travay ki omwen i a ganny en pti keksoz. So, mon pou donn mon sipor pour sa bann lamannman. E pou met larzan zisteman dan pos Seselwa e ki i fer bann zabitan Cascade, pep Seselwa a pas en meyer Nwel e en meyer Lannen. Mersi Mr Speaker.

(APPLAUSE)

MR SPEAKER

Mersi Onorab. Onorab *Leader* Lopoziyon?

HON SEBASTIEN PILLAY

Mersi Mr Speaker, e bonn apre midi tou dimoun. Mr Speaker, mon'n asize mon'n ekout bann deba ki'n ganny fer lo sa Prozedlwa depi bomaten. E mon bezwen dir pou dir mon pa etonnen Mr Speaker.

Mon pa etonnen aköz depi en bon pe letan, Seselwa pe pas atraver sa menm kalite politik, ki nou war pe arive dan nou pei. Kot nou annan nou en Gouvernman ozordi e son mazorite ki vremen pa konnen ki direksyon zot pe ale.

Mon pou dir ou sa Mr Speaker, aköz lannen pase ler ti

anonse ki trezyenm mwan pou vin mandatwar 2023, e ki mandatwar 2023 ou pou bezwen fer *appraisal*, tou sa dimoun lo lot kote latab laba ti siporte. Tou ti siporte!

Performance appraisal pou vin mandatwar. Depi son *Leader* Zafer Gouvernman; “tou dimoun a bezwen pas atraver *performance appraisal*”. La ozordi zot fer mars aryer ankor e la zot siport ankor.

Be, dir nou ki zot anvi fer egzakteman? Kwa ki konplike dan aksepte poudir trezyenm mwan i en drwa ki sa travayer in aki pandan sa lannen e ki i bezwen gannyen! Get sa Mr Speaker. Ki zot ti dir?

“As from 2023 - e sa se parol *Chief Secretary of the Public Service Bureau* e PS pour Lanplwa –“ As from 2023, the *whole benefit* - trezyenm mwan antye pou *subject to performance assessment*.” E ki ti arive laba? Tou dimoun ti bat lanmen. Depi sa gran kozer ki fekoze la.

Tou dimoun ti bat lanmen. Depi sa enn ki al danse dan simityer Praslin, i osi ti bat lanmen.

(laughter)

HON SEBASTIEN PILLAY

Prezan Mr Speaker, i a vin koriz nou ler nou, nou dir pou dir nou ki ti anmennen. Nou ki ti propoze. Wi, nou ki ti anmennen! Nou ki ti propoze!

(APPLAUSE)

HON SEBASTIEN PILLAY

Akoz mwan mon ti la ler Onorab Georges ti dir fodre revwar sa Lalwa. I ti dan sa *meeting room* la lot kote avek son Prezidan Mr Ramkalawan ki ti dir ek nou koumsa poudir - ek Onorab Cosgrow; “retourn ek ou Lalwa”. Granmersi sa zenn *homme* ti annan pouvwar ek kouraz pou li kit sa Lalwa lo latab Lasanble sa zour. Ak LDS ti pe refize pou vote.

E ki zot ti fer ankor? I enportan pour Lepep Seselwa konnen. Ki zot ti fer? Zot ti al fer en *meeting* ek zot bann gro *sponsor* dan *STC Conference Room*.

(APPLAUSE)

HON SEBASTIEN PILLAY

Zot ti al fer en *meeting* ek zot bann gro *sponsor* e ou konn sa tre byen aköz ou *Leader* LDS, pou zot *torpedo* sa trezyenm mwan saler ki Gouvernman US ti pe entrodwi.

(APPLAUSE)

MR SPEAKER

Eskiz mwan. Ler ou fer referans lo mwan, fer sir ou annan ou *fact right*. Mon pa konn naryen dan sa ki ou pe dir. Mersi.

(APPLAUSE)

HON SEBASTIEN PILLAY

Mr Speaker, sa i pa pou etonn mwan, akoz zis parey Prezidan ti dir dan *rally* ki tou Seselwa i egal, me dan *Meeting* Piblik Anse Etoile, i ti fer Mr Alvin Laurence byen konpran ki pa nou tou ki egal dan sa pei.

(APPLAUSE)

HON SEBASTIEN PILLAY

I ti fer nou konpran ki mannyer pa nou tou nou egal akoz ler zot koz lo responsabilite konman en parti, zot ti a donn nou lanmen pou denons Gouvernman yer, ler i ti vin sey entrodwir en propozisyon saler ki pou donn Prezidan plis ki R230 mil par mwan!

(APPLAUSE)

HON SEBASTIEN PILLAY

Zot ti ava donn nou lanmen pou denons ki Vis Prezidan pou ganny R166 mil par mwan!

(APPLAUSE)

HON SEBASTIEN PILLAY

E zot ti ava donn nou lanmen pou denonse ki Minis Dezinyen pou ganny plis ki R133 mil par mwan. Se sa responsabilite, Mr Speaker!

(Interruption)

HON SEBASTIEN PILLAY

Mr Speaker, mon pa konnen ki pe arive akoz mwan zot in koze, mon'n ekout tou dimoun trankil.

MR SPEAKER

Silvouple! Silvouple, in ariv tar. 4er edmi. *Calm down*. Les nou a fini sa deba trankilite. Prosede Onorab Pillay.

HON SEBASTIEN PILLAY

Mersi. Zot pe manz dan mon letan, Mr Speaker. Mon pou pran mon letan. Mr Speaker, mon le fer kler ki nou pozisyon lo sa kote latab i enn ki tre senp.

Nou, nou krwar ki en dimoun i annan en *acquired right* pou ganny en *thirteenth month pay*. Sete sa prensip ki'n dan sa Lalwa apre tou son bann revizyon ki'n sanze atraver Gouvernman *LDS*. Sete sa prensip.

Me i pa pou etonn mwan ki mannyer Gouvernman *LDS* i fonksyonnen Mr Speaker. Yer

menm nou ti tann Vis Prezidan dir nou ki napa okenn propozisyon sif ki lo latab. Me apre dan nouvel 8er ki nou tande? *State House* i dir ki sa bann sif i dan en dokiman ki pe ganny travay lo la.

Seselwa la deor, ekoute. Ekoute e mazin byen ki zot ti ganny dir avan 2020. E se pour sa rezon ki mon ti *remind Leader Zafer* Gouvernman ki son pake lagrenn bat latet ki in aste lo *stall* lagrikiltir. Son pake lagrenn bat latet ki li in sey anvoy lo nou, pa pou marse ankor avek Seselwa, 2025!

(APPLAUSE)

HON SEBASTIEN PILLAY

Mr Speaker, ki mannyer ou kapab eksplike ki lo en baz *policy*, Minis ki la ti sey konvenk Lasanble ki *the best way forward* sete en *appraisal system as of 2023*. Me apre fer mars aryer konplet e vin dir ek nou poudir la i pe al fer *50/50* ankor *going forward 2023, 24, 25*.

Be ki'n arive avek sa *appraisal system* depi ler in ganny entrodwir Mr Speaker? In annan malis. E bokou dimoun in koz menm avek bann *MNA* lo lot kote latab. Menm si zot pa oule admet an piblik. E parey zot dir, dan koridor zot

vin dir ou; menn, dimoun pe konplent.

Zot le koz lo dan koridor. Nou a koz lo dan koridor. Dimoun pe konplent. Akoz dimoun pe konplent? Akoz dan serten landrwa travay i ti napa okenn baz pou fer en *appraisal* avek travayer. E alors serten travayer ti zis ganny pini e pa ganny son 100poursan.

Dezyenmman, keksoz ki pli grav ankor, dan serten lantrepriz piblik, travayer ti pe ganny son 50poursan. E lot 50poursan, en bout ti pe ganny tire e dir li poudir sa son *bonus* pou sorti ladan.

E pa ti etonn mon pou vwar ki Gouvernman ti vini atraver *Public Service Bureau*, pou re eksplike e redir lekel ki pou ganny trezyenm mwan ankor. Tousala siporte par en mazorite ki zis bat lanmen dan Lasanble Nasyonal.

Se sa larealite ki Seselwa i devret konpran ozordi Mr Speaker. En realite ki anmenn nou pou war ki mannyer en Gouvernman, dan en fason iresponsab, i kontinyelman zwe ek Seselwa. Kan nou konnen fondamantalman son bi se retir sa trezyenm mwan ki travayer Seselwa pe gannyen!

(APPLAUSE)

HON SEBASTIEN PILLAY

Akoz mon dir sa Mr Speaker? Akoz dan konteks ki sa Lalwa pe pas devan nou ozordi, *Public Service Bureau* in admet lo televizyon nasyonal ki en keksoz parey en *long service allowance*, pou nepli annan plas pour en travayer.

E sa ki enteresan, nou ti aret *long service allowance* lo baz ki Gouvernman napa larzan. Me selman, en zour Prezidan i dir nou lekonmi pe byen fer. Minis i dir nou lekonmi fek refer. Lot i dir nou lekonmi i an viger. Lot zour lekonmi i dan problem. Me selman *long service*, sa pti R500 ki en *teacher* ki'n fer en 5an servis ankor, pa pe war azoute lo son saler, menm si in fer 30an dan son louvraz.

Sa ki pli grav ankor, revizyon bann *schemes of service* ki nou ti demann avek *Public Service Bureau*, Larepons ki nou ti pe ganny sete ki i annan tro bokou *schemes of service* dan Gouvernman.

Me selman, Minis Lasante i vin dir ek nou i pe revwar *schemes of service* pour bann travayer *Public Health Authority*. Ki ou kapab konpran?

Enn i dir enn. Lot i dir lot. Be nou, nou le war keksoz dan en fason pli senp. Sa ki mon pe tandé ozordi dan sa Lasanble e

ki mon pa ganny en konpran, se *as if* la mazorite Seselwa se bann parese ki pa travay. Akoz se zot ki'n dir.

Zot Prezidan menm in admet ki i annan sitan fristrasyon dan sa pei ki dimoun i sitan fristre aköz ki dimoun pa pe travay.

Be ler mon regarde tou le bomaten sa kantite loto ki annan dan trafik, dimoun ki pe degaze pou ariv travay. Mon demann mon lekor, si vre Seselwa pa pe travay?

E mon konklizyon ki mon vini ki mon tonm lo la Mr Speaker, i kler ki Seselwa pe skente dan sa pei. Me malerezman sa Gouvernman ki o pouvwar pe kontinyelman fer son lavi malere avek en bann Polisi ki pa ni fer sans e ki afekte son *livelihood*.

E sa ki pli grav ankor Mr Speaker, se ki tou sa dimoun – sa bann ki ti ranpli zot bann *rally* avek zot loto, zot transpor, pe realize ozordi ki menm *fuel* zot pa pe kapab *afford* pou ranpli sa bann *rally* ankor e zot loto, ek zot transpor.

(Interruption)

HON SEBASTIEN PILLAY

E la mon swete ki zot a pran en pe sa bann larzan ki zot pe

anmase la, pou zot donn sa bann dimoun pou pey *fuel*.

Mr Speaker, i reste pour mwan en keksoz ki tre drol ler mon vwar Gouvernman *move* dan sa direksyon. En direksyon kot nou pa valoriz travayer. Nou pa valoriz kontribisyon.

Si Onorab Lemiel in koz lo en benefis pour bann vyeyar. Be ki problem ki zot annan avek donn en benefis bann vyeyar? Kan zot ti promet bann vyeyar R10mil ler zot ti vin o pouvwar!

(APPLAUSE)

HON SEBASTIEN PILLAY

Ki problem ki annan ler nou dir pou dir en dimoun ki'n kontribye pour sa pei, ki ozordi zot menm zot, zot pe fer sa dimoun esper 65 an pou ganny en pti sekirite sosyal, gras a Polisi ki zot Gouvernman in met an plas. En Polisi ki nou pou *reverse* 2025 pou montre zot ki mannyer ou valoriz kontribisyon ki en kous sosyete in fer.

Mr Speaker, lesansyel ki nou pe fer ozordi – e nou lo nou kote latab nou pozisyon i kler. Nou pozisyon i se ki; si en dimoun in travay pandan lannen, i devret kapab ganny son trezyenm mwan saler. Se sa i senp. Son premis ti senp.

Be si nou regard sa Lalwa

depi ler Gouvernman *LDS* ti o pouvwar, lakantite lamannman ki'n ganny fer zis lo sa *clause* pou donn trezyenm mwan, i a montre ou ki mannyer sa Gouvernman napa en sou direksyon kote i le ale. E pe zis fer keksoz an alan. *Make it as you go* an krwayan ki i pou ganny en rezilta.

I pa akseptab Mr Speaker, akoz mon pa dakor ki Lasanble i ganny dir en keksoz en lannen, e lannen answit nou ganny dir konpletman en lot keksoz. Pou napa okenn rezon ki'n ganny donner avek nou, pou eksplik nou akoz ki sa desizyon ganny pran.

I inakseptab akoz mon pa dakor ki Lasanble i ganny dir en keksoz en lannen. E lannen answit nou ganny dir konpletman en lot keksoz. Pou napa okenn rezon ki'n ganny donner avek nou pou eksplik nou akoz ki sa desizyon in ganny pran. I inakseptab Mr Speaker.

Me sa ki pli enteresan ladan se ki Seselwa i bezwen *rely* lo sa 10 Manm *United Seychelles* pou sonn lalert, kan sa Gouvernman pe fer tou fason pou fer lavi nou pep vin pli difisil. Se sa larealite ki nou pe fer fas avek ozordi.

Wi, i vre sa ki Onorab Gabriel in dir ki larzan bann

childminders ki ti vey zanfan bann atlet, pa ankor ganny donnen Onorab Woodcock. E akoz ou dekonekte avek ou bann dimoun.

Larzan meday in donnen? Se sa nou problem ki nou annan ek sa Gouvernman. Ler ou kestyon li lo bann keksoz ki in fer, i pa kapab donn ou en larepons. I pa kapab dir ou ki'n arive.

E sel rekour ki i annan se entimid son bann oponan politik, dan en fason ki i ava fer nou per e fer nou aret debout dan lentere Seselwa. Be nou, nou pou reste *fearless in dignity* e nou pou debout a kote tou Seselwa dan sa pei!

(APPLAUSE)

HON SEBASTIEN PILLAY

E sa bann vatevyen ki nou war zot kontinyelman fer i montre nou klerman ki zot napa en sou nosyon ki mannyer pou diriz en ladministrasyon. E de zour an zour dimoun pe kontinyelman konplent.

Mr Speaker, annou fer fas ek larealite ki'n arive lannen pase. Lakantite konplent ki dimoun in fer pandan letan ki trezyenm mwan ti pe ganny donnen, nou a zis konpran la deor Seselwa ki pe ekoute, i a

realize poudir sa ki mon pe dir i en realite.

Be pour mwan sa ki pli drol ankor. E Onorab Gill in tous lo la. Sa ki pli drol ankor se ki en premis Lalwa, i se ki ou bezwen annan sa *appraisal system*. Me lo en lot kote pour en dimoun ki napa, i oblize pey son travayer en *full trezyenm mwan* ler i napa.

Savedir lentansyon e lespri Lalwa se donn en *full trezyenm mwan* tou travayer. Se sa dekoneksyon ki mon pe war avek sa ki nou pe ganny propoze devan nou ozordi.

E sa ki nou devret konsernen avek Mr Speaker - e mon toultan dir sa Lasanble sa. Akoz ki Gouvernman ti sitan sir e asire lannen pase ki i pou *roll out en full appraisal system* pour trezyenm mwan an 2023 pe enport sa ki nou lo sa kote latab nou ti dir?

E la mon annan bann *verbatim*. Si ou get sa bann *verbatim*, ti napa en lobzeksyon lo lot kote latab. Sel lobzeksyon in sorti lo nou kote latab. *What happened?*

MR SPEAKER

15minit Onorab. Konkliir silvouple.

HON SEBASTIEN PILLAY

Mr Speaker, mon konklizyon pou enn ki tre senp. Si nou kapab, dan en letap kot nou dir lekonomi pe byen fer. Si nou kapab war en propozisyon saler 230 mil, 166 mil pour bann dimoun ki pli o plase dan sosyete – Prezidan, Vis Prezidan, Minis Dezinyen. Akoz ki nou pa kapab war en *full* trezyenm mwan saler pour sa travayer Seselwa la deor? Akoz?

Akoz nou pa kapab vwar en *full* trezyenm mwan saler pour nou bann *teachers*? *Teachers*, pa in *subject to* sitan *appraisal* pandan lannen?

Pour nou bann *nurse*? Nou bann polisye? Nou bann solda? Mwan mon dir ek Seselwa en senp keksoz. Nou reste *fearless in dignity* pou lager pou zot e nou pou lager toultan dan zot zentere dan sa Lasanble Nasyonal! Mersi Mr Speaker.

MR SPEAKER

Mersi Onorab. Onorab *Leader* Biznes Gouvernman?

HON BERNARD GEORGES

Mersi Mr Speaker. Mr Speaker, malgre ki sa *Bill* ki devan nou i en *Bill* tre, tre senp, ki pe rod fer en *fine tuning* avek sa Lalwa Trezyenm Mwan.

Trezyenm mwan, ki son sel bi se *boost* detrwa bann

landrwa ki pa ti'n ganny prevwar tel parey *pro rata* pour bann dimoun ki pa'n travay en *full* lannen. Tel parey bann dimoun ki lo probasyon. Sel keksoz ki sa *Bill* devan nou pe fer se anmenn sa bann *fine tuning* avek sa Lalwa.

Me si ou ekout deba ki'n arive ozordi pandan en zournen antye, sirtou sorti kot kote Lopozisyon, ou ti ava krwar – e okenn dimoun laba deor ki pa'n byen atantif, i ava krwar ki sa Lalwa ki'n ganny anmennen devan nou ozordi, pe sey tir trezyenm mwan konpletman.

(APPLAUSE)

HON BERNARD GEORGES

Ki sa Lalwa ki devan nou ozordi, se tir sa Lalwa ki Onorab Cosgrow in anmennen ler li i ti Minis, pou entrodwir trezyenm mwan. E tir li konpletman pou ki Seselwa – travayer Seselwa pa pou ganny zot trezyenm mwan. Me les mwan fer dimoun deor laba ki pe ekout nou, sirtou bann travayer, konpran 3 keksoz Mr Speaker,

Premyerman, trezyenm mwan i la, e i pou reste, e i pou la apre 2025!

(APPLAUSE)

HON BERNARD GEORGES

Sa trezyenm mwan pa pe al okenn par. Dezyenm keksoz. Tou travayer – tou travayer i kapab ganny en trezyenm mwan tou le-z-an si zot travay!

E trwazyenm keksoz, sel keksoz ki sa travayer i bezwen fer pou li ganny son trezyenm mwan se travay, travay byen, travay konsyansyezman e delivre dan son landrwa travay.

Mr Speaker, eski sa, i en keksoz nouvo? I en keksoz ki nou pe evante? I en keksoz drol? Eski en travayer ler i sorti kot li bomaten pou li al fer son zournen, eski dan son lespri i pa devret pe desann pou al travay byen, for, konsyansyezman e delivre pour son landrwa travay?

Alor akoz ki Lopozisyon i annan en problemm avek sa?

Akoz ki zot pa anvi ki dimoun i desann, i travay, i travay konsyansyezman. I travay for, i travay byen e i siport zot landrwa travay? Akoz zot pa anvi sa?

Kisisa ki dan zot lespri ki anpes zot konman bann dimoun swadizan responsab, pou siport sa lide ki tou travayer, enkli ou Mr Speaker, mwan, *Leader* Lopozisyon, tou dimoun isi dan sa Lasanble, tou travayer *Secretariat*, tou dimoun deor, se sa ki nou ganny demande pou fer pour sa

saler ki nou gannyen lafen dimwan.

E en fwa ki nou konpran sa Mr Speaker, nou ava konpran egzakteman ki diferans i annan lo sa size trezyenm mwan ant Lopozisyon avek nou.

Pou Lopozisyon parey zot in fer resorti ozordi, trezyenm mwan i en drwa. I en drwa ki tou dimoun i devret annan. Ki zot travay, ki zot travay byen. Ki zot travay mal, ki zot trenn lipye, ki zot konsyansye. Sa set en drwa ki tou dimoun i devret annan, dapre zot.

Pour nou lo sa kote latab - e sa i antre dan nou filozofi transformasyon sa pep apre 43an sosyalis, dan nou lespri Mr Speaker, lo sa kote latab, trezyenm mwan i en *reward* ki tou travayer i gannyen si zot travay byen.

Sa se diferans ant zot avek nou. Si nou ekout zot Mr Speaker, si nou ekout zot, nou pou retourn dan sa sistenm kot travay pa travay, etidye pa etidye, *saving* pour en lakaz pa *saving* pour en lakaz, trennen pa trennen ou pou ganny tou sa ki ou bezwen.

Avek sa sistenm Mr Speaker, nou pou ariv kot nou ti ete an Oktob 2020, ler Lepep Seselwa in dir; *enough is enough*, nou nepli anvi sa kalite

keksoz annou sanze. E sa trezyenm mwan, sa modifikasyon dan sa propozisyon trezyenm mwan i antre dan sa filozofi ki diferan ant nou avek zot.

E mon pe demann zot ozordi, silvouple aret konfiz lepep. Zot, zot annan en sistenm fer. Sa sistenm in *fail*. Se pour sa rezon ki zot dan Lopozisyon.

(APPLAUSE)

HON BERNARD GEORGES

Travayer Mr Speaker, i pa en kategori dimoun apar. Napa en kategori dimoun, napa en *constituency* ki apel travayer ki nou bezwen pe lager pour zot.

Travayer Mr Speaker, se; ou, mwan, nou tou isi dan sa Lasanble, tou dimoun deor; tou dimoun ki leve bomaten ki sorti dan zot lili, ki anbark dan zot bis oubyen dan zot loto e ki al travay. Se sa travayer.

Alor nou isi nou napa en drwa pou nou koz lo en seksyon popilasyon. Konmsi sa se travayer ki bezwen ganny proteze. Non, Mr Speaker, nou bezwen koz lo tou dimoun ki leve bomaten ki al kontribye pou fer nou pei marse.

E si sa i konsern nou, i konsern nou osi. Sa ki nou pe lager pour zot, nou pe lager

pour nou osi. E sa ki nou, nou pe lager pour nou, nou pe lager pour zot osi. E se sa ki fodre nou konpran si nou pou arive fer sa pei marse.

Me malerezman Mr Speaker, avek en Lopozisyon ki la zis pou divize e senm konfizyon, zanmen nou pou ariv dan nou bi, tan ki zot la pe trenn nou deryer anmezir ki nou, nou anvi al devan. Parey zot in montre nou ozordi pandan en lazournen antye.

Mr Speaker, trezyenm mwan i pa en keksoz ki nou'n evante nou. I pa en keksoz ki Onorab Cosgrow oubyen *SPPF* in evante. I pa en keksoz ki *LDS* oubyen *SNP* in evante. I antre dan en kad *reward* pour travay dir e konsyansye.

Avan ti annan trezyenm mwan, ti annan lezot fason pou en anplwaye – en anplwayer *reward* son anplwayer. I ti donn li en *bonus*. Oubyen i ti donn li en pti *loan* ler i ti bezwen. Oubyen i ti donn li en logmantasyon saler. Oubyen i ti donn li en promosyon.

Tousala i antre dan sa kad. Trezyenm mwan i en lot – en lot sa bann *reward*. En lot sa bann bonis ki en sosyete ler in ariv a en nivo devlopman kot i santi ki i kapab fer, i fer pour son pep.

E en fwa ki Lepep i konpran sa Mr Speaker, nou ava konpran akòz *LDS* pe dir nou a sorti lo en sistenm kot tou dimoun konsyansye ou pa, i gannyen. Nou a fer tranzisyon atraver en sistenm kot ou a ganny lanmwaye. Me lanmwaye ou ava bezwen montre ki ou bezwen, ou merit gannyen. E nou ariv dan en sistenm kot tou ou trezyenm mwan ou ava bezwen montre ki ou merite gannyen.

Me en keksoz pa'n sanz ditou e sa se trezyenm mwan i la. E tou travayer Seselwa i annan drwa akse a en trezyenm mwan. Sa set en prensip ki pa pe sanze. E dimoun deor i bezwen konpran sa Mr Speaker, tre byen.

Nou lo nou kote latab nou konpran sa nou Mr Speaker. Ou konnen akòz? Akòz malgre tou sa bann keksoz ki nou pe tandè ki zot, zot in mazin sa ki Onorab Cosgrow in anmenn devan Lasanble, eksetera, se nou ki ti deside konman *SNP*, *LDS* pou anmenn trezyenm mwan pour Lepep Seselwa.

(APPLAUSE)

HON BERNARD GEORGES

Sa tir dan zot lespri mon bann zanmi lo lot kote latab ki sete zot lide. Sa se nou lide. E ler -

Mr Speaker, mon ava fer dimoun rapel; ler nou, nou ti dir sa lide. Ki zot, zot ti fer? Zot ti taye pou al dir; ar, nou'n vol zot lide.

Zot lide ti anndan dan Labank Santral oubyen dan Minister Finans. Fer tou sort lanket. Al rode lekel ki'n *leak* eksetera. Akòz? Akòz Mr Speaker? Akòz nou, nou ti'n vin avek en lide ki zot ti konnen i ti pou marse avek Lepep Seselwa. E zot, apre 43an zot pa ti'n kapab arive mazin sa lide.

(APPLAUSE)

HON BERNARD GEORGES

Alor, konpran byen – konpran byen ki nou ki'n vin avek sa. E lide ti tre senp Mr Speaker. Lide sete pou permet dan en moman kot Seselwa ti pe depans tou zot saler pou pey zot lakaz, pou pey zot *Bill*, pou pey zot transportasyon, pou fer grandi zot zanfan, kot zot pa ti kapab fer en *saving*. Nou lespri sete ki sa trezyenm mwan i ava vin en *saving*.

E nou ti dir sa ler nou ti entrodwi li. Mwan mon ti dir sa isi dan sa Lasanble ler mon ti siport sa *Bill* ler i ti ganny anmennen. E nou ti dir sa lespri se pou ed dimoun ki'n travay pandan 1 an, ki pa'n kapab fer

en *saving*, kapab ganny sa larzan.

Swa pou zot al trete deor. Swa pou zot pran en pti vakans. Swa pou zot aste en *fridge* oubyen en *deep*, oubyen en *cooker*. So, tou sa bann keksoz sete pou ed zot met sa pti lekonomi de kote. Sete sa lespri ki ti antre dan nou – dan nou lide, dan nou lespri ler nou ti fer sa.

Alor Mr Speaker, nou bezwen dir ki si i annan en sanpyon travayer isi dan sa pei ozordi, se parti *LDS*!

(APPLAUSE)

HON BERNARD GEORGES

Pa ekout sa bann dimoun ki pandan 43an, zanmen zot in mazin anmenn en trezyenm mwan Mr Speaker. Pa ekout bann dimoun ki pe sey vol lide zot kanmarad, tay avek! Pa ekout bann dimoun ki pe anmenn konfizyon, ki pe eksplike, ki pe fer krwar ki trezyenm mwan pe ale. Aret ekout zot. Ekout nou akoz se nou sover e sofgard nou pei pour le fitir.

(APPLAUSE)

HON BERNARD GEORGES

Mr Speaker, ler zot largiman in fini e zot pa konnen ki pou dir,

zot al koz lo *Cabinet* pe al rod R230 mil pour Prezidan, R130 ekek mil pour Vis Prezidan eksetera.

Mr Speaker, les mwan fer – les mwan fer dimoun konpran en keksoz. Yer dan sa Lasanble in ganny dir klerman ki napa okenn desizyon ki'n ganny pran pour okenn logmantasyon saler, pou okenn pos konstitisyonnèl.

Sa se bann refleksyon, bann propozisyon ki *Cabinet* i ankor pe travay lo la.

Par kont – par kont ler *Cabinet US* ti pran – or Lepep. Mon pa rapel ki zot non ti ete akoz zot in sanz telman non.

(laughter)

HON BERNARD GEORGES

Ler *Cabinet* ti pran en desizyon ki tou bann Minis e Prezidan, e Vis Prezidan pa ti pou pran zot gratwite lafen lannen e zot ti pou *forego*. Ki zot in fer Mr Speaker? Zot in pas par deryer zot in al pran zot larzan!

(APPLAUSE)

HON BERNARD GEORGES

La, la – La, la diferans. E prezan sanmenm sa Minis ki ozordi pe koz bon labous, konmkwa li ki'n anmenn sa *Bill* ler i ti Minis. I bliye dir nou ki li i ti parmi sa

bann ki ti taye, ki ti pran larzan
forego!

(APPLAUSE)
(laughter)

HON BERNARD GEORGES

Alor mon bann zanmi, ler ou lanmen pa prop, pa vin koz bon labous.

(APPLAUSE)

HON BERNARD GEORGES

Pa vin koz bon labous. E Mr Speaker, - E Mr Speaker, Onorab Cosgrow i lo mon *case* depi yer. Mon'n ekout li byen. Yer mon ti en dimoun ki ti pe al pran retret. Mon ti'n fini. Mon ti'n fini. La ozordi mon en Avoka. Mr Speaker, gro ker mon abitye sa. Mon konnen dimoun - zalouzi ou pa pou kapab anpes personn.

Me en keksoz mon kapab dir – en keksoz mon kapab dir Mr Speaker, ki mwan mon dan politik depi ler ki Onorab Cosgrow, atraver ou, ti ankor Lekol Primer dan kannson kourt Mr Speaker.

(APPLAUSE)

HON BERNARD GEORGES

Mwan mon karyer politik – mon karyer politik pa'n en karyer

kanmaron ki'n sorti Minis ki'n retourn *MNA*.

(laughter)

(APPLAUSE)

HON BERNARD GEORGES

Me i en karyer politik kot mon ti *stand* pour en eleksyon an 1993, mon ti perdi. Mon ti *stand* en dezyenm an 1998, mon ti perdi. Mon ti antre konman en Manm Proporsyonnel an 2001 ansanm avek Onorab Esparon. Mon ti *stand* an 2002 mon ti gannyen. Mon ti *stand* an 2006, mon ti gannyen. Mon ti *stand* an 2016, mon ti gannyen. Mon ti *stand* an 2020 mon ti gannyen.

(APPLAUSE)

HON BERNARD GEORGES

E si Onorab Cosgrow i anvi en kontestasyon, desann Les Mamelles 2025, nou a gete lekel dimoun ki antre dan Lasanble.

(APPLAUSE)

HON BERNARD GEORGES

Alor Mr Speaker, an konklizyon.

(Interruption)

HON BERNARD GEORGES

An konklizyon...

(Interruption)

MR SPEAKER

Onorab!

HON BERNARD GEORGES

An konklizyon...

(Interruption)

MR SPEAKER

Onorab.

HON BERNARD GEORGES

An konklizyon.

MR SPEAKER

Ler ou ti pe koze, personn pa ti enteronp ou. Onorab Georges, konklizyon?

HON BERNARD GEORGES

An konklizyon Mr Speaker, sa ki pe fer la ozordi parey mon ti dir taler, i en *finetuning* en *Bill*. E i byen ki nou pe fer sa bann seri lamannman. Akoz anmezir ki sityasyon i devlope, nou bezwen amann sa *Bill* pou fer sir ki otan travayer i ganny proteze. Otan levantay i ganny ouver pou kouver otan travayer ki posib. Alor, en dernyen parol.

Ou war Mr Speaker, sa bann amannman la. Pa ti pou neserer. Nou pa ti pou bezwen koz lo sa 50poursan ek sa lezot

50poursan si tou dimoun ti travay dan en fason konsyansye. Tel parey, nou pa ti pou bezwen yer vin fer logmantasyon en *fine* si tou marsan ti respekte *MRP*. Me malerezman – malerezman se pa tou dimoun ki swiv Lalwa e se pa tou dimoun ki fer parey zot devret pe fer anba Lalwa.

E se pour sa rezon ki nou bezwen tanzantan - e sa Gouvernman i atantif a sa. E i bezwen vini e fer bann *finetuning* e anmenn bann Lalwa ki pou permet dan sa ka ki sak dimoun, sak Seselwa a lafen sak lannen ki ler in travay, i a kapab atraver sa mekanizm ki'n ganny met an plas, tous son trezyenm mwan e ariv kot li avek son pti *savings* lafen lannen. Mersi Mr Speaker.

MR SPEAKER

Mersi Onorab. Bon, avek sa, Minis laparol i retourn kot ou. E nou a demann ou pou fer ou repons e konklizyon lo deba.

MINISTER PATRICIA FRANCOURT

Mersi Mr Speaker. Mon le remerci tou bann Onorab pour tou zot bann kontribisyon ki zot in fer apre midi. E mon rekonnet ki lamazorite zot, zot in konpran *concept* sa *Bill*. Lamazorite zot.

I annan bann mesaz pozitiv ki'n sorti e mon apresye ki nou'n ganny sa sipor avek *National Assembly* ozordi.

E mon konnen bann mesaz ki'n sorti in ede pou edik dimoun deor pou zot konpran ki savedir trezyenm mwan saler.

I annan bann mesaz *powerful*, parey nou dir, ki'n sorti pour *both* travayer avek anplwayer. E sa ki'n sorti vreman for se *concept* travay dir. Ki sak fwa mon vin isi konman Minis Lanplwa e Zafer Sosyal, mon koz lo la vreman for.

E i reste fondamantal ki nou kontinyen travay dir pour benefit sa lekonomi, me osi nou pei. Mr Speaker, mon oule fer resorti ki trezyenm mwan saler i en konponan *performance appraisal*. Benefis ki sa i anmennen pour en travayer i pou osi organizasyon, me selman pour pei an antye.

I en mekanizm ki pou ed anmenn nou pei devan. Trezyenm mwan saler i osi 100poursan. Alor annou pa *distort* sa ki pe ganny dir.

En dimoun i kapab ganny son 100poursan, be i bezwen *earn* sa ki i travay e sa ki i prodwir. Nou pe koz lo prodiktivite.

Mr Speaker, i annan bann Onorab – enn de Onorab isi ki'n *selective* ki mannyer zot swazir pou definir trezyenm mwan saler. So petet letan mon al dan *Committee Stage*, mon ava avek ou permisyon, les *Chief Secretary* koz en pti pe lo sirkiler 2015, e ki donn byen leksplikasyon ki sa ti *entail*. E ki bout ki petet Lopozisyon i deside pou koz lo la. Me sa gran bout zot kit deor.

Alor Mr Speaker, avek ou permisyon parey mon'n dir, mon ti a kontan pli tar CS donn en pti pe plis lenformasyon. Mon pa ganny en konpran akoz letan nou pe met larzan an plis dan pos Seselwa, me selman nou vwar sa i en problemm. I pa devret en problemm.

Sa ki nou pe fer ozordi, sa *Bill* ki nou pe anmennen, *100percent* dimoun pou annan plis larzan. E en *targeted group* – pou annan en group ki pa ti pou'n gannyen otreman, me i pou annan larzan dan son pos. *So, it is a very good Bill* ki'n vin devan nou.

Sa Gouvernman i en Gouvernman ki ekoute e i ekout atantiv. E i pran kont ki pe ganny dir avek son pep. E letan zot fer li, zot fer li dan en fason ki byen. Napa en fason ki dimoun pou ganny viktimize, oubyen en fason ki dimoun pou

santi poudir li i pa'n ganny *part of what* i *deserve* akoz pour sa rezon ou sa rezon. Non, i fer li byen. E sa, sa bout ki zoli ou kapab dir avek sa Gouvernman. Zot fer li byen.

Zis pou adres enn de pwen Mr Speaker. Letan nou pe koz lo bann *effective monitoring and compliance*, pour bann Onorab ki'n demande, *monitoring* i fer par en lenspeksyon *through the workplace, through complaints received from* bann travayer. E *through the grievance process*.

I annan en *grievance process* ki nou'n koz lo la. I an plas. E sa i la pou kapab *capture* bann *grievance*. Alors si i annan *noncompliance* parey nou dir, i bezwen – sa bann aksyon i bezwen ganny swiv pou nou kapab *follow* sa prosedir.

Pour bann Onorab ki'n demann *in terms of training* avek *performance – performance appraisal training* ek *system*. Avek *TGMI* parey mon'n dir, nou ti met an plas bann *training programs*. E nou pou kontinyen fer sa an kolaborasyon avek *ESA*.

Me selman ki nou ti war dernyen fwa, pa bokou *organisation* ki ti *take that opportunity*. So mon lapel ankor se pou plis *organisation come forward* e vin pran sa bann

training ki nou met an plas, pou zot kapab benefisyé.

Pour bann Onorab ki'n demann ki mannyer dimoun pou ganny 45 mil 450? Nou redir ankor, i en diskresyon. *It remains* en diskresyon *of* sa anplwayer pou li donn *employees earning* par lao 45 mil 450.

I annan en Onorab ki'n koz vremen lo enklizivite. *Inclusivity* lo bann travayer. E mon kontan ki sa in ganny *noticed*. Akoz letan nou regard bann group ki nou pe *target* pou – la zot pou kapab ganny en trezyenm mwan saler. I annan bann group vremen vilnerab parey bann group ki annan dezabilite. Bann group sirtou ki bokou zot, zot in koz lo *drugs*. Zot *drugs dependence*.

E nou pe fer en gran louvraz kot Lanplwa pou fer sir sa bann dimoun i sorti lo drog, e zot pran en louvraz. So, ou vwar bann group ki vremen vilnerab. Nou pe *target* zot osi.

So, mon'n dir ankor poudir *thirteenth month pay* i devret lo prensip *of paying* 100poursan. Be selman i *link* avek *performance*.

Pou mwan koriz en Onorab ki'n koz lo Gouvernman i fer *savings*. Gouvernman pa son lentansyon fer *savings*. Sa i

pa korek. Me selman son lentansyon se pou donn tou dimoun larzan.

Me selman si sa travayer i pa'n *perform*, sa i en responsabilite ki sa travayer i bezwen pran. Ou pa kapab dir mwan pou dir si en dimoun i pa pe travay, i pa pe *perform*, donn li *100percent* lo son *performance rate* e zis pou li ganny sa saler.

Non, *it should not be like that*. En organizasyon ki responsab i pou bezwen kapab fer sir poudir, ler i pe fer son *performance management review*, i fer sir poudir sa dimoun i lo *target* ki'n mete. I pa pe zis *tick a box* parey en legzersis.

In line ek sa letan nou regard nou statistics, nou ti ganny en total *557 calls* pour rod klarifikasyon lannen pase. Sa lannen letan nou ti pe demann dimoun *to come forward*. So, *557 calls* lo trezyenm mwan saler. 29 ladan ti *registered grievances*.

So, i montre nou poudir ennler nou *underestimate* nou pe deor. Nou pep deor i konpran vremen byen mannyer keksoz i marse. E zot konn servi prosedir vremen byen. So 29 *registered grievances* ek 39 *complaints* ki ti vin *forward*.

Pour Onorab ki'n demande ki mannyer bann dimoun ki ganny 45 mil 450 i ganny *appraised*. I toultan i annan en *hierarchy of appraisal*.

So sa *line manager* i *line manager* en lot, i *line manager* en lot. E sa i kontinyen koumsa *in terms of appraisal systems*. I pou toultan annan en dimoun par lao ou, *right to the very top* ki *appraise*. E *this is how it should be*.

Fer dimoun mazinez poudir travayer i ganny drwa demann kestyon e *challenge about their job description*. Be osi zot *professional development*. Akoz *part of professional performance is also looking at, professional development* ki en dimoun i bezwen.

Savedir ou bezwen *move* li *from a to c* ki devret fer. E set li bann *targets* pou li kapab *achieve*. Se sa ki fer en dimoun progresse. Se sa ki anmenn en *sense of belonging* dan ou *workplace*. Letan ou war ou pe fer progre.

Nou fer resorti ki i bezwen annan toultan *monitoring of workers performance*. E se pour sa rezon ki i annan en *mid evalyasyon at the end of the final evaluation*. E *this is the performance management*

review. Appraisal li – fodre nou ganny sa kler.

Appraisal li i toultan pe kontinyen li. Ou pa esper pou ou al mezir sa dimoun 6 mwan oubyen 12 mwan apre. Ou pe toultan travay avek sa travayer, pou regarde kwa ki i kapab amelyore. Kwa ki i kapab fer pli byen pou fer sir poudir i pe delivre e i prodiktiv. I en konversasyon ki kontinyen.

Pour bann Onorab ki'n demann about *fairness*. *Fairness* in ki mannyer sa travayer i ganny *assessed*. Wi i enportan pou annan *fairness* e i bezwen annan en sistenm an plas ki *challenge* sa.

E letan nou pe koz travay. Mon konnen nou dir nou zis nou koz travay. Travay i enn li. Me selman nou bezwen get *quality* – kalite travay ki nou dimoun pe donn nou. E standar pou prodwir pou fer prodiktivite. I pa vedir zis nou ale nou al travay, be ki standar nou pe anmennen dan nou louvraz. E mon konnen *Results-Based Management ek RMB* i regard sa vreman *close* e i *challenge* sa.

So, kot Departman Lanplwa nou kontinyen *showcase* bann *good practices*, kot bann employer's e bann lenstitisyon ki pe fer vreman byen, zot ganny sans *showcase*

pou bann leres biznes kapab vini vin regarde.

So akoz i enportan pou annan prodiktivite ki *link* avek *performance*? Mon'n tann bokou zot, zot in demann sa. Prodiktivite i dan *private* oubyen *public service*, nou tou nou annan en *duty* pour nou donn *the best service, always*. Nou pa kapab parey mon'n dir, zis ale dir nou al travay. Me selman nou pa pe donn servis de kalite.

Nou bezwen *improve efficiency*. Nou koz lo la tou le zour. Nou tou ki la dan sa lasal, nou konnen letan nou pa'n ganny en servis ki *efficient*, akoz nou konplent oubyen nou pa kontan.

Me si nou'n al dan en landrwa kot nou konnen servis ti 100poursan. Nou sorti nou satisfes konman en kliyan. Menm si nou al deor annan de fwa *out of Seychelles*. Nou ganny *very good service*, nou vini nou dir sa ti en *service* ki *efficient*.

Me nou osi nou bezwen ariv lo sa standar ki *service* i *efficient*. I bezwen annan *continuous improvement*. Nou pa kapab *stagnant* dan nou louvraz ki nou fer e *mediocre*. Konmsi nou vini zis nou travay. Me nou bezwen pe progrese toultan.

E sa i en keksoz ki bon pour *mindset*. I en keksoz ki bon pour *self-esteem* e i en keksoz ki bon pour konfidansosi, akoz sa dimoun i santi i a pe *grow* dan son louvraz. Alor *the monitoring* i toultan la.

Letan nou pe *monitor, again* ki letan nou pe koz trezyenm mwan saler, nou bezwen fer sir nou pe *monitor* sa endividyel ki pe donn sa servis. Sa tim ki pe donn sa servis. Sa lakonpanyen ki pe donn sa servis. E sa lendistri ki pe donn sa servis. *Ultimately* tousala pou annan en lefe lo pei an antye.

Fodre pa nou bliye poudir dan bann *work establishments* i annan diferan keksoz ki mezir prodiktivite, ki *link again* avek *performance*. Nou bezwen regarde ki nou bann dimoun i satisfè nou *customer satisfaction*. Dimoun i satisfè. *Employee* i santi *motivate*.

Akoz si i pa *motivated*, i napa en satisfaksyon vin travay. E sa i *psychological*. I enportan pour sa dimoun *feel* ki i pe travay e i pe war rezilta. E i sorti ler i fini travay, i al dan lakour avek en satisfaksyon. E i ede pou *grow*.

E tousala letan nou fer li byen, Mr Speaker, i montre ki i anmenn reveni avek profi. Akoz *after all the more* reveni avek

profi ki sa biznes ti anmennen, i ed lekonomi e i ed pei.

Zis pou mwan *reiterate*, en Onorab ki ti demande si sa dimoun in konmans le 1er Zilyet e i sorti i ale le 31 Desanm, me in fer 6 mwan. Son *first cycle* i vin le 1er Zanvyè. Sa lot lannen sa dimoun pa pou ganny peye sa trezyenm mwan.

E mon *reiterate again* akoz i paret i annan konfizyon. Si sa landrwa travay napa en sistenm an plas, i bezwen pey son travayer 100poursan.

Mr Speaker, mon *divert* en pti pe akoz ou konnen dan Lasanble toultan i annan politik ki pase, me selman pa tou bann keksoz ki ganny dir i laverite.

Petet mon a zis *remind* bann Onorab ki'n dir serten keksoz, me osi bann piblik an deor, pou dir sa Gouvernman in toultan met aker son dimoun e in toultan fer byen, pou fer sir ki son dimoun i benefisye.

Fodre pa nou bliye poudir letan *ASP* ti donn 32poursan *increase* lo *welfare*, e larzan ki'n ed bann dimoun ki zot klasifye konman vilnerab.

Fodre pa nou bliye poudir ler nou ti donn *PUC rebates* pour bann dimoun ki pa ti kapab pey zot *Bill*, ti pe ed dimoun. E nou ti pe *target* 500 dimoun. Fodre pa nou bliye ki ti

annan 10poursan saler *increase* dan Gouvernman.

E fodre pa nou bliye poudir ler *COVID* ti tap nou, nou bann premye pei ki ti ouver pei – *airport* ki ti ouver pei. E si sa pa ti arive, petet nou bann biznes pa ti pou *thrive*. Ozordi nou pa ti pou koz lo trezyenm mwan saler.

Fodre pa nou bliye ti annan plis 2 mil dimoun ki ti travay – lo *URS*. Ou konnen kwa, ozordi zot dan louvraz, zot pou al gannyen en trezyenm mwan saler. Savedir 2 mil travayer.

(APPLAUSE)

MINISTER PATRICIA
FRANCOURT

E sa ti en desizyon fantastik ki nou ti fer. Fodre pa osi nou bliye poudir *airport* ek lekonomi ti rekonmanse. E saler ti ganny peye garanti. I annan en kantite landrwa petet saler ti dan dout. Me selman isi avek bann bon desizyon saler ti ganny peye.

Fodre pa nou bliye poudir touris ti konmans antre - nou *bread and butter*. E sa ti anmenn *earnings* dan nou pei. *Tourism* i konmans monte. Bann leres avyon ti konmans antre dan Sesel. E ler zot ti antre *of course*, i ouver *connectivity* avek bann leres pei.

Pli gro *achievement* fodre pa nou bliye sa Gouvernman ti save *Air Seychelles*. E 600 louvraz ti ganny proteze!

(APPLAUSE)

MINISTER PATRICIA
FRANCOURT

Dimoun ki ti kekfwa deor dan louvraz otreman. Me 600 *jobs* ti ganny proteze. Letan nou get kot Departman Lanplwa, nou war kantite program in ganny met an plas. E nou pe *still* ede en kantite dimoun pou kapab antre dan louvraz.

Nou pe *train* nou bann *youth*. Nou pe *train* nou bann *vulnerable group*. Nou pe *train* nou bann group dezabilite. Bann *My First Job Programs*, tousala i bann sikse ki Gouvernman in fer.

Mr Speaker, i annan en Onorab ki letan i koze *how passionate* e sansib e sa size i ete pour li. Sa size i sansib pour mwan osi sa. Akoz mwan mon pa bliye mwan ler zot ti viktimiz dimoun, e dimoun ti napa louvraz. Nou pa ni ti kapab koz lo trezyenm mwan saler.

(APPLAUSE)

MINISTER PATRICIA
FRANCOURT

Mon pa bliye letan waon enn parmi mon ti bezwen *security clearance* pou mwan ganny en louvraz. E aköz mon pa ti ganny en *security clearance*, mon ti napa en saler ki ti antre. Sa bann keksoz nou pa bliye.

So ozordi letan nou regarde, i annan en *turn around*. I pa *matter* ki parti ou ladan. Parey nou dir ‘Sesel i pour tou son zanfan’. E zot tou zot la, Tou dimoun pe travay, Tou dimoun pe kontribye. So i montre ou mannyer sa Gouvernman i *care*.

Alor pou fini Mr Speaker, mon le pran sa loportinite pou remersi tou bann travayer ki'n travay vreman dir dan sa pei e fer sir ki sa bann *benefits* ki nou pe *reap* ozordi, ki nou pe *take it for granted, it's because of their hard work*.

E zot donn bokou. Lamazorite dimoun i donn bokou. E nou *advocate* pour *positive attitude* e en bon mannyer *towards* louvraz. I enportan ki nou *inspire* nou bann travayer, ki zot kapab *grow* e zot *mindset* i anmenn bann rezilta ki formidab pour pei.

Sanzman pe arive dan pei, sitan vit ennler mon krwar Lopozisyon pa remarke. Sanzman i arive e dimoun i konpran, e dimoun pe aksepte

sa bann sanzman. Dimoun la deor i konpran sa bann sanzman. E zot realize poudir en Gouvernman ki ekoute. En Gouvernman ki diskite. En Gouvernman ki pran aksyon san lafreyer.

E alor Mr Speaker, mwan mon konvenki ki sa *Bill* ozordi ki'n anmenn isi, i pou donn nou letan. I pou donn bann biznes letan pou zot kapab met zot lekor annord. E si nou al dan sa direksyon kot nou donn tou konman en travayer, mon krwar Sesel antye pou benefisye. Mersi Mr Speaker.

(APPLAUSE)

MR SPEAKER

Mersi Minis. Bon mon ava aprezan apel bann Manm pou *vote* lo sa *Bill* lo *general merit* dan *Second Reading*. Manm ki an faver, lev lanmen silvouple? Mersi. Manm ki kont?

Lo *general merit Employment (Amendment) Bill, 2023*, 22 Manm in *vote* pour, 0 kont e 9 abstansyon. *Bill* in aprouve lo *general merit* e Madanm Clerk a fer *Second Reading*. Madanm Deputy Clerk?

MADAM DEPUTY CLERK

Mersi Mr Speaker. *A Bill for an Act to amend the Employment Act, (Cap 69).*

MR SPEAKER

Thank you. Mon war en lamannman. Donk nou a pas dan Staz Komite. E lekel – Onorab Hoareau, ou ki pou lir?

HON JOHN HOAREAU

Mersi Mr Speaker. Ankor en bonn apre midi tou dimoun. Nou premye lamannman pour sa *Bill* i lo son *short title, clause 1*. I lir koumsa;

“This Act may be cited as the Employment (Amendment) Act, 2023. (full stop)

Apre nou dezyenm lamannman i ganny trouve lo *clause 2. Amendment of section 46C* i lir koumsa; *‘the Employment Act, (Cap 69) (hereinafter the principal Act) is amended in section 46C as follows. Ok? So* nou pe retir sa bout ki met *“principal Act”* apre sa bout ki mon'n lir.

MR SPEAKER

Petet ou a kapab zis poz lanmenm en moman, pou gete si *panel* in swiv sa bann lamannman. Korek? Kontinyen Onorab Hoareau.

HON JOHN HOAREAU

Nou pou kontinyen lo paz 4. E la nou pe get - ankor nou lo *clause 2* me selman *subsection (g)* – *sorry. Yes, subsection (g)(6); ‘A worker’* – ki konmans lo la; *‘A worker who has been employed’*. Si nou get lo 1, 2 3 – katriyenm laliny, *after the word “paid”*, nou'n include *“a”*. So, *“a thirteenth month pay”*.

Nou al lo *subsection 7*. Si nou kont li. 1,2,3,4,5 – sizyenm laliny ankor kot i dir; *“corresponding year shall be paid a thirteenth month pay”*.

Apre nou lo *subsection 7(a)*. La *query* sete si son *principal Bill* i servi *“his”* konman en maskilen. E sa i leka alor nou pe' kit li *“his”*. Selman, *after the word ‘during’* dan trwazyenm laliny nou'n include *“the probationary period”*.

Nou al lo paz 5, *Subsection 7(c)*. Dezyenm laliny *after the word “grounds of a serious disciplinary offence”*. Nou'n insert *“a”* *after the word “of”*. Prezan nou al lo *subsection 8*.

MR SPEAKER

Wi, en moman. Onorab Pillay in lev lanmen. I annan en pwen Onorab?

HON SEBASTIEN PILLAY

Mersi Mr Speaker. Mon annan en *query* ki mon le klarifye lo

subsection 71a. Ok? Manner in set out in terms of grounds pour termination of the employee’, i “grounds of serious disciplinary offence”.

Now, mon problemm ki mwan mon annan ek sa se ki; mon'n resevwar plizyer case. E mon'n deza ekrir Minis lo serten case dan serten lotel ki mon'n gannyen, regarding definisyon “of a serious disciplinary offence” as it is being implied dan serten landrwa travay.

E mon ti a kontan ganny en klarifikasyon si i pou annan en armonizasyon of the type of offences? Mon konnen dan Gouvernman i deza annan bann established practices. Be dan bann landrwa prive, i pa parey. E sakenn i fer li dan son fason, malgre ou annan Employment Act la.

E i pe kree en anomaly kot serten travayer pe ganny terminated for employment lo serten grounds ki ganny azoute ansanm, pou fer li vin en serious disciplinary offence. Savedir i pa ganny pini pour sa lofans ki'n fer premye li. It is amalgamated.

E prezan i pou raise en problemm pour ou aköz, by the time sa i arive, sa dimoun pou bezwen al seek redress prezan. Ki pou pran li en bon pe letan,

menm avan pou li kapa ganny sa trezyenm mwan.

So, what do you have internally ki zot pe propoze pou siport sa, because mon war poudir la it leaves it a bit loose, dan mon lenterpretasyon? Mersi Mr Speaker.

MR SPEAKER

Mesi. Minis, ou kapab adres sa? Yes, PS?

PS VERONIQUE BRESSON

Mersi Mr Speaker. Bonn apre midi tou Manm Onorab. Onorab Leader Lopoziyon, sel Employment Act i donn en lalis bann lofans. Lofans miner avek lofans serye. Me selman sa lalis ki dan Employment Act i pa exhaustive. Savedir, i en bann sizesyon.

Be selman anplwayer si i santi i annan serten aksyon ki travayer in fer, i kapab pran okenn aksyon disipliner ek son travayer. Me selman sa i subject to – sa travayer i kapab challenge sa desizyon sa anplwayer.

So sanmenm sa rezon i annan sa provizyon grievances. E selman en Lakour ki pou kapab reverse desizyon ki anplwayer in kapab fer.

So kantmenm ou pou met, parey ou pe dir, si dan PSO i annan zot lalis, but Employment

Act sa lalis ki i donnen. Akoz i kapab annan lezot aksyon ki en travayer i fer, ki anplwayer i kapab pran aksyon. So ou pa kapab *limit* li lo kantite ki i pou fer.

Me selman parey mon'n dir, sa travayer i *free* pou li fer son *grievance*. Wi, ennler i pran en pti letan. Me selman *at the end of the day*, si i pa ti merit sa aksyon disipliner, sa i a ganny *reversed* e li i ava ganny son benefis ki i merite. Mersi.

MR SPEAKER

Mersi. Onorab Gill?

HON CHURCHILL GILL

Mersi Mr Chair. Mon keston i lo sanmenm sa *clause 7* akoz sa *clause* i osi koz lo bann peyman *pro rata*. Be dan mon lentervansyon mon ti demann Minis pou klarifye en keksoz konsernan *training*.

Akoz i ti dir ki si en travayer in al *training*, i ganny peye *on pro rata*. Prezan mon ti demann li; be, akoz? Akoz sa dimoun *basically* pe *enhance* son abilite pou li delivre plis.

E prezan mon ti dir li spesifye si i pe dir sa dimoun i ganny *pro rata*, si i *initiate* son *training* li in pran konman *sabbatical leave* pou li al son *training*? Oubyen si en *training* ki son konpanyen in anvoy li?

E disteng ant sa de akoz ki i bezwen ganny peye *pro rata*?

MR SPEAKER

Mersi. Minis oubyen *panel* ou kapab adrese? *PS, go ahead please.*

PS VERONIQUE BRESSON

Onorab, pour sa *clause* ki'n donnen pour *training*, i annan en *limit* ki en dimoun fodre i absan, pou li ganny *pro rata*. *It doesn't matter* si li ki'n inisyé son *training*, oubyen si son anplwayer ki'n anvoy li. I leka se ki i absan *from* son landrwa travay pou li kapab kontribye.

Nou apresye sa ki ou pe dir. In ganny sa sans pou li al devlop son lekor. Pou li anmenn benefis pour son anplwayer. Me selman *the fact remains* ki i pa la pou li kapab merit pou li ganny sa trezyenm mwan saler – sa trezyenm mwan lapey. E i pa pe ganny *appraised*. Ou konnen pour sa – i napa sa kontribisyon ki i pe fer.

I pa pe ganny *appraised* pour son performans. Alor, i annan en *limit* letan, ki i donnen ki si ou al lo *training*. Me selman si i en pti pe pli *long term*, sa dimoun i pa pou benefisyé. I a benefisyé ler i retourn dan son lanplwa. Mersi.

MR SPEAKER

Thank you. Wi, Onorab Pillay?

HON SEBASTIEN PILLAY

Mersi Mr Speaker. Mon annan en dernyen kestyon. Mon pa antyerman dakor ek larepons ki mon'n gannyen vizavi *Employment Act*. Mon konnen *Employment Act* i prekoniz serten lofans as *serious disciplinary offences*. *And then* i vin *serious prejudice to the organisation*. *And then* ou perdi tou keksoz.

Sa ki mon'n rankontre bann ka ki mon'n vwar e ki mon'n – bann ki mon'n kapab anvoy kot Minis, mon pe war sityasyon da bann lotel sirtou, ki mannyer sa pe vin en problem pour bann travayer Seselwa.

E i annan menm *insubordination*, menm konman en dimoun zis i refize pou fer en keksoz baze si i ti lo son *off*, i ganny servi koman *insubordination and then its amalgamated and insubordination is blown out of proportion*.

Prezan ou pe dir mwan poudir sa dimoun i *subject to* en *appraisal system*. Problem i sak lorganizasyon pou annan en *appraisal system*. *What guarantee* ki mon annan? Mon konnen – mon pa le *labour* sa pwen Mr Speaker.

Be selman ki garanti ki mwan mon annan la, ki ou *Labour Department* ou kapab konnen par egzanp dan – lo laferm Onorab Georges, ou konnen ki *appraisal system* i pe servi. E si son *appraisal system* i en *appraisal system* ki rezonnab.

Or dan lotel Onorab Gill. Menm parey, son *appraisal system* i rezonnab. *How do you know this, so that at least* mon annan en serten konfyans ki i annan en *droit de regard* lo ki mannyer sa travayer pe ganny *appraise*? Akoz i pou *disproportionate* dan en lot lorganizasyon. En *appraisal system* pe marse dan en lot.

Mon konnen sak landrwa i fer son *appraisal system*. Me kote ki zot antre pou zot gete zot? Mersi. Dernyen kestyon. Mersi Mr Speaker.

MR SPEAKER

Mersi. Minis oubyen PS a klarifye?

PS VERONIQUE BRESSON

Ok. Onorab, konsernan *appraisal*, parey ou'n dir, ou'n dir byen poudir; Gouvernman pa'n anvi antre dan lorganizasyon prive sirtou, pou al enpoz lo zot ki kalite sistenm *performance management* zot

anvi entrodwir. Zot in ganny sa fleksibilite pou fer li.

E pou fer rapel, i dan lentere en anplwayer pou li fer sir son *appraisal system*, i *fair and just*. Akoz si i pa fer sa, i pou toultan pe vwar li pe ganny trennen dan bann *grievances*.

Akoz parey mon'n dir pli boner, en travayer i *free* si i santi poudir i mal ganny *appraised*, oubyen son bann pwen ki'n gannyen *or anything* ki i annan ek son *appraisal*, i *free* pou li *challenge* desizyon ki sa anplwayer in fer.

Be selman mon pran kont ou rezervasyon. E nou konman en departman. Par egzanp, parey pli boner in ganny demande; pour ki rezon nou pa'n fer sa benefis vin 100poursan baze lo *appraisal system* pou sa lannen?

Se pour sanmenm sa rezon. Akoz, si nou fer li 100poursan *right now*, lafason ki ler - parey nou'n dir Minis in dir pli boner, nou'n fer en evalyasyon ki mannyer in pase pour 2022. E nou santi poudir bann lorganizasyon pa ankore pare. Nou pe donn zot sa letan pour sa bann lannen ki pe vini la, pou zot met zot byen annord.

Ki travayer ki pou ganny penalize si nou al lo 100poursan la, si sa anplwayer pa ankore pare pou li fer

50poursan, ki mannyer i pou fer pou ler i ariv lo 100poursan? So nou, nou pe met sa.

Nou pe donn zot sa letan pou zot fer li en pti pe – pou tou dimoun met zot an plas. Nou'n met *training* a zot dispozisyon pou zot kapab donn zot *HR Managers*, oubyen zot bann travayer, pou zot kapab ganny *trained* dan sa fason fer. E pei i a bouz pli devan dan en fason koumsa. So, mon ti a profite pou dir sa. Mersi.

MR SPEAKER

Thank you. Thank you PS. Nou a kontinyen. Onorab Hoareau, okenn lanmen pa ti'n leve lo bann pti koreksyon ki ou'n fer. So nou a kontinyen. Mon sipoze in ganny aksepte.

HON JOHN HOAREAU

Ok Mr Speaker, nou ankore lo menm paz 5, subsection (8). Nou vwar ki lo senkyenm laliny, *after the word “from”,* nou'n insert *“calculation of the thirteenth month pay”*. So sa mo *‘calculation of’* in antre. Apre' lo *subsection (h)*, ki swivre zis apre; *‘by repealing subsections.* Nou'n add en *‘s’* avek *subsection.*

Nou kontinyen *amendment of section 46D.* E la nou vwar kot 3 – kot 46D menm, *sorry.* Katriyenm laliny

“respect of the years”. Nou'n include “the”.

46D(2) trwazyenm laliny after the word “to” nou'n insert “the thirteenth month pay”. Subsection 6. La nou'n – dezyenm laliny after the word “worker”. “a thirteenth month pay”. So nou'n include the word “a”. Nou pou kontinyen lo paz 6. Mon krwar i annan en lanmen in leve la.

MR SPEAKER

Sorry yes, mon pe konsantre la. Onorab Pillay, wi?

HON SEBASTIEN PILLAY

Mon pa konnen si Onorab in ariv lo *clause 7*?

MR SPEAKER

Mon krwar i ti pe al lo *clause 7*, right?

HON SEBASTIEN PILLAY

Non, si...

MR SPEAKER

Kot ou ete Onorab?

HON SEBASTIEN PILLAY

Mon le sa *substitution of* sa nouvo *subsection* la. Kot i koz dan sirkonstans kot en anplwaye napa en *appraisal system*, then i bezwen - i *liable* pou li pey sa anplwayer. Anplwayer napa *appraisal*

system, i *liable* pou li pey anplwaye full, right? Now, how do you know that this is happening? So savedir ou pe dir ek sa anplwaye raport kot Lanplwa ki i pa pe ganny *appraised*. Is that the *modus operandi* e ki ou pe *advise* bann anplwaye pou swiv in this context?

MR SPEAKER

Thank you.

HON SEBASTIEN PILLAY

It's not clear la ki mannyer – what is the procedure, kot i pou vini avek sa. Please?

MR SPEAKER,

Panel. PS oubyen Minis?

PS VERONIQUE BRESSON

Ok. Onorab pour sa *clause* la ki nou'n mete konman en prekasyon. Pou sir i ti egziste depi avan, ki si en anplwayer i napa – li lo li menm i pe deside pa met en *appraisal system* oubyen i napa enn, *by the time* i pare pou li *appraise* son *staff*, sa i pe vin konman en penalti ou kapab dir, ki i pou bezwen pey son travayer 100poursan.

Prezan i lo lapar sa travayer si i pa ganny son trezyenm mwan ler sa dat i arive, ki li i sipoze gannyen, i kapab fer son konplent kot

Departman Lanplwa pou nou kapab *take up* avek anplwayer.

So, sa i pou al atraver en konplent. Si anplwayer i pare pou li peye *straight away*, sa i ava fini. Si anplwayer *still* i refize, *then* i pou al atraver en *grievance - grievance procedure*.

HON SEBASTIEN PILLAY

Very quickly Mr Speaker. *But will that not invite* en problem dan relasyon ant sa anplwayer sa anplwayer, vi ki i pe bezwen vin kont en *Competent Authority* pou *adjudicate* lo son trezyenm mwan? *That's my issue. Akoz the process as it exist, it happens all the time.*

But the problem ki pe arive se ki *what I've seen in some cases* i se ki, anplwayer *takes this the wrong way*. E apre i fer lavi sa anplwayer malere pandan lannen, ki *eventually* sa dimoun napa swa e kite.

Akoz napa landrwa ki dir la ki sa anplwayer i konnen, sa anplwayer i konnen poudir; dan sirkonstans kot i napa sa, son anplwayer i annan drwa al kot Lanplwa pou *raise grievance*. Mon pa war en *clause* ki dir sa la mon.

Mon vwar osi ou'n met en *general clause* ki en *liability* pou ler mon napa en *appraisal system*. *I hope* ou pe swiv mwan ki mon pe dir ou. So dan

labsans en *clause* ki dir mwan konman en anplwayer poudir be gete; mon anplwayer pou annan drwa al kot Lanplwa.

Si an spesifikman avek trezyenm mwan, i pou annan drwa ale. *Then* mon pou *ok* avek. *I see there's something missing there*, akoz *otherwise* sa *breakdown* pou kree en problem pour sa anplwayer pli tar.

PS VERONIQUE BRESSON

Onorab, ek sa Lalwa i fer provizyon pou *lodge a grievance*. Nou pa'n met li anba sak *clause* pou nou dir zot – si ou pa ganny sa ou al fer ou *grievance*. Me selman i annan provizyon anba Lalwa pour *grievance*.

Apre kekfwa mon a fer resorti ki pandan bann lannen, nou donn sipor avek anplwayer ansanm avek zot travayer, *through* nou bann lenspeksyon ki nou gannyen. Apre *through* bann – parey nou ti mansyonnen pli boner, nou'n ganny en bon pe travayer ki *call* nou pou demann nou klarifikasyon. So, nou travayer i konnen zot bann drwa. E zot servi zot drwa byen pou zot demann klarifikasyon.

E parey mon'n dir, nou osi donn sa sipor ler nou al fer nou lenspeksyon. Si travayer i fer

nou konnen poudir; be, i pa'n tann son anplwayer pe *set* okenn *target*; i pa pe vwar poudir pou annan en *appraisal*. La nou ava donn sa sipor sa anplwayer pou li met son sistenm an plas. Mersi.

MR SPEAKER

Mersi PS. Onorab Hoareau?

HON JOHN HOAREAU

Mersi. Lo sa menm *clause* ki nou pe koze – *Clause 7*. Wityenm laliny *after the word “worker”* nou'n insert “*a thirteenth month pay*”. So “*a*” in ganny *inserted*.

E lo son dernyen laliny dan sa paragraf, zis avan dernyen laliny. *After the word “service”*, nou'n include “*of the worker as the case may be*”. So “*of the worker*” in ganny *included*.

Prezan nou al lo *clause 9B* kot katriyenm laliny *after the word “salary”*, nou'n include “*a*” ankor, “*thirteenth month pay*”. So la nou annan en *comment* lo setyenm laliny *as regards to the word “subject”* si nou kapab servi *the word “provided”* instead. Nou ti a kontan...

MR SPEAKER

Onorab Georges pe adres sa?

HON JOHN HOAREAU

Yes.

HON BERNARD GEORGES

Yes, Mr Chair. Mersi bokou. An tranzisyon. Akoz sa sete en kestyon ki mwan mon ti'n poze avek *Bills Committee*. Me *legal draftsman* i annan en propozisyon pou remodel sa *clause* – sa *subclause* silvouple. Sa paragraf. Mersi.

MR SPEAKER

Legal draftsman, ou pou fer en propozisyon?

LEGAL DRAFTSPERSON
VICTOR POOL

Mersi Mr Speaker. *Ok*, pour *the new* – nou pe met sa *proposal* devan pou nou re kas sa *(b) as follows*; So, lo komansman menm nou pou dir koumsa; “*if an employer*”. Nou delete sa ‘*may*’. Nou dir; “*if an employer pays to the employer’s Seychellois workers whose monthly salary is in excess of the prescribed salary thirteenth month pay in accordance with subsections (2), (3), (4), (5), (6), (7) and (8)*’,

Prezan nou delete “*subject that*” e apre larestan i swiv. Sa i *proposal*. Mon relir?

MR SPEAKER

Mon krwar si i posib pou ou relir sa *clause* an antye, mon krwar Manm ti a ganny en pli bon nide lo egzakte man ki zot pe war.

LEGAL DRAFTSPERSON
VICTOR POOL

Prezan mon pou relir li byen parey i devret *appears*. I - so (b); “*if an employer pays to the employer’s Seychellois worker whose monthly salary is in excess of the prescribed salary thirteenth month pay in accordance with subsections (2), (3), (4), (5), (6), (7) and (8), the amount of the thirteenth month pay in excess of the prescribed salary shall not be exempt emolument under the Income and Non-Monetary Benefits Tax (Cap 273)*”.

MR SPEAKER

Yeah, prezan mon'n konpran ou.

LEGAL DRAFTSPERSON
VICTOR POOL

Ou konpran?

MR SPEAKER

Manm i annan okenn keston sa *wording*? Onorab Hoareau?

HON JOHN HOAREAU

Mr Speaker, mwan ki pou bezwen *move* sa lamannman. So...

MR SPEAKER,

Well, non mon pe zis tyeke si... Eski ou *move* amannman avan oubyen nou pran komanter? So, *what is the procedure*? Nou *move* sa lamannman? *Alright, yeah.*

HON JOHN HOAREAU

Mr Speaker, mon pe demann ou ki sa lamannman i ganny aksepte, akoz i pa en *substantial amendment*. So nou ava lir li koumsa; “*if an employer...*”

(Interruption)

MR SPEAKER

Non, non. Non, non, non. *Sorry* Onorab Pillay mon war ou pe proteste. Me selman, mon mannyer mon'n konpran li, i en *rewording* ki gard menm *content*.

(Interruption)

MR SPEAKER

Yes, Onorab Pillay, ou *point of order*? Wi?

HON SEBASTIEN PILLAY

Mr Speaker, avek tou respe ki mon annan. *I’ve tried to be as*

civil to the panel as possible, akoz nou'n ariv en lot staz, nou pa dan deba, e nou pe tret the technicalities of the law. I byen.

Me nou pa kapab kontinyen konman Lasanble, sak fwa Gouvernman i mank en lapriyer, i vin avek en lamannman. E son sel leskiz; dir ou koumsa i pa en *substantial amendment* alors les pase.

E prezan ki pe arive, i annan letan – ok, ki i pa *substantial amendment*. Me i annan letan ki menm le i *substantial amendment*, prezan nouvo fason fer, nou'n ganny dir; *amendment to amendment*. *But this*, i pa kapab kontinyen koumsa.

We have to make a decision ki mannyer bann lamannman i ganny trete. *And it's not respecting* nou konman Manm Lasanble. Napa zis en kote dan Lasanble. Nou, nou pa dakor ek sa zafer *not a substantial amendment* akoz *there is no amendment* ki'n ganny ekrire. *Now*, mon pour mwan *it's the principle of the thing* ki mon pa dakor avek.

MR SPEAKER

Ok.

HON SEBASTIEN PILLAY

Ou konpran. E i pa sipoze pe ganny fer. Me selman – me selman. La, la kot problem i vini. Ok? Zot in zwenn Gouvernman. Zot bezwen diskite koman en Gouvernman. Mon pa konnen zot diskite. Zot in bezwen diskite e deside ki mannyer zot pou bouz sa bann lamannman.

But we just can't keep doing this la. Akoz *then it becomes an abuse of the Standing Order*.

MR SPEAKER

Mersi.

HON SEBASTIEN PILLAY

E yer kantmenm nou sey alert ou lo enn ou – *it seems* ki, *might makes right*. Mazorite ki deside ki pou fer, alors nou desid dan kote mazorite. So nou pe *raise en point of order* ek ou. Ou donn ou *ruling* si lamannman pou pase oubyen non. Mersi.

MR SPEAKER

Wi mon pou donn en *ruling*. E ou'n servi legzanp yer. Mwan mon'n reflesir lo ou pwen yer e mon krwar poudir nou'n prosed absoliman *correct*. Akoz lo sa pwen ki amannman - lo sa pwen i en S.I. pa kapab kontradir en Act.

Me it doesn't say – subsidiary legislation is

dependent on an Act. So the Act comes. So annou pa al ladan. Mon pe zis reponn ou.

Mwan mannyer mon konpran sa – si Manm i le obzekte mon a permet sa lobzeksyon. Mwan mannyer mon konpran sa, i en *rewording* ki gard menm lentansyon. *This is my point of view*, so mon pou permet Onorab Hoareau *move sa amendment*. Onorab?

HON JOHN HOAREAU

Onorab? Mr Speaker, mon pe *move* ki nou *reword* sa – nou fer sa detrwa pti lamannman pou *reword* sa *paragraph (b)*; *if an employer pays to the employees – sorry*, mon a relir sa. *“if an employer pays to the employer’s Seychellois worker whose monthly salary is in excess or prescribed salary a thirteenth month pay in accordance with subsections (2), (3), (4), (5), (6), (7) and (8), the amount of, comma, yeah. - ‘the amount of the thirteenth month pay in excess of the prescribed salary, shall not be exempt emolument under the Income and Non-Monetary Benefits Tax (Cap 273)’.* Thank you. Nou a ganny segonnman pour sa amannman. Onorab Naidu?

HON SATHYA NAIDU

Lamannman propoze par Onorab Hoareau i ganny segonde. *Ok*, Onorab Pillay, pou le debat sa amannman?

HON SEBASTIEN PILLAY

Wi, Mr Speaker, mon le debat sa lamannman aköz mon krwar pou dir nou pa kapab kontinyen abiz prosedir Lasanble. *If an employer pay – pays to the employee, ok? Pays to the employer. If he pays.* Pe dir si i peye. Mannyer *clause* ti'n ekrire ti dir en anlwaye i kapab pey son anlwayer. *That’s what the clause is saying.*

Now, whilst it doesn’t substantially alter the meaning of the Clause, what I think offends me i se ki ou pa pe war naryen mal, avek ler mazorite i vin avek lamannman *at the last-minute* e dir nou poudir i *simple amendments*.

Ozordi i en *simple amendment* lo la. Demen i pou en *simple amendment* ki pou en *serious amendment* e ou pou still les pase. *My point yesterday was about this.* Gouvernman i fer sorti en Lalwa.

MR SPEAKER

Annou pa pou al dan – nou pa pou al dan yer. Nou pa pou al dan yer. Nou'n fini avek yer. So...

HON SEBASTIEN PILLAY

Non be i relevan Mr Speaker.

MR SPEAKER

Non.

HON SEBASTIEN PILLAY

I relevan akoz yer nou ti'n kree lofans. En lofans ki ti kont Lalwa. E mon krwar bann dimoun ki'n ganny kondannen i devret *challenge* sa lofans ki'n ganny kree.

MR SPEAKER

Non Onorab. Mon pa dakor avek ou.

HON SEBASTIEN PILLAY

Ozordi ki ou pe fer se ki ou, ou krwar poudir ou annan drwa zis sanz Lalwa.

MR SPEAKER

Yes, sorry mon pa dakor avek ou ki mannyer nou'n prosede yer. Mon'n etidye leka e mon krwar i korek. Okenn lot pwen o sa de - Onorab Georges?

HON SEBASTIEN PILLAY

Be mon pa ankor fini koze, ou dir mwan okenn lot pwen? Mon pa ganny drwa koze?

MR SPEAKER

Be ou'n fer ou pwen.

HON SEBASTIEN PILLAY

Wi be sanmenm sa. Be si mon fer mon pwen, ou pe enteronp mwan, ou pa les mwan koze.

MR SPEAKER

Wi be ou'n al lo en lot size. *Sorry*. Si ou annan lot keksoz pou dir ou a dir.

HON SEBASTIEN PILLAY

Savedir ou *ruling* se ki nou pou kontinyen fer koumsa nou?

MR SPEAKER

Wi, nou pou kontinyen fer koumsa ler i nesese. Mersi.

(APPLAUSE)

MR SPEAKER,

Onorab Georges, ki ou pwen?

HON BERNARD GEORGES

Non, Mr Chair. Mr Chair, mon dakor avek ou. Mon ti pe zis al dir ki mon ti pe al reponn Onorab Pillay ki pe dir ki; si ou pe fer sa ozordi, demen ou pou fer en lot keksoz.

E mon ti anvi dir ki i annan en sel dimoun ki kapab lir ou lespri. I annan 2 dimoun annefe ki kapab lir ou lespri. Enn se Bondye. Bondye pa la. En lot set en sorsye.

(laughter)

HON BERNARD GEORGES

E ozordi mon pa war okenn sorsye dan sa Lasanble ki pe lir ou lespri. Mersi.

(laughter)

MR SPEAKER

Annou – silvouple. Silvouple, nou pa pe al dan bann zafer sorsye. Onorab Pillay, ou kapab – Onorab Pillay, ou dernyen pwen?

HON SEBASTIEN PILLAY

Mersi Mr Speaker. Sel dimoun ki konnen kisisa en sorsye, se en dimoun ki'n get son lekor dan laglas e realize poudir li menm i en vye sorsye. Mersi Mr Speaker.

(APPLAUSE)

MR SPEAKER

Bon. Prezan, mon regrete mon'n donn ou laparol.

(laughter)

MR SPEAKER

Amanman in ganny propoze, *moved and seconded*. Manm ki an faver lamannman, lev lanmen silvouple? Mersi. Manm ki kont? Mersi. *Thank you*. Bon, wi Minis, mon'n war *amendment to subsection 46D(9)(a)* - 22 Manm in *vote*

pour, 0 kont, 9 *abstain*. Minis ou ti pou fer komanter?

MINISTER PATRICIA FRANCOURT

Mersi Mr Speaker. Zis en *reminder* pou mwan regarde si pou posib pour *Chief Secretary* pas enn de komanter pli tar. Mersi.

MR SPEAKER

Yes. En moman. Mon ti'n devret donn li laparol avan nou pran bann *amendment*. Be vi ki nou komans bann *amendment*, mon pou fini avek bann *amendment*. Apre mon a donn *Chief Secretary* laparol koumsa i a kapab eklersi okenn pwen ki i krwar pa ankor ganny fer kler.

Onorab Hoareau, nou a kontinyen avek *amendment*.

HON JOHN HOAREAU

Mersi Mr Speaker. Nou *next amendment* i ganny trouve lo paz 7. *Amendment of section 76, section 4*. E la i lir koumsa; “*Section 76 of the principal Act is amended by inserting in paragraph (dd), after the figure and letter “46C” the word, figure and letter “or section 46D”.*

E sa ti nou dernyen *proposed amendment*. Mersi.

MR SPEAKER

Thank you. Panel ek Manm, napa okenn komanter lo bann dernyen - Mr Pool? Lekl...? Sorry mon war enn in montre lo - Mr Pool ou ti pou al fer komanter?

LEGAL DRAFTSPERSON VICTOR POOL

Mersi Mr Speaker. Mr Speaker, zis lo sanmenm sa lamannman ki nou'n fek adrese la. Ler mon pe get lo dernyen (9)(b) lo dernyen finisyon, *Non-Monetary Benefit Tax Act, (comma) Tax Act (Cap 273)*". Mon krwar nou'n mank sa pti mo. Mon krwar pa si i sibstansyel.

MR SPEAKER

Wi

LEGAL DRAFTSPERSON VICTOR POOL

Mersi.

MR SPEAKER

Mon krwar kekfwa - Onorab Hoareau ou dakor pou dir *that should be there?*

HON JOHN HOAREAU

Yes

MR SPEAKER

Ok.

HON JOHN HOAREAU

"Non-Monetary Benefit Tax Act (Cap 273)".

MR SPEAKER

(Cap 273). Thank you. Ok. Onorab Georges?

HON BERNARD GEORGES

Mersi Mr Chair. Mr Chair, mon pe zis al dan dernyen, dernyen lamannman ki fek ganny fer avan sa enn *and that's to clause 4 amendment of section 76*. Mon krwar ki dan dezyenm laliny *it should be "the words figure and letter"* akoz i annan 2 mo "or" avek "section". Apre i annan en *figure "46" ek en letter "d"*. Mersi.

MR SPEAKER

Sorry, si mon pa'n tro konpran, mon zis prezimen ki kekfwa bann Manm osi kekfwa pa'n tro sezi ou. Ou kapab repete silvouple?

HON BERNARD GEORGES

Wi avek plezir Mr Chair. Dernyen lamannman lo paz 7, ki'n ganny propoze par Onorab Hoareau i mete; "Section 76 of the principal Act", eksetera. Lo dezyenm laliny, "the word basically by inserting in paragraph (dd), after the figure and letter "46C". the word, figure and letter "or section 46D;" Mon pe propoze ki it

should read “the words” figure and letter” akoz i annan 2 mo. “or” avek “section”.

MR SPEAKER

Ok.

HON BERNARD GEORGES

Mersi.

MR SPEAKER

Thank you. Panel oubyen Manm?

LEGAL DRAFTSPERSON VICTOR POOL

Nou aksepte Mr Speaker.

MR SPEAKER

Thank you. Ok. Bon be sa amannman mon krwar nou pa bezwen vote lot la. Mon krwar i zis en klarifikasyon ankor en soz. So, bann amannman in ganny aksepte. Napa ankor lot pwen sorti kot Manm?

Antretan, Chief Secretary eskize, me selman mon krwar i pa tro mal pour ou kapab ganny laparol pour eklersi okenn pwen, ki ou santi poudir i nesese ganny eklersi apre sa bann kestyon e amannman. Chief Secretary? Sorry, Onorab Pillay, wi?

HON SEBASTIEN PILLAY

Mr Speaker, mwan mon pe sey go according to nou prosedir

Lasanble. Prosedir Lasanble nou fer First Reading. Second Reading nou fer en deba lo Bill. Onorab Georges i konn tre byen li. Fer deba lo Bill. Nou fek fer nou deba lo Bill nou al dan Committee Stage, Committee Stage nou demann kestyon lo lamannman. Si tou kestyon lo lamannman i fini nou vote.

Now, dapre ou la i ok pour nou les panel re koz ankor lo bann pwen ki'n ganny souleve dan deba. The law has already been approved at the merit stage. So there's no point in refer en Right of Reply on the Bill. That's a second Right of Reply ki ou pe donner.

MR SPEAKER

No. It's not a Right of Reply.

HON SEBASTIEN PILLAY

Yeah. Be ok, ok napa problemm. So si ou pe dir pou koze fer reprezantasyon, eski Manm prezan pou kapab redemann kestyon lo la?

MR SPEAKER

Non. Non.

HON SEBASTIEN PILLAY

Be you see, be ou war, be ou abiz ou lotorite my friend!

MR SPEAKER

Non. Non. Non. Nou pe...

HON SEBASTIEN PILLAY

Ou abiz ou lotorite.

HON SEBASTIEN PILLAY

Come on, don!

MR SPEAKER

Mon pe envit. Mon pe envit *Chief Secretary* pou klarifye okenn pwen ki'n ganny leve deza, ki i santi i pa'n ganny klarifye.

HON SEBASTIEN PILLAY

But that's the job of the Minister!

MR SPEAKER

Manm...

HON SEBASTIEN PILLAY

That's the Minister...

MR SPEAKER

Sorry. Chief Secretary silvouple, nou pe reste lo okenn pwen ki'n ganny leve ki merit en klarifikasyon *and that's all.*

CHIEF SECRETARY SHELLA MOHIDEEN

Ok Mr Speaker, tou Manm Lasanble e tou dimoun a lekout, bonn apre midi. I annan enn de petet bann *query* ki'n monte ki mon'n note, ki mon ti a kontan petet servi loportinite pou *provide* en pe leklersisman.

Apre midi – depi bomaten ek apre midi mon krwar en

kantite bann *kestyon* ki pe demande se lo ki *manner performance management system.* e mon vwar en bon pe bann *kestyon actually* in demann ki *manner* Gouvernman pe enplimante.

Mr Speaker, mwan mon krwar ki *performance management system* dan Gouvernman i pe rann lapel a lentrodiksyon *thirteenth month pay* ki ti entrodwir dan Gouvernman.

Si mon pour fer referans avek en *circular* ki ti ganny - ki ti ganny sirkile dan Gouvernman *Circular 3 of 2015*, lentansyon Gouvernman sete pour entrodwir *performance management system* ki baze lo en *appraisal.*

Actually, ti annan bann kriter tou ki ti donner. *Delivery of service, punctuality, attendance record* apre disiplin.

Me selman ki pa ti arive se ti napa en *tool* ki ti ganny mete pou kapab fer sa travay. E *performance management system basically* in vini pour *fill* sa *gap* ki'n annan e la i pe ganny servi pou nou kapab mezir performans dan Gouvernman.

E osi petet pour reasir tou dimoun ki sa *performance management system* ki nou pe entrodwir dan Gouvernman i pa

en lenvansyon, nou - i pa nou lenvansyon. I en *tool* ki pe ganny servi dan bokou pei.

E nou *tool* ki nou pe servi i en *tool* ki *model Commonwealth countries* pe servi.

E nou kontinyen annan dyalog antre nou bann, bann *Leaders* dan Gouvernman kot nou diskite sa *model*, lenplimantasyon e nou don kanmarad bann sipor. E sa *tool basically* i sipor parey in ganny dir, i sipor travay dir pou fer sir ki tou *citizen* i ganny sa servis ki zot devret gannyen.

E *basically* i en *tool* pour *ensure* ki tou dimoun ki al travay i *earn* zot *salary* e osi *earn* sa *50percent thirteenth month pay* ki pa obligatwar.

E Mr Speaker, se osi pou dir ki nou pe *monitor* lenplimantasyon sa *performance management system*. E lamazorite bann travayer ki mon pe enterakte avek - e mon dakor avek sa ki'n ganny dir, mazorite dimoun in dir apre midi. Lamazorite travayer dan Gouvernman zot travay dir.

E sa bann group ki travay dir menm ki pe dir mwan, menm si i annan en pe difikilte dan lenplimantasyon nou pa kapab *give up*. Akoz nou pa pou kapab avek sa sityasyon, kot

bann ki travay dir i ganny menm benefis avek bann ki pa pe travay dir.

Alor i annan en pe, en pe diskisyon ki'n fer, eski nou'n retourn an aryer si nou pa pe enplimant *hundred percent performance pay* lannen prosenn. Letan ou pe enplimant en nouvo *tool* i bezwen annan sa *monitoring and evaluation* ki ganny fer. E i enportan letan ou pe fer sa *monitoring and evaluation*.

Si i annan rezon pou ou *fine-tune* desizyon ki ou fer, i bezwen ganny fer. Akoz petet dan lepase in annan bann lenstans kot nou enplimante, nou pa *monitor*, nou pa evalye. Menm si nou pa pe ganny *the desired results* nou kontinyen fer li e i pa toultan dan lentera nou pep letan nou fer sa.

So wi nou'n *monitor*, nou'n evalye, nou'n konsilte. Departman Lanplwa in fer bokou konsiltasyon dan sekter prive e nou nou'n fer bokou konsiltasyon dan Sekter Piblik. E nou krwar i en desizyon responsab pou nou pa al toudswit dan sa lenplimantasyon *hundred percent performance base*.

E *in terms of* sa *tool* i annan ki'n lo tou le de kote mon krwar zot in dir ki i en pe konplike. E i annan travay ki

nou kontinyen fer pou nou amelyore.

E i kapab ankor dan 3 an, 4 an tou keksoz ki ou pe enplimante ou bezwen kontinyen evalye, ou bezwen kontinyen *monitor* li. E kot i annan lespas pou ou fer *improvement* nou pou bezwen kontinyen fer *improvement*.

Mon krwar sa nou'n vwar dan sa *performance - Program Performance- Based Budgeting* ki nou'n enplimante, kot ti annan en pe difikilte *initially*. Me selman nou pa'n *give up* akoz nou'n *hit* difikilte. Nou'n kontinyen travay ek li, e la nou pe vwar ki nou pe komans ganny bann benefis.

Me mwan mon pe dir ki dan Gouvernman nou ava regard nou *tool* e si i annan nesosite pou nou fer li enn pti pe *less complex* nou ava fer sa. Ti annan osi keston ki ti ganny demande ki letan i annan transfer dan Gouvernman, lekel ki fer *appraisal*?

Nou'n annan detwa *case* ki sa in met a nou latansyon, nou'n donn sipor. E nou fer sir ki toultan bann desizyon ki nou fer bann travayer pa ganny *disadvantaged*. I en desizyon ki toultan ganny fer *at the advantage of the employee* e si fodre *approve full pay for them*,

dan bann *special circumstances*, nou'n fer.

E osi pour enform Lasanble ki nou annan nou 162 *HR practitioner currently*, ki pe fer *training* kot *Guy Morel Institute*. E en kantite sa lanfaz pe ganny mete ki mannyer pour ankadre sa *tools*, sa *performance management system*.

Be osi i annan bann lezot *HR topic* ki nou pe fer sir ki zot ganny ankadre pour nou kapab pli byen ankadre travayer. Akoz lanfaz pa pe zis met lo *performance management system*. Me ankadremen *holistic of* en travayer pour nou kapab annan bann travayer ki vin pli prodiktiv.

E keston ti osi ganny demande lo *grievance*. Eski *Public Service* i annan en *grievance system*? Mon krwar sa a 2 repriz letan mon'n vin dan *National Assembly* mon'n eksplike ki tou bann Minister zot annan zot sa ki nou apel en *RBM Committee*.

E *grievance* an premye lye dan bann departman Gouvernman i al kot sa *RBM Committee*.

E si zot pa satisfes, la i ganny anmennen kot *Public Service Bureau*. E la nou, nou pas lo la pou fer sir ki ankor nou fer nou mye ki bann

travayer pa ganny
disadvantaged. Mersi Mr
Speaker.

MR SPEAKER

Mersi *Chief Secretary* pour
bann leksplikasyon lo pwen ki'n
ganny leve oparavan. Be prezan
nou'n ariv... *Point of order*
Onorab Loze, wi?

HON JOHAN LOZE

Mr Speaker, sa ki Mrs
Mohideen fek fer *its tantamount*
pour en repons lo deba. Mon pa
mind ki'n ganny fer mwan. Ou'n
permet li fer e li in fer. Me nou'n
remarke ki Mrs Mohideen in
donn en repons teknik. Be si
Minis i enkonpetan pou li fer sa
bann largiman, be zis apwent
Mrs Mohideen Minis, a fini!

(Interruption)

MR SPEAKER

Onorab. Mon pa pran ou serye,
akoz ou sel lentansyon se pou
fer en lensilt, ou war? Mersi.
Nou a pas dan Staz Lasanble
pou nou pran Mosyon pour
Third Reading. Nou a ganny
Mosyon pour *Third Reading*
silvouple.

HON BERNARD GEORGES

Mersi Mr Speaker, Mr Speaker,
annakor avek *Order 76* nou
Standing Orders, mon *move* ki

the Employment (Amendment)
Bill as amended – (Amendment)
Bill, 2023 as amended i ganny
lir en Trwazyenm Fwa. Mersi.

MR SPEAKER

Nou a ganny segonnman,
Onorab Arissol?

HON SANDY ARISSOL

Mr Speaker, mersi. Bonswar
tou dimoun. Mosyon i ganny
segonde. Mersi.

MR SPEAKER

Mersi nou a ganny *vote* par
bann Manm lo Mosyon pour
Third Reading. Manm ki an
faver lev lanmen? Mersi Manm
ki kont? Lo *Formal Third*
Reading Employment
(Amendment) Bill, 2023. 22
Manm in *vote* pour, 0 kont, 9 in
abstain. *Bill* in pase lo *Third*
Reading. Madanm Deputy Clerk
i a fer *Formal Third Reading*.

MADAM DEPUTY CLERK

Mersi Mr Speaker.

This Act may be cited as
the Employment (Amendment)
Act, 2023. Mersi.

MR SPEAKER,

Mersi, *Bill* in aprouve par
Lasanble.

(APPLAUSE)

MR SPEAKER

Avan nou kapab *adjourn*, mon pou demann zis enn pti moman pasyans e menm gard soz la pou nou fer en sel. Biro Clerk in sirkil en *Revised Order Paper* pour permet nou fer *First Reading 2 Bill* ki nou pou kapab pran semenn prosenn. Madanm Deputy Clerk, ou ava fer *First Reading Bills*.

MADAM DEPUTY CLERK

Mersi Mr Speaker.

This Act may be cited as the Credit Reporting Act, 2023 and shall come into operation on such date as the Minister may, by notice in the Gazette appoint, and different dates may be appointed for different provisions of this Act.

This Act May be cited as the Prevention of Terrorism (Amendment) Bill, 2023. Mersi Mr Speaker.

MR SPEAKER

Mersi Madanm Deputy Clerk. Mersi Minis e delegasyon pour zot partisipasyon lo sa *Bill*. E mersi bann Manm pour zot kontribisyon Lasanble ava *adjourn* e nou ava rebran Mardi prosen 9er. *Adjourn*.

(ADJOURNMENT)